

**SIXTH LEGISLATIVE ASSEMBLY OF MIZORAM
(EIGHTH SESSION)**

LIST OF BUSINESS

**FOR TENTH SITTING ON WEDNESDAY, THE 20th JULY, 2011
(Time 10:30 AM to 1:00 PM and 2:00 PM to 4:00 PM)**

QUESTIONS

2. *Questions* entered in separate list to be asked and oral answers given.

LAYING OF PAPERS

2. **Pu LALSAWTA**, Minister to lay on the Table of the House a statement correcting the reply given on the 15th July, 2011 to Starred question No. 141, Ballot No. 60 asked by Pu B. Lalthlengliana regarding “Technical zirtur lak chungchang”.
3. **Pu H. LIANSILOVA**, Minister to lay on the Table of the House a statement correcting the reply given on the 15th July, 2011 to Unstarred question No. 6, Ballot No. asked by Dr. R. Lalthangliana regarding “Plan Fund hnuiaia Sorkar hnathawk chungchang”.

FINANCIAL BUSINESS

DISCUSSION AND VOTING ON DEMANDS.

4. **Pu LALSAWTA**, Minister to submit to the vote of the House various Demands under his charge.
5. **Pu LALRINLIANA SAILO**, Minister to submit to the vote of the House various Demands under his charge.
6. **Pu NIHAR KANTI**, Minister to submit to the vote of the House various Demands under his charge.

NGURTHANZUALA
Secretary

SPEAKER : Tichuan nang chu, “A chhe lai siamthatu,” “Mi awmna tura kawngte siamthatu” an ti ang che. (Isaia 58:12)

Zawhna leh chhanna hunah kan lo kal ang a, zawhna Starred Question No. 111-na zawt turin member zahawmtak Dr. R. Lalthangliana i lo sawm ang.

Dr. R. LALTHANGLIANA : Pu Speaker, ka Starred Question No. 111-na PHE changtu Minister zahawmtak chhan atan -

Buarpui leh a chheh vel khuaa chengte tan hian tuilakna (scheme/project) siam/ruahmanna a awm em?

SPEAKER : Chhang turin Pu S. Hiato, Minister i lo sawm ang.

Pu S. HIATO, MINISTER : Pu Speaker, zawhna no. 111 chhanna chu hetiang hi a ni - Awm e, hetiang hian ruahman a ni : Buarpui khuaah hian Ground Water Base-a tui pekna kum 2010-2011 khan siam a ni tawh a, submersible pump 9 (pakua) dah niin impounding reservoir nena chawm mek a ni. Tin, a chhehvela ruahmanna a awm em tih kha Saisen te, Kawlhawk te, Phainuam te, Dengsur te, South Lungdai te hi ruahman a ni a, a then pheh chu hna an tan dawn mek hlawn tawh a ni.

SPEAKER : Zawh belhna Dr. R. Lalthangliana a ni ang a, a dawtah Pu P.P. Thawla chumi zawhah Pu K. Lianzuala. Dr. R. Lalthangliana i sawm ang.

Dr. R. LALTHANGLIANA : Pu Speaker, Ground Water Base tih leh a pumping lei hnuai atanga tih laia kha chu kan lo hre sa deuh hlek a ni a. Kan zawh chhan lai taka chu Pu Speaker, min chhang thei se ka duh khawp mai a. Buarpui bawr vel hi khaw engemaw zat a awm bakah tui lamah harsatna lian tak kan tawhna a rei tawh em em mai a, Buarpui khua ringawtah pawh chhungkua 300 chuang an lo awm ve tawh a. Tui lei hnuai mi ringawt hi chu inngahna tlakah kan ngai mang tawh lo ve an ti a, tin, kang chin te, tin, zuk pump theih vak loh chin te an awm a. Chuvang chuan, kum thum/kum li zet kalta a Buarpui atanga km 2 emaw lekah Lungphun lui an tih saw a tha hle mai a, PHE Department lama kan mi thiamte pawh a hmun a kalin an va enfiah tawh a, an han enfiahnaah pawh darkar 1-ah litre 60 kha awlsam te a pump theih tur ang chi kha a ni a, tin, a tui a thianghlim a, virgin forest atanga lo chhuak Sih tui kan tih ang chi te an ni a. Filter pawh ngai lo, tui thianghlim em em, treatment tih nan pawh a senso teh chiam ngai lo a lo ni a, a hla lo bawk a, khua atangin. Hei hi Chief Engineer pawh ka sawipui nual tawh a, amaherawhchu, mumal takin scheme leh project khatiang kha la formulate loh ani a, hei hi min tih sak theih chuan a lawmawm hle in ka ring a, opposition bial a nih avanga eng emaw kha a

awm ka ring miah lo a, Lunglei High Power sum sem ang kha a nih ka ring chiah lo a. Ka bial lamah a rawn kal tam theih ka ring a, kan Minister hi ka ring a, chuang chuan hei hi min han duhsak thei deuhsele ka duh hle a ka'n zawt a ni. A dang lehah chuan bial hemi in a a han chawm remchang lo a awm a khumi Sertlangpui tlang dung kan tia, khaw 4 pawimawh tak tak Lungdai South, Serte, Sertlangpui leh Kawlhawk bawr vel hi a tih ngaihna a awm lo a, tui an harsa hle mai a. Greater Lunglei Water Supply Scheme a pek tumna ruahmanna chu an awm tak na a, mahse tunah sawn Greater Lunglei Water Supply Scheme a saw he scheme a hi ruahman a nih laiin Lunglei a mihring 66000 chawm thei tura ngai a ruahman chauh kha a ni a, tunah mihring kan tam tawh a, nuai chuang chu kan la ni lo na a (Interruption)

*Speech not corrected

SPEAKER : Han zawt zung zung teh i zawh tur kha. Demand sawi hunah i sawi dawn nia.

Dr. R. LALTHANGLIANA : Ni e zawh dawn khan kha kha fiah a ngai si a Pu Speaker, kan tam tawh si a, min chawm zo tawh si lo a, chumi avang chuan hetah Mat Lui saw a lak dan kawng saw dap thei se tih a duhawm hle mai a, chu chuanin Lunglei leh a chheh vel khua zawng zawng pawh a chawm theiin ka ring a,tuna pump mek a saw a tuihna a kang nasa tawh si a, chuang chuan saw lai saw min tih sak thei ang em? tih kha ka'n zawt duh a.

A pathum naah chuan, a zawhna neitu ka ni bawk a ka'n duham lawk a ni. Lunglei Water Supply Scheme MNF Sorkar laia kan ruahman 1st installment crore 4 chauh hmu a kum 1 tunah delay a ni tawh a, 2nd installment tunah hmu thei lo a kan awm reng, hna kalhmang hmalakna kal buai ta saw engtin nge nih kan tih dawn? Revised a nih loh pheih chuan a tih ngaihna a awm tawh lo mai thei, chu chu a dinhmun kha ka zawt duh a. Hmalak dan thar a awm leh thei em tih ka'n zawt nghal a ni. Ka lawm e.

*Speech not corrected

Pu P.P. THAWLA : Pu Speaker, ka lawm e. Ka bial Hqrs. Tuipang hi British hunlai atang a khaw pawimawh a ni a, amaherawh chu tui lak tur tha an neih loh avangin tui lampang harsatna hi a nasa hle a. Chutih laiin tun Sorkar thar lo pian a PHE Minister zahawm takin Scheme thar duhawm tak mai Siata khawchung maiah, khaw 7 vel intawm tur a pump a pump chhuah tur foundation a phun a, a lawmawm ka ti hle a. Hei hi kum eng zat chhung a zawh tur nge? Tunah hian foundation lay atang khan eng chen nge hmalakna kal zel? tih ka zawh belh ani e.

Pu K. LIANZUALA : Pu Speaker, kan Minister zahawm takin min chhan nghal theih tho ka'n ring a. Hei ka bial chhung Tlungvelah khian

Vawmhrawk tui pump a ni a, 2000 kumah khan an pump tan a, a pump na khawl khi a chhe tawh hle mai a. Tichuan Tlungvel leh Darlawng khua in 790 lain an intawm a ni a, a chhe deuh reng mai a, Department-ah pawh kan thlen thin a, siamthat a ni hlei thei lo a, chu chu waviinah kan Minister zahawmtak hian khawl thar min pe thei ang em tih kha ka'n zawh belh a ni e.

SPEAKER : A chhang turin a changtu Minister Pu S. Hiato i lo sawm ang.

Pu S. HIATO, MINISTER : Pu Speaker, Dr. Thangtea zawh belhna kha, opposition bial a ni emaw ruling bial a ni emaw tui mamawhnaah thliar hran ka nei miah lova, a neilo khua pawisa kan neih ang angin khuh hram hram kan tum a, kuminah ringawt pawh khaw 125 Mizoramah kan khuh tan dawn a, thingtlang lamah rain water harvesting scheme atang te pawhin. Tin, Buarpuia hi ka la tlawh lova, ka report hmuh danah chuan a chhehvelah tui lak tur a awm loh avangin he mi pumping scheme hi kan siam sak a, tunah hi chuan a haw tha viau mai. Hman deuh khan Chief Engeneer kan va tir a, a report-ah pawh a lawm haw viauva, chu chu VC ho committee-ah hian dah a ni a an kutah. Duh hun hunah hawn theihin a awm a, chu chu tukina VC hoin an report dan chuan Buarpuiah hian tui chu an hmu tha viau rih niin a sawi a, a tul chuan lakbelh tur tha tih kha kan survey tir leh phawt ang a, chuta an finding azirin ni ta se, i sawi dan khan darkar khatah litre 60 i ti mai khan ka hria a, khami kha chu a tlem chu a tlem viauin ka ring, mahse entir kan lo tum ang e.

Tin, a chhehvel khua pawh kha tuilak tur tam tak an neih loh avangin, hmun an neih loh avangin tunah hian laksak theih theih chu, Rain water Harvesting scheme emaw, a lak theih ang ang kha kan ruahman a ni a, churang chuan nichina ka sawi tak khua te kha a khaw chhehvel thliar miah lovin Saisen te, Kawlhawk te, Phainuam te, Dengsur te, South Lungdai te kha a biala mi kan thawhsak a ni. Tin, Kawlhawk te hi a harsa bik tih pawh kan hria a churang chuan Rain Water Harvesting Scheme hian kan khuh mek a ni.

Tin, Lunglei atang a zuk pek kha ruahmanna chu awm mah se, tunah Lunglei pawh a pung tulh tulh a kan khawl te a hlui lam zel ani a, churang chuan tui tamtak zu pek theih anih loh avangin i ti ang ruahmanna hi siam sak an ni. Tin, Lunglei Water Supply Scheme a kan pawisa hmuh kha tunah theih ang tawkin hma an la a, hna an thawk a, zaa sawmsarih zawh tawh a ni a, second installment tur hi khami UC a zir khan minrawn pe leh dawn a ni. Chu chu hma kan la mek a ni tih ka sawi duh a, tin, Lunglei scheme hi UID, SSMT UD&PA hnuai mi hi a ni zawk a, keini chu work agency hi kan ni a, churangin sorkar chuan a tih tur ang ang chu a ti chho mek a, second installment pawh hmuh thuai pawh kan in beisei a ni tih kha ka chhanna ni se.

Tin, Pu Thawla zawhna kha Tuipang hi tui lakna tur nei lo an ni a, kan buaipuina a rei khawp a, mahse vanneihthlak takin central sorkarin pawisa vaibelchhe kua aia tam minrawn pe a tunah Tuihri lui pump kan tum a, Tuihri lui a pump chuan a chhehvel khaw sarikh vel chawm thei turah kan in ngai a, chumi atan chuan Tender koh tawh a ni a. Tender pawh hawn tawh a ni a. Contractor pawh thlan mek ani a. Rei lo teah a hna hi kan tan thei ang tih ka chhanna a ni a. Tin, Tlungvel a an tui khawl chhe reng hi department chuan a hria a. Amaherawhchu a lakna a hla a, a lak na kum

te a rei tawh avangin pipe te a lo chhia a, repair reng a ni a. Duhthusam angin a kal thei lo va, hei hi siamthat dan kawng zawn mek a ni tih hi ka chhanna a ni e. Ka lawm e.

*Speech not corrected

Dr. R. LALTHANGLIANA : Minister kha a din laiin Mat lui lai taka kha ruahmanna a awm thei dawn em? Mat lui Lunglei khawpui hrim hrim tan.

Pu S. HIATO, MINISTER : Pu Speaker, chu chu tun tumah chuan scheme kan la siam lo va, Lunglei lamah hian Mat lui lak tumna hi chu kan ngaihtuah mek a. Mahse Scheme puitling emaw thehluk emaw kan la nei rih lo a ni.

SPEAKER : Tlang chhipah kan awm a, Lui te chhuk luan tura Pathian siam a ni a. Chho luan tir kan tuma, harsatna a awm thin a. Chuvangin kan ruahtui tla khawl khawmna lampangah in sa tur reng reng hian ban kar khat tal hi chu kan inchung tui thianglim lak nan hian hisap tel ila, a lawmawm ngawt ang. Kan zia sawt ang. Tunah zawhna 112-na zawt turin Pu B.Lalthlengliana i lo ko ang.

Pu B. LALTHLENGLIANA : Pu Speaker, ka Starred Question No 112-na Health & Family Welfare Minister zahawmtak chhan atan. College of Nursing pawisa cheng nuaih 150 bo anga sawi fo hi a dik em? tih ka zawt e.

SPEAKER : Chhang turin a changtu Minister zahawmtak, Pu Lalrinliana Sailo i lo ko ang.

Pu LALRINLIANA SAILO, MINISTER : Pu Speaker, member zahawmtak Pu B.Lalthlengliana zawhna chhanna chu pawisa hi tihchingpen ngei nia hriat a ni a. ACB-in an chhui a, charge-sheet pawh thehluh tawhin thu kan lo dawng e.

SPEAKER : Zawh belhna Pu Lalthlengliana dawtah Pu John Siamkunga.

Pu B. LALTHLENGLIANA : A bo dan a kha he pawisa hi 2005 March 29-ah Ministry of Health & Family Welfare in a rawn sanction a. He sanction hi item ruk atan a sanction a ni a. Eg: Construction of school or Hostel building-ah 70 lakhs, Strengthening of Library-ah 10 lakhs, Vehicle-ah 20 lakhs, Furniture-ah 20 lakhs, strengthening of Laboratory 10 lakhs, AVH Computer and Accessories tihah hian 20 lakhs a ni a. Hei hi a kim lova department-in an hriat avangin tuna Minister zahawmtakin a sawi ang khan a chhui tu officer 2 ruat a ni a.

An chhui chhuahnaah chuan construction of school or hostel building 70 lakhs leh strengthening of laboratory 10 lakhs hi a kim lova hmuh a ni a. A

kimlova hmuh a nih avangin Minister zahawm tak sawi ang khan ACB-ah MNF Sorkar lain case siam a ni a, ACB pawhin an report chu special judge, Pu T.Saikunga hnenah an thehluh tawh a, chu chu a kalphung a ni a. Chutih laia Pu Speaker, 150 lakhs a vaia bo anga sawi fo hi chu a dikin ka hre lova, Politics-a inbeihna hi awm thin mah sela, (Nirupam chakma : Pu Speaker, subjudice thil chu sawi theih loh a ni a.) chu ka sawi dawn alawm. A dik chinah hi chuan kan intih a dik a. Amaherawhchu, a dik lo thleng a intih hi chu a dik lova. Nuai 80 vel hi chu a awmna chin hriat a ni lo tih chu sawi sela a pawmawm khawp mai. Mahse a zavaia bo anga kalna apianga sawi fo chu minister tan dawt sawi nih te pawh a awlin ka ring a. Engtikah nge magistrate hian a tihchhuah theih ang tih kha ka zawhna pakhat ni sela.

Pahnihnaah chuan OPD Building chhawng bo tih kha, Pu Speaker, i ding lama kan thut lai khan namen lova min beihna point pakhat a ni a. Ruling-ah i dinglama thu te an awm ve leh tawh a. A bo tak tak a nih chuan min hrih thei tawh lo'm ni? tih ka zawt a. Min chhannaah khan SE pakhat chhui tir mek a ni tih a ni a. Kum 2 leh a chanve a liam chho tawh a. OPD building pakhat kha a bo a nih chuan SE meuh chuan kum 2 leh a chanve chhung chuan a chhui zo tawh lo maw? A chhui zo tawh a nih chuan a finding report min hrih thei em? Min hrih thei lo a nih pawhin a report copy kha member te min pe thei em? tih kha ka zawhna ni sela.

Tin, Pu Speaker, hei MLA te hian mitthi dah hi kan problem a ni a. Aizawl khawpui chhung chu in awl deuh a. Thingtlang lam chu ruling leh ruling lo pawh kan problem thuhmun vek a ni. Mi an thih tawh chuan minrawn hrih a. Tu huatthu ni lo sela, Aizawl khawpui chhungah YMA fel tak tak, Branch hruaitu te an lo awm a. Minrawn hrih hi chuan kal loh theih a ni lova. Kal chuan a phurhna ngaihtuah loh theih a ni lova. A harsa hle mai. MLA tan nun ngaihna a awm lo. Keini bial ang te chu pakhat thawn nan ₹ 10,000/- dawn lai sen a lo ngai a. Thla khatah pahnih pathum an thi ang tih hi kan hlau zek zek mai a ni. Aizawl khawpuih damlo anrawn refer an tih hi chuan an damchhuah hram theih nana tawngtai hi kan tihtur No.1 a ni. Chuvang chuan MNF sorkar hmasain ambulance 3, 4 vel a lei ang khan, he sorkar chak tak hian Ambulance thar pahnih thum tal a lei thei lo'm ni? 2009-2010 ah khan lei tura buatsaih a ni nain motor leina tur kha lapse zingah a tel a, lei theih loh a ni a. Hei hi kan vaia kan common problem a nih avangin khawngaih taka kan minister hian ambulance enggemaw zat lei tura hma min lak sak hi a thei dawn em? Budget bu ka en lova, an lo dah reng pawh a ni maithei a. An dah lo a nih chuan R.E-ah tal min ngaihtuah sak thei em? tih ka zawt duh a.

Tin, chu lo lehah chuan driver-te hi mitthi dah a an kal chuan zanlai pawh ni se, an thova, an kal a. Tlaivarin an kal a, chhunah nen. Hetianga an rim em em avang hian motor awl hman lovin an chhuak baw si a. Heng driver kalchhuak ta te hi an kal ni te tal hi chu ni hnih ni thum pawh ni se, honorarium ang hian enggemaw lawmman te hi an siam sak theih a ni em? tih kha ka'n zawt duh baw a ni. Ka lawm e.

Pu JOHN SIAMKUNGA : Pu Speaker, kan sorkar tirh lam deuh khan Referral Hospital, Falkawna mi saw, kan va fang ve a, Police-in an luah hma khan. Sawlai quarter tin mai saw hnuchhawn a ni a. Hnim zam thei chi in a bawh lek luk a. Amaherawhchu kan sorkar chak tak hian nasa taka hmalain a tih changtlun hna

a thawk ve leh thung a. Hetah hian eng chen nge hma lak a nih tawh, tih ka zawt duh a.

A pahnihnaah chuan, Aizawl Civil Hospital tih changtlun nan vaibelchhe 10 kha khulam atangin kan hmu niin ka hria a, kha kha tangkai tak a hman a ni ta nge, utilization certificate an pe tawh em tih ka han zawt bawk e.

Pu LALRINLIANA SAILO, MINISTER : Pu Speaker, Member zahawm tak Pu Thlenga zawhna kha, amah leh amah a rawn in admit a, pawisa bo a rawn hriat chian avang khan a lawmawmin ka hria a. Nia, thil dik lo hi kan duh loin kan haw tlang a. Hman ni May ni 5 khan Mizoram Government Doctors Association conference-ah khan kan Chief Minister zahawm tak hi khuallianah kan hmang a. Chutah chuan Referral Hospital-ah sawn a ni a, Nursing College chanchin te hi doctor mah ni ila kan hre vek lo a, an ti a, min sawi tir a. Tah chuan darkar 1 vel ka sawiin ka hria a, Nursing College building sakna tur kha nuai 150 vel tihchingpenin a lang a tih kha second hnih vel han sawi zauh a awm a. Chu thu chu media lamah khan a lang lian ta riau a, chu chuan issue a rawn siam ta a ni a. Chu te chu kan vawi khat sawina a ni mai awm mange aw, ka ti a.

Nia, tunah hian hemi Nursing College hi kum 30 el euh mai mahnia building nei lovin a lo awm tawh a, a tirah Nursing School, chumi hnuah Nursing College. Tuna lo kal leha pawh saw ti hian kan han ti a ni a. Affidavit meuh siama building nei tawh anga central lamah theh luh tawh a nih avangin, tuna lo kal leh saw second instalment a ni a, chungte chu ka'n sawi duh a. Amaherawhchu chak takin hna a kal mek a ni tih House ka han hrih duh hrim hrim a ni. Nia, OPD chhawng bo tih kha, keimahni chauh ni lo khan term hmasa lam a opposition leh ruling kha kan intauh a ni a. Khatiang a nih avang khan term hmasa lamah S.E. kha chhuitir a ni a. Amaherawhchu mi kuta awm tawh a ni a, rawn chhui chak ru tih a awm chuang lova. Kha kha, ni e, a chhawng zat tur drawing a awm a, a sak awm ta lova kha, khawiahnge kan ti kha a ni a, Opposition zawng zawng khan. Chu chu kum 2 leh a chanve ni lovin kum 3 chuang ni tawhin ka ring a, term hmasaa chhuitir tawh zawk kha a ni a, chu chu ka'n sawi duh a. Tin, thahnemgai taka mitthi phurhna, kan mangang tlanga thingtlang bialtu te phei chu kan rim zual emaw chu aw, tih tur a ni a, kan Cabinet meeting neih hmasa ber khan kan Chief Minister zahawmtak, kan House leader zahawm tak hian helai hi hriain kan Minister hian District Hqrs tinah, District Hospital tinah thihna tlakin damdawiin an sa tur a ni a ti a, chutiang chuan kan han tang zel a. Chutihruala a sawi chu tuna member zahawm tak sawi ang chiah khan mitthi phurhna tur hi lei nghal ni se a ti a, tichuan 2009 khanin 3 kan lei nghal a, chu chu tunah hian kan hman rawn tlan a hi a ni a, amaherawhchu hei kum 2 chuang te a lo kal ve tawh a, heng hi chu a motor condition te kan lo en ang a, kan lo thlir zui ang a, a chhia a nih chuan chungte chu ngaihtuah theihloh turah ka ngai lo a, amaherawhchu tlan thei a nih chuanin sum leh pai indaihlona avangin repair zel a ni. Tin, driver te honorarium pek chungchang kha a awm khawp mai a, an hah dan te, an rim danah te, zanah te tlaivar an ni a, amaherawhchu chhun lamah hian an mu ve leh thung ta a, zana kal ho hi chu. Chuvang chuan, chhun lama mite khan an thik ang tih kan hlau deuh hleka an hah viau mai hah chu.

*Speech not corrected

Pu B. LALTHLENGLIANA : Kan Minister chhan atan, keini bial ang te chu ni khat zan khat te an tlan a, chhuna tlan leh zana tlan te kha thumun deuh reng mai a, kha kha nia kan sawi zawk a chu.

Pu LALRINLIANA SAILO, MINISTER : A pawisa zawng ang lo khan duh leh an hahchawlhna ang zawng khanin tlan rim na na na chu nita zawk se, tih lohah chuan an inthik ang a, tikhanin a buaithlak mai awm mang e aw ka ti a. Anmahni khami zan hla deuh hlek kal te kha chu a tuk lampang emaw kha chawl rei ta mai se, a hrim hrimin chung te chu kan lo en ang e.

*Speech not corrected

Pu LALROBIAKA : Pu Speaker, khalai kha tlem han belh ve ka duh a i phalna in ...

SPEAKER : Khati khan i ding mai a, Pu Joseph Lalhimpuaia pawn a phara, Pu Lalduhawma pawn a phara, ka ko duh tawh lo chu a nia..

Pu LALROBIAKA : Khawngaihin min duhsak ta sa sa, min duhsak thin kha, kei hi a kal tam pawl tak ka nih ka ring a, ruang dah tih velah hian, a hriat pawh min hria a, ka kal tawh hi chuan 4th Grade thleng pawhin ka duh hi an hre mai zel a. Tunah hian an dinhmun hi a awk ai khawp mai a, ka hriat dan hi a sual loh chuan Morgue Van pahnih service thei, chu pawh pick – up, pahnih chauh tunah hian Aizawl Civil Hospital-ah hian kan nei niin a lang a ni. Tin, bus pahnih kan neiha kha condemn turin tunah hian an process mek a, chutiang chu a ni a, khawngaihtakin tunah hian kan Minister zahawm tak hian helai sutkianna tur atana hma a rang lama min laksak turin kan duh a, tunah hian kha ka hma a sawitu ten an rawn sawi tak ang khan ka kal reng mai a, indaih loh changing ZDU lamte, tin, Hmeithai Association lamte kan han dil kualala, khatianga kha a ni a, churang chuan special taka min ngaihtuah sak theih dan hi a awm lawm ni, kan ti nawn ve leh duh hrim hrim a ni.

SPEAKER : Minister khan chhan dan tur a hre mai ang ka ring.

Pu LALRINLIANA SAILO, MINISTER : Pu Speaker, kan hriat angin a sum leh pai hi a ni mai a, duhdan hi a inang tlang a, amaherawh chu sum leh pai awm dan a zirin kan lo thlir ang e. Kan lei ang tih kha kan sawi dawt ngam rih lo deuh a ni, kan lo hria ang e.

Tin, member zahawm tak Pu John Siamkunga zawhna kha Falkawn dinhmun chu ni e kan hria a nga, keipawh hi Opposition lai khan vawi thum va kal ka ni a. Kawng lehlam lehlam a hnim kha a in chibai suau suau thin kha a ni a, tunah hian kan sorkar hnu hian cheng vaibelchhe li leh nuai sawmruk pahnih kha a rawn thleng tawh a, tichuan, leiba awmsa cheng nuai za leh sawmhni a tling lo deuh hlekin ka hria chu chu kan clear a, an lo bat sa kha contractor hnena pek tur. Tichuan ruahman sa awm thlap a ni a, PHE in a chan tur a ti a. Tin, P & E in chan tur a nei

bawk a. Tin, PWD in chutiang chuan an in sem thlap a, chu chu hman zawh leh tawh a ni a. Tin, saw mi Referral Hospital chung saw a far nasat lutuk avangin PWD-in State pawisa in cheng nuai sawmnga in roof treatment an siam a, chutiang chuanin luah theih loh deuh hlekin kan dah a. Tin, kan sawi tawh thin a Quarter te kha a lo chhe tawh si a, hmanni khan Central-ah tun thla ni li khan kan zu kal a, khitianga vaibelchhe 42, vaibelchhe 41 dah tawh a ni a, khitia dah mai lovin tlem a zawng min sanction leh ulangin kan kal theiin ka ring e kan ti a, vaibelchhe 2 aia tlem lo, vaibelchhe 5 aia tam lo rawn siam leh ta che u min ti a chu chu a inmung mek a ni.

Tin, Aizawl Civil Hospital hi, ni e, sawi a hrehawm khawp mai a. Kan Secretariat-te buaina a ni a, file pawh hi a hmuh theih vek a, vaibelchhe 10 lokalahan utilization certificate pek kha a nei a, vaibelchhe 4 leh nuai 26 kha an pawm a, vaibelchhe 5 leh nuai 74 kha an lo pawm thei ta lova, chu chu “in State sorkarin rawn meet leh ula rawn rul se, chutilochu a dang a hi kan pe thei tawh lo che u” an ti a. Tunah hian Finance te, Planning te kan han rawn a, Finance te kan han dawr a, kan Secretary-te an han kal a, tin, kan Finance Minister zahawm tak a thar pawh hi ka sawipui tawh a. Amaherawhchu, vaibelchhe 5 leh nuai 74 kha hmuh mai tur leh han hman mai tura kha a awm mai lo pawh a ni thei a, helai hi a hahthlak ru ang reng khawp mai a. Vaibelchhe 5 leh nuai 74 kha a awm tak loh avangin khawiah nge a awm an rawn ti a, thingtlang lama hmang angin a utilization certificate pek leh a ni a. “Engatinge upgradation of Civil Hospital, Aizawl ti na na a hetiang a in hman” an ti a an pawm thei ta lo a ni, kan staff te leh kan officer te pawh an rim khawp mai, an ngaihtuahna pawh an hmang nasa khawp mai tih kha ka chhanna a ni e.

*Speech not corrected

Pu JOHN SIAMKUNGA : Ngawi rawh aw, Pu Speaker, khawngaihin, khami a nih khan vaibelchhe 10 tan khan U.C. kha an zu theh lut ta a, tahchuan vaibelchhe 5 leh nuai 70 vel kha an pawm ta lo tihna niin ka hria a, a dik em? (Pu Lalrinliana Sailo, Minister : Chu chu kan sawi lai mek kha a ni e) Chutiang ni ta sela Assembly Committee-in a helaia a pharh chungchangah khan hmalakna neih a ni em? Helaia thil dik lo awm a kha engtiangin nge hmalak a nih? Subject Committee-in a helaia a rawn submit tawh a kha, khami chungchangah khan.

SPEAKER : Zawt zel mai teh u. Pu Duhoma te, Pu Mahima te pawh khan zawt zel mai teh u. A tih tak tak theih loh, kan hmang zo thak a nga a ni mai.

Pu B. LALTHLENGLIANA : Pu Speaker, a zawttu ka ni bawk a, building chhawng bo khatiang anga hlamzuih tur anga a awm ringawt mai kha a dikin ka hre lova. Chuvang chuan, a chhuitu kha Sorkar Officer tho a ni a, chhui chak deuh tur te pawhin a nawr theih lawm ni? Nge a kut hi phuar em ni zawk? Kumin te tal hi chuan chhui zo tawh sela a tha lawm ni? A chhan chu building chhawng bo tih hi entirnan Serchhip Tourist Lodge khi Tourism Minister ka nih ve hun hma deuh hleka sak a ni a, Department in PWD-ah pawisa pek a ni a. A hunlaia min tender sak theih lo a, kum 2/3hnua min tender sak chauh hnuan cost escalation avangin a tira kan project ang kha kan ti thei ta lova, chhawng khat kan chhawk a, chumi hnuah pawh chuan a bath room pawh mawi hnai taka ti thei lovin kacha tura tih a ngai a.

Chutianga tih a lo nih khan building chhawng bo a ni lova, a hun laia sak theih loh avanga cost escalation vanga chhawng khat paih mai a ni zawk. Chutiang deuh chuan OPD pawh hi a nih hmel a, a lo ni lo anih pawhin thudik hi Mizoram mipui hian hria sela a thain ka ring a. Kumin chung hi chuan min hrilhfiyah thei hram teh se.

SPEAKER : Pu Joseph Lalhimpuia, a dawtah Pu Lalduhoma.

Pu JOSEPH LALHIMPUIA : Ka lawm e Pu Speaker, hming thar te pawh ka nei dawn ni awm tak a nia. (Speaker : John kan tia ni maw Joseph) Assembly rorel aiawhin Subject Committee khan Hospital hmalakna a bik takin NRHM chhui chianna a nei a, chumi report chu March thla khan House-ah thehlut tawh, lay tawh a ni a. Chutah chuan party hrang hrang atangin Member te pawh kan awm a. Department officers te nen pawh an in zawt a, a hmunah te an kal a, Assembly Secretariat-ah te an ko a. Chumi a department-in a chhanna chu vaibelchhe 10-ah hian vaibelchhe 5.7 ti ila, a figure chu ka sawi sual ang tih ka hlau khawp mai, hmanna hi department-in an hre thei lo a ni. Ziakin an hriat theih loh thu Committee hnenah chhanna an pe a ni. In hmanna Subject Committee-in min hrilh rawh an tihin vaibelchhe 4.25 chu an hmanna chipchiar an rawn pe thei a. Vaibelchhe 6 deuh thaw chu an hmanna an rawn pe thei lova. Department pawhin hmanna kan hre lo tiin an ziak tawp mai a ni. Chuti a nih mek lain kan Minister zahawm takin an chhannaah khan vaibelchhe 10 chu Central lamah U.C. an zu thehlut tawh tho niawm tak a ni a. Thil serious tak a ni, Mizoram aiawh rorelnaah department khan thudiklo a hrilh tihna em ni Pu Speaker? A bo a nih chuan U.C. pawh an thehlut thei lo tur a ni a, hun hmasa leh hun hmasa lo kha kan sawi zing deuh bawk a. Helai hi tihchian a thain ka hria a. Assembly Subject Committee hmaa helai hi tihchian a tha in ka hria a. Assembly Subject Committee hmaah report ziaka an thehlulah chuan vaibelchhe 5 aia tam hmanna kha hriatloh a ni, a bo a ni, vaibelchhe 10 atang khan. Chumai chu a ni lova Lunglei Hospital te pawh vaibelchhe 1 pek a ni a. Chumiah chuan an hmanna chu cheng nuai 2/3 vel chiah hmanna hmuh a ni a, a bak zawng chu a awm tawh lo. Assembly aiawh a Committee dinin a hmunah kalin en a ni a, Aizawl Hospital pawh kal a ni. Chuvangin a serious a. Assembly aiawh Committee-te Department ina thudik tawklo a hrilh fo dawn a nih chuan engnge Committee pawh hian a tih chuan ang. Hei hi Zoram mipuite hnenah thudiklo an hrilh tihna a ni a, thil serious tak niin ka hria a. Chulai chu March thla Session-ah khan Assembly Committee hian a lay tawh a ni. Chutianga a nih reng laia Central lamah chuan a hmanna ni awm tak U.C an thehlut leh thei si kha thil serious tak niin ka hria a, kan ngaihtuah ngun deuh pawh a ngaiin ka hria a, ka rawn sawi a ni.

Pu LALDUHOMA : Pu Speaker, i phalna tel ngeiin kan zawt ang e.

Pakhatnaah chuan tun dinhmunah hian tupawh sorkarna chelh lo ni ta ila kan ngaih pawimawh tlan theuh tur chu Referral Hospital hi a ni a. Hemi kan neih loh avanga Private-ah te leh Zoram pawn a mihring in sengsoa kan buai nasat zia kan hre theuh a. Hemi a hmalakna kha kan ngaithla tawh nachungin puitling deuh hlek a saw kan Referral Hospital saw siam a nih theih nan hei aia chak a hmalak dan hi a awm lo em ni aw, engnge harsatna te a awm em? Tih puitlin thuai thuai tawh hi mipuiin kan va nghakhlel tawh ve tih hi kan zawt duh a.

A pahnihnaah chuan Medical College hi neih kan tum tih kan hria a. Hemi chungchangah hian engnge kan thlen tawh tih ka zawt duh a. Ka hriat dan chuan, ka hriat dan hi a diklo mai thei a Planning Department lampang hian eng eng emaw hi an rawt a, Committee sang din te an rawt a. Chumi chu Chair se, chutiang khatieng tih vel te a awm a. Kan Planning Department hi frank takin sawi ila, kan department dangte pawh hian an ning deuh hlek tawh a ni. Duh aiin an inrawlh thuk a. Heng Medical College dinna turah te hian Committee din a ngai a nih chuan a changtu Health Minister zahawm tak hi chair rawh se. A fel berin ka ring a, a nih loh chuan a Department Secretary chair rawh se. Sum leh pai leh thildangah a puitu tur an ni a, Planning Department hi. A tibuaitu tur leh inrawlh lutuk leh an kaihhruaia, an thuhnuaia a dah tumna lek lek hi a tamin ka hria a. Chu chuan Medical College kan dinna turah pawh hian eng emaw chen rokhawlhna min siam ni a hriatna ka neih avangin hengte hi eng harsatna nge kan department te hian an tawh, engnge thil awmzia, engnge kan thlen tawh tih hi kan zawt duh a.

A tawp nan chuan kan Minister zahawm tak hi nimin zingah ka bial Sairang Hospital a tlawh a, kan lawm khawp mai a. Session hmasa lam daihah khan kan building chhe tawh khu min repair sak turin 13th Planning Commission atangin tih kan tum e tih kha min chhanna a ni tawh a. A chhiatzia te, kan mamawhzia te min zuk hmuh sak a, kan lawm a. A sakna tur kha engtikah nge min pek dawn tih ka'n zawt duh a ni.

SPEAKER : A chhang turin a changtu Minister Pu Lalrinliana Sailo i lo sawm ang.

Pu LALRINLIANA SAILO : Pu Speaker, a hnukung ber atang khan tan ila a tha ang e. Nimina kan zawhna Trade & Commerce-ah khan Sairang Dinthar veng Market sak kha a rawn zawt a, a latest ka hriat loh avangin dar 5 rik khan ka thleng thla a, Damdawiin te ka tlawh a, a lo chhe khawp mai a, kum 1910-a bul tan tawh a lo ni a, ka zu tlawh chu ka lawm khawp mai. Tunah hian 13th Finance Commission-ah hianin post 30 kha kan Chief Minister kho khan siam a ni a, chutah chuan Damdawi In 15 sak that tur tih a ni a, zep thu a awm lova, a lo tel rih lova, amaherawhchu, tunah hian 4 vel chu kan ruahman chhin a ni a. NRHM atang ten tih dan a awm ang em tih kha hre lova, kan lo en zui dawn nia. Tin, House-a an sawi fo mai ka zu hmuh chian chu Gypsy tha tak anga ka lo ngaih chu a lo tha lo hle mai a, fiamthu in “nam lum daih rawh u” ka ti a, Department hotute nen kan lo en turah ngai ila.

Awle, Medical College, kan party manifesto-ah pawh a awm a, hma kan han la ve a Chief Minister zahawm tak hi Chairman a ni a, Board kan dinah kei hi Co-Chairman ka ni, sub-chairman te kan siam zel a, Medical Council of India-a an hotute pawh kan chah chhuak tawh a, referral saw an en an en a, a hmun chu tha an ti a, Medical Council of India-in Norms an neihah chuan hectres 25 hi pawm a ni a, saw saw chu 42 vel a ni a, a tha khawp mai a. Amaherawhchu kan Chief Minister-in Central Minister te pawh a hmu tawh thin a, Medical College atana pawisa sanction hi tlem a tim deuhna an nei ta niin min hrilh a, chumi avang chuan kan kal ve ngat ngat na

chungin, Chief Minister hian Central-a thiante a neih avangin kan han dah ve deuh a ni. Keini pawh kan han sawi a, mahse centralin norms hetiang an nei a nih chuanin EPP angin nge kan kal pui ang tih kan ngaihtuah a, kan Chief Minister ho a meeting neih tum mek chu kan hmachhawp mek a ni. Referral Hospital saw kan sawi tawh ang khan a tul khawp mai a tunah hianin medical re-imburement-ah hian sorkar hnathawk te hian vbc 50 kum tin provisional-ah hian an dah thin a, hemi Budget Provisional-ah hian, chu chu phailam a in refer na te leh he mi hospital a private-a hman hi a tam em em mai a. Tin, sorkar hnathawk lo te pawh phailamah kan in thawn chhuak nasa em em a, kan han chhut thuak thuak a, vaibelchhe za sawmnga bawr vel hi kumtin hian kan paih chhuak angin a lang a ni, chu chu theih tawpin kan han ti a, nichina ka sawi tak ang khan. Tunah pawh hian PWD-in nuai za sawmhnih vel (chu a referral enkawl mek tu tunah Health a la hand over a nih loh avangin, nuai za sawmhnih vel saw a zualpui zawh nan sawn) an ruahman a ni in ka hria a, chu chu ka'n sawi duh a ni.

Tin, Member zahawm tak, Pu Joseph Lalhimpuaia a zawhna kha thil serious a ni a, a rawn sawi te kha thudik fai vek a ni a. Pu Speaker, a tir bera i rawn sawi Isaia 58:12 ang kha a ni kan kal dan hi chu, "Nang chu a chhe lai siamtha tu, mi awmna tura mite kawhmuh tu" tih ang deuh kha a ni a. Tunah hi chuan Pathian zarah team tha kan siam in min set a, Health department-in hma kan sawn ngei ngei ang tih hi ka ring a, theih tawp rawn chhuah kan tum a ni tih kha ka'n sawi duh a. Tin, Member zahawm tak a zawhna neitu zawhna kha kum 2009 hma lama thil thleng inquiry nei a chhui tawh a ni a, keini chuanin hmalam pan a thil hlui ngaihtuah lem lova kal kha kan lo tih dan a nia, kan lo mang nghilh deuh hlek a ni e. Chu chu ka chhan theih na a ni e.

*Speech not corrected

SPEAKER : House Leader in sawi ve duh a nei em, i lo ko ang le.

Pu LAL THANHAWLA, CHIEF MINISTER : Pu Speaker, nimin a ka sawi ang kha a ni a, kan Legal process leh a Prosecution process hi a zawi khawp a, a buaithlak khawp mai a, chuvangin duh angin a kal chhak theih lohva. Rorelna tha, rorelna fel a awm kan duh a, chuti a nih dawn chuan a fello, dik lo, tha lo hai lan a siamthat a ngai a ni, chumi atan chuan kan Legal process hi kan in nghahna hi a ni mai a, mahse duh aiin a muang a, a buaithlak khawp mai, a harsa khawp mai. Chuvangin, kan chak hleithei lo a ni; amaherawhchu, kan Member zahawm tak, Pu Joseph Lalhimpuaia rawn sawi kha House Committee in a rawn phawrh tawh a, khatiang ang discrepancy leh irregularities kha a awm a ni tih kha kei ka lo bih chiang lo pek a. Kha kha a awm a nih chuan kan lo en chiang ang a, a tul chuan CBI pawh kan chhui tir mai ang, a tul angin, a chhan chu a diklo a awm a tih dik kan duh chuan a diklo leh a ti dik lo tu kha hriat a ngai. Tin, Pathian khawngaihna a zarah chutianga ang a ti thei tur chuan keiniho hi chu kan fihlim a ni.

Referral Hospital chungchang member zahawm tak Pu Lalduhoma rawn sawi kha a lawmawm ka ti a, hei hi kan mamawh ber pakhat a ni, amaherawhchu kan kal chak theih lohna chhan chu sum harsa hi a ni phawt a. Tin, an hlawh te a lo that lem loh avang te leh hmun dangah offer tha zawk te an hmuh avangin Super Specialist hi kan chelh rei thei lo a ni. Helai hi kan manganna a ni a, tuna kan neihchhunte pawh hian hmun tha zawkah, nuam zawkah hlawh sang zawkin facilities that zawknaah min kalsan ang tih hi kan hlau khawp mai a, kan thaw dep dep a ni. Chutiang chu kan dinhmun a ni a, kal chak a har khawp a. Tunah te pawh hian tu tute emaw chu kan recommend a, khawi khawi hospital tha deuh emaw Resident Doctor eng nge an tih kha? Khatiang chia kha engemaw thiamna an rawn neih theihna turin kan han recommend nual a. Mahse, anmahni kha an lo tlin ve a lo ngai a, Scheduled Tribe quota te kan han dil mek a, beiseiawm tak tak tur te an awm mai thei a ni. Chutiang chuan theihpatawpin tan lak a ngai a.

Tin, Medical College kha a establish nan hian Central khuan an rawn finance tawh lova. Chu chu kan harsatna a ni. Amaherawhchu, chuti chungin PPP mode te pawhin kan kal a tul ang tih kan ring a. Tin, a hmun hma tha han nei phawt ila kan ti a. Tichuan, a Team an lo kal a, Falkawn saw an en a. Minister zahawm takin a sawi tawh ang khan an lungawi hle a ni. Tha an ti a. Tichuan, a lo kal zinga an hotupa ber kha mi experienced deuh mai a ni a. Health Ministry-ah pawh thil ti thei tak a ni. Chumi chuan firm min kawhmuh a. Chumite chu DPR siam turin kan ti a. Kan CS hnenah initial expenditure-a an mamawh nuai 16 kha lo ngaihtuhsak turin ka ti a. Engtin nge an kal tak chiah ka hre lova kan CS hi tunah chuan a chawl a, a zin bo rih avangin. Engpawh ni se chutiang chuan kan lo kal tawh a. A hmun atan chuan Falkawn saw an earmark a ni. Tin, Medical College kan neih hunah khan hospital tha kan mamawh hrim hrim a. Chuvangin, tuna Referral Hospital tura kan hun hmasa lama kan lo ruahman tawh saw tunah hian Minister zahawm takin PWD te nen tangkawpin an cheitha mek a. Chumi hunah chuan Civil Hospital hi kan sawn phei dawn a ni. Tuna building te khi a tha lova, a min a hlauhawm a. Tin, Aizawl khawpui laili taka bawlhhlawh bawm lianpui hun reng hi sanitation zawng te pawhin a remchang lova. Chuvangin, kan sawn phei dawn a. 1998-ah khan chhonzawm phei ila chu kan sawn fel vek tawh tur a ni a. Mahse, kan chhonzawm tak loh avangin kan sawn thei lova. Chutiang chuan, Medical College kan neih theihna turin ruahmanna kan hotuten an siam a. Tuna Civil Hospital saw chu Trauma Centre-ah te, emergency leh maternity ward velah te, AYUSH atan te pawh thawl takin a hman theih dawn a. Chutiang chuan, ruahmanna kan nei rilru a ni.

Tin, Health care lamah hian kan chhe khawp a, India ramah hian a chhe ber pawl kan nih a rinawm a. Tin, a hnam zawng pawhin kan hrisel lo deuh ber niin a lang, ei leh in, zuk leh hmuam leh thil danga kan fimkhur loh avangin. Chuvangin, health care hi a pawimawh em avangin tunah pawh hian Central sorkar atanga kan sum hmuh hian a daih tha lo a nih pawhin PPP mode-in tunah hian min rawn offer hi an awm nek nek a hospital tha tak tak Delhi-a mi St. Stephen Hospital te leh tu tute emaw, chungte nen pawh chuan in tie-up in health care system hi nasa taka kan improve a tul avangin leh Zoram pawna sum vaibelchhe tel luang chhuak reng hi kan rama chelh din theihna turin tih a ngai a. Chutiang zawng chuan tunah hian kan hotuten mitmei an len mek a ni, tih hi House-ah ka'n sawi duh a ni.

SPEAKER : Awle, zawhna 113-naah kan kal thei tawhin ka hria, a zawt turin Pu P.P. Thawla i lo sawm ang.

Pu P.P. THAWLA : Pu Speaker Transport Department changtu Minister zahawm tak chhan atan ka Starred Question 113-na chu :-

- a) Kum 2010 April atanga kum 2011 March inkar Aizawl khawpui chhunga Parking Fee khawn tling khawm hi cheng engzatnge a nih theih?
- b) Enganga hman nge a nih? tih a ni e.

SPEAKER : A chhang turin a changtu Minister Pu P.C. Zoram Sangliana i lo sawm ang.

Pu P.C. ZORAM SANGLIANA, MINISTER : Pu Speaker, Member zahawm tak Pu P.P. Thawla zawhna :-

- a) kum 2010 April atanga kum 2011 March inkar Aizawl khawpui chhunga parking fee khawn tling zat chu ₹ 13,45000/- a ni.
- b) Enga hmannge anih chhanna chu Parking fee te hi Transport Department in fee hrang hrang a lak khawm zinga pakhat a ni a, Government Revenue ah chhun luh vek a ni.

SPEAKER : Zawhbelhna a awm dawnlo emaw ka tia, zawhbelhna Pu P.P. Thawla.

Pu P.P. THAWLA : Pu Speaker zawhbelhna - Parking Fee khawnna hi hmun engzatahng a awm? Khawiah te nge tih leh Transport Department hian Bill engzat vel chiah nge bat kan neih? Tih ka zawh belh e.

SPEAKER : Chhang turin Minister i lo ko ang.

Pu P.C. ZORAM SANGLIANA, MINISTER : Pu Speaker, parking fee tuna kan khawn mekna chu hmun 40-ah a ni a. An vai pawn a khawntu nen lam pawh kan sawi thei ang a, mahse hun a duh mai mai a, hmun 40-ah khawn mek a ni a. Tin, parking fee leh Transport Department leiba neih lam panga kha a inhlal deuh hlek avangin ka lo in ring tel lova. Kha kha chu ka chhang theilo ni sela, mahse memberin a mamawh a nih chuan thawhtan lamahte pawh kan demand la sawi tur a ni a, chungah te pawh chuan kan la sawifiah mai dawn nia.

SPEAKER : Tawk ti mai ang u, zawhbelhna a figure lo lang kha chu a har deuh tlat a nia, hrethiam ang. Tunah zawhna 114-na zawt turin Pu Lalduhoma i lo sawm ang.

Pu LALDUHOMA : Pu Speaker, Health & Family Welfare zahawm tak chhan atan ka zawhna :-

- a) NEIGHRIM Shillong-ah hian North East State ten seat engzatnge kan neih?
- b) Open seat engzatnge awm?
- c) Kan quota hi tihpun theih a ni em? tih a ni a, Pu Speaker, zawhbelhna ka zawt nghal mai dawn em ni?

SPEAKER : Zawt nghal mai rawh, hun a tlem tawh a.

Pu LALDUHOMA : Hun a tlem tawh a, Subject Committee-in NEIGHRIM hi kan zuk tlawh tawh a, a tha khawp mai a, a bulah khuan Mizoram Sorkarin Khualbuk te pawh neih ngei tur a ni kan ti a, ram te pawh kan han en nghal hial a. Hetah hian kan quota hi North East-ah hian a tlem ber a, pathum chauh niin ka hria a, population basis a an tih avangin kan tlem bik ta a. Central-in Family Planning ti rawh u min ti a, an thu kan awi a, kan titha a, an thu kan awi a, lehlamah min tuartir leh si a, chuvangin kan quota tipung tur hian kan Sorkar hian Centralah vawikhatmah a la nawrlo hrim hrim niin ka hria a, zuk nawr in tihpun dan hi a ngaihtuah thei ang em tih kha ka'n zawhbelh nghal mai ang e.

SPEAKER : A chhang turin Minister Pu Lalrinliana Sailo i lo sawm ang.

Pu LALRINLIANA SAILO, MINISTER : Pu Speaker, Member zahawmtak Pu Lalduhoma zawhna kha : a) NEIGHRIM, Shillong-ah hian North East State ten Seat engzatnge kan neih tih chhanna chu - NEIGHRIM, Shillong-ah hian North East State ten Seat 24 (sawmhnih pali) neih a ni a, hetiangin : Mizoram - 3 seats, Meghalaya - 9 seats, Nagaland - 8 seats, Arunachal Pradesh - 4 seats. b) chhanna chu – Open seat neih zat Department in a hre lo. c) Kan Quota hi tihpun theih a ni em tih hi sawi nghal vek ta ila, a chhanna, zawhbelhna a ni bawk a. Nikumah khan Medical College hrang hrang 41-ah kan zirlai ten an zir a ni a, chutiang chuan a hrang hrang kan nei a, 24 zawk a ni e, Doctor 41 in an zir zawk a nih chu. Tin, zawhna (b) chhanna hi kan chhanna chu a dik a, amaherawhchu han sawi belh atana tha chu a thlan leh hemi han tih hi kan kut a ni lo deuh hlek a, Higher and Technical Education kut a nih avangin helai hi kan lo chawl hahdam deuh hlek a ni.

Tin, Quota tihpun chungchangah pawh khan hma chutih tehchiamin kan la lova, a dik a, amaherawhchu 2009 khan Imphal-ah kan han kal a, RIMS-ah. Tahchuan, quota kan han Sorkar ve hma-a a tlem zawk avanga harsatna ka han sawi a, chuta an Principal leh Director nen kan ti ti a, hun thatak mai kan nei a. Ani pawhin tihdan tur min hrilh a, Court a an khin thu te min hrilh a, Court a an khinna kha ka duh ve ka ti a, phok tam tak mai hi min Xerox sak a, chutihlaia kan Secretary chu Chief Secretary kha a ni a, hma ila teh ang kan han ti a, a kutah khan a hre zawk a ni bawk a, a turah ka ngai a, kan dah a, hma kan la zui em em lova ni. Amaherawhchu, sawi ang khan Department 2 tih zawk mah hi a ni a, hemi Higher and Technical Education ina training tura course hi a

thlan a ni a, kan lai deuh chu a niin ka hria, mahse theihtawp chu kan lo chhuah ang e.

*Speech not corrected

SPEAKER : Le, a lawmawm e. Kan House Leader in NEIGHRIM lam a nih chuan amah te khan a zuk tlawh vek a, sawi chak a nei ang, i lo ko ang.

Pu LAL THAN HAWLA, CHIEF MINISTER : Kan hriatloh deuh kha ka'n sawifiah duh mai a ni, Pu Speaker. NEIGHRIM khu Mizo ten kan bawr leh tan tawh a, hnam hrisel lo kan ni ka tih tawh kha. Chuvangin, an harsatna chhawk kian nan a bul hnaiah khuan Khualbuk kan neih a tulin ka hria a, kan lo dil tawh a ni. Chutih lai chuan D.D. Lapang kha Chief Minister a ni a, tawngka pawhin ka bia a, kan lo zawng ang, kan lo dap ang a ti a. Amaherawhchu, an inthlak ta a, tunah khuan Chief Minister thar an nei a, Mukul Sangma, amah pawh Doctor, NEIGHRIM chhuak khi a ni a. Amaherawhchu, an sorkar khu hmannah Guwahati-a kan inhmuh pawhin ka'n remind-a, an sorkar khu a buk a buk mai a. Pi Sonia ina a tundin hram hram rih a ni a, chuvangin thildang tam tak an ngaihtuah thei lo a ni mai thei, engpawh nise kan lo dil tawh a, kan neih a tul a. Tin, Medical seat hi Union Minister hnenah kan ziak tawh a, hemi an seat tlem te pawh kan sawi tawh a, mahse, hemi an formula min han hrilhfiyah kha chuan, kan tlin loh avangin hnial vak ngaihna a awm hranpa lova, amaherawhchu, a special a min ngaihtuah sak a ngai a ni, chu erawhchu, a result ta zel kan hre ta lova, chu chu a awmdan ta zel a ni a, theihtawp chu kan chhuah a. Amaherawhchu, kan theihpatawp chhuah chu a beitham deuh a ni nge kan hre lova, kan la hlawhtling lo a ni, theih ang ang chuan kan zia kin, kan dil ve reng a ni.

Tin, Scholarship thlan lamah Engineer an ni emaw, Medical zir tur an ni emaw, tunhma khan corruption a tam lutuk a, department hrang hrang khan an ti a, overlapping kha atam em em mai a, sum kha a lo hek em em mai a, chuvangin kan centralise a, tunah chuan Higher & Technical Education Department kutah a awm a, a fel tawh deuhhlekk turah ngaih a ni.

SPEAKER : Kan zawhna leh chhanna a lo tawp ta a, wawiinniah hianin kan member absent an awm dawn lo emaw ka ti a, mahse, Pu K.Liantlinga hi a fanu pasal neih chungchangah wawiin leh naktuk a lo kal theih loh tur thu minrawn hrilh a, ani hi a lo tel lova, midang erawh kan kim a ni. Chawhnu lam leh engemawah te pawimawha han chhuah zeuh zeuhte a awm thin a, khangte kha in chhuak dawn a nih chuanin helai Chair te hi min han hrilh zel ulangin phal loh chi pawh a ni chuang lova, pawimawh na na na chu. Hei wawinah pawh Pu Lal Thanzara kal chhuah tulna a nei a, a remchan hun hunah a ni paw'n min chhuahsan anga, a tihtur te a zawh hunah a lokir leh mai dawn a ni.

Laying of papers hun kan lo hmang ang a, Pu Lalsawta Minister-in ni 15.7.2011 a lo chhuak Starred Question No. 141-na ballot no. 60-na Pu

B.Lalthlengliana zawhna - Technical zir tur lak chungchang tih dikna House-ah rawn lay sela, i lo sawm ang.

Pu LALSAWTA, MINISTER : Pu Speaker, i phalna leh House remtihna tahrik ni 15-a member zahawm tak Pu B.Lalthlengliana zawhna chhanna tih diklo hi tihdikna House-ah ka rawn lay e.

SPEAKER : A copy kha han sem rawh u le. Pu H. Liansailova, Minister zahawm takin ni 15.7.2011-a Plan fund hnuai Sorkar hnathawk chungchang tih dikna House dawhkanah rawn lay sela. I lo ko vang.

Pu H. LIANSILOVA, MINISTER : Pu Speaker, i phalna leh House remtihna in Dr. R. Lalthlengliana zawhna Unstarred Question chhanna Ballot no. 6 question no. 7 chhanna tihdikna he House zahawm takah hian ka rawn lay e.

SPEAKER : A copy kha han sem rawh u le.

Pu B. LALTHLENGLIANA : Pu Speaker, an sem laiin, heng tihdik loh correction siam hi tun tum Session-ah hian a tam em em a, tun hma khan a awm ngai silova, Sorkar hi a inthlahdah ta deuh em ni, department lamte pawh hi hrilh thar leh a va tha ve maw le. Member a zawttute tan pawh a hrilhhai thlak a, a changtu Minister tan pawh hian a hrilhhai thlak ve thova, churang chuan, kum 2 lai hun kan la neih hi chu felfai zawk a zawhna leh chhannate leh Bill hrim hrim te pawh hi a lo luh theihna tur hian Pu Speaker, i thuneihna i dinglam a thu mawhphurtute kha min hrilh sak leh la chuan a va tha awm ve maw le.

SPEAKER : Chu chu kan hriat tlan tur thil pawimawh tak a ni a, kan Minister ten Official te hnenah tha ti chak tura tan la tura in lo hrilh kan ngen a nih chu. Amaherawhchu, kan sawi tawh ang khan tun tum kan Session hi zawhna kha a rawn lut tlai ang reng a ti mai ila, Session koh dan a bichilh nge ka hre lova, bichilh lo turah ngai ta ila, khatih laiah kan Office lamin Department lamah an han thawn a Session kha a lo ni tawh a, Department lam pawh kha an hmanhmawh ve lutuk deuh pawh a ni mai thei a. Tun Session hnukung lampangah kha erawh chuan tihdik loh awm lo turah ngai ta ila, ni 15 hma lamte ni 15 vel lam te a ni deuh va, a hnu lamah chuan dik tawh turah i beisei phawt mai ang.

Tunah Financial Business, tun tum kan Session neih chhan ber pawimawh tak mai kan lo nei dawn ta a, tunah chuan Demand lamah kan kal tawh ang a. List of Business a a lan angina wawiin hi Minister 3-te demand kan la ang a, demand kan lak tawh hi wawiin ni angah hian zawh zel a ngaih avangin kan tan deuh hlek a tul dawn a ni. Minister 3-te demand hi a rualin

la nghal mai ila hun kan heh lo deuh ang a, a tha mai ti rawh u, la nghal ilangin. Tunah Pu Lalsawta, Minister zahawm takin a Demand No. 4, 12, 20 leh 21 te hi House-ah rawn submit se, i lo ko ang.

Pu LALSAWTA, MINISTER : Pu Speaker, on the recommendation of the Governor of Mizoram and with your permission Sir, I move the demand No. 4, 12, 20 and 21 for ₹ 534,94,22,000/- only for meeting expenses during 2011 – 2012 in respect of the following Departments:

- 1) Demand no. 4 - Law & Judicial – ₹ 13,31,94,000
- 2) Demand no. 12 – Parliamentary Affairs – ₹ 46,23,000
- 3) Demand no. 20 – School Education – ₹ 456,54,73,000
- 4) Demand no. 21 - Higher & Technical Education – ₹ 64,61,32,000

Ka lawm e.

SPEAKER : Tunah Pu Lalrinliana Sailo, Minister zahawm takin a Demand No. 24, 28, 44 te hi House-ah rawn submit sela. I lo sawm ang.

Pu LALRINLIANA SAILO, MINISTER : On the recommendation of the Governor of Mizoram and with your permission Sir, I move Demand No. 24, 28 and 44 for ₹ 193,81,88,000 for meeting expenses during 2011 – 2012 in respect of the following Department:

- 1) Demand No. 24 – Medical & Public Health Services – ₹ 182,80,86,000.
 - 2) Demand No. 28 - Labour & Employment – ₹ 6,70,02,000
 - 3) Demand No. 44 – Trade & Commerce – ₹ 4,31,00,000
- Total – ₹ 193,81,88,000. only. Thank You.

Pu LALDUHOMA : Lo hmu deuh tu an awm a nih hmel hle in ka hria.

SPEAKER : Keimak zawk kha min lo en a ni mai thei, ti lai ka lo thlir lai hi, ka tarmit atangin a hmu a ni mai thei ani. Pu Nihar Kanti Minister zahawm takin a demand number, 30, 34, 41 te hi House-ah rawn submit turin i lo sawm ang.

Pu NIHAR KANTI, MINISTER : Pu Speaker, on the recommendation of the Governor of Mizoram, and with your permission, Sir, I move the Demand No. 30, 34, and 41 for ₹ 1,43,95,08,000/- only for meeting expenses during 2011-2012, in respect of the following Department:-
Demand No 30, Disaster Management & Rehabilitation Department ₹ 15,67,85,000/-
Demand No 34, Animal Husbandry & Veterinary Department ₹ 117,14,33,000/- and
Demand No 41, Sericulture Department ₹ 11,12,90,000/- Total ₹ 143,95,08,000/- ka lawm e.

SPEAKER : Le, kan Minister pathum ten an demand theuh House-ah an rawn submit ta a, a copy kha kan nei theuh tawh bawk a, Buletin Part-11 No 166, ni 15/7/2011 kan rawn chhuah tawh a, kan sawi ho ang a, Minister pathum khan an wind up kha a ngai dawn a ni a, sawi ho zawhah khanin, kha kha hrereng ilang in Minutes 10 diat diat ti ang aw, a tha mai ti raw u. Tunge sawi hmasa dawn le! In ngawi vung vung a tlai lamah hian in tlailam um pawng par leh vak ang e. Pu Lalrinawma i lo sawm ang.

Pu R. LALRINAWMA : Pu Speaker, ka lawm e. Bul kan tan ange. Demand No 4, Law and Judicial-ah hian sawi duh kan neih chu, tun Ministry in dan lama rorel na a ngaih pawimawh zia hi sawi lan a tha in ka hria a, hei Separation of Judiciary te a takin tih puitlin a ni a, thawk tute engemaw zat lak belh an ni a, tin, a thawksa mek te pawh kaisan tir te an ni a, Mizo nula tlangval dan thiam rual sawm chuang teh meuh he sorkar tharah hian lak thar an ni tawh a. Pu Speaker, i hriat ang in Democracy ram kan ni a, Three Pillars-democracy-a lungthu pathum, hemi hi sorkar kan tih hi a ni a, chutah chuan Legislature, Executive leh Judiciary te an ni a, he thuangthum hi tluang taka a kal chhoh a, an thuneihna huang chhungah, chutiang chuan legislature chuan hei Pu Speaker i hriat angin hmun tha tak kan nei a. Tin, Executive te pawn Secretariat tha tak tak te neiin minister te pawn office tha tak te an nei a. Chutihlai chuan Judiciary hi, kan Judiciary-a sang ber rorelna sang ber High Court hi khawpui daifemah a awm a. Chuvang chuan hei hi a diklo a ni. He lungthu pathumah hian chanvo chhe bik kha a awm a ni tiin hmun laili leh a pan awlsam te leh kan ram hmasawna tur leh changkanna tur te pawhin High Court hmun tur hi hun rei tawh tak atangin khawpui laili lai hi melh a ni thin a.

He sorkar chak tak hian kan House Leader leh kan Law Minister te thahnemngaihna in sorkar hmasa lama Raj Bhavan tura an lo ruahman, amaherawhchu remchang silo, Raj Bhavan te hi Pu Speaker, Assembly nena inhlat chi a ni lova. State tinah kan hria a, tin, security reason-ah pawh Raj Bhavan tura ruahmana saw chu tuna New Secretariat Complex ami saw, a remchang lo em em a. Chumi hmuna chu he Ministry din hnu reiloteah High Court kuta pek fel niin ka hria a. An pek mek lai khan Secretariat khu indaih lohna avangin he Raj Bhavan tura ruahman hi Secretariat tura tan chei a ni a.

Amaherawhchu High Court atana pek an nih takah khan an chei pawh chu an chhonzawm ta lova, tichuan High Court tur atana pek a ni ta a. Vawiin thlengin engmah chhonzawm a la ni lova, tikhuan a awm reng ringawt mai a. Hei hi State sorkar tih tur nge ni a, High Court lam hma rawn lak tur? Secretariat in room te an indaihlohna avangin luah an duh em em, High Court kuta pek a nih tak si avangin an chei chhonzawm thei lova. Chutih laiin High Court lamin an rawn ngaihven bawk silova, Building tha tak pawh hi a ruaka a awm reng chuanin engemaw chhe chho mai thei a ni a. Chuvang chuan chak zawka hmala tur leh a luah tur zawk zawkin a rang lama hmalak a tha mang e tih kha kan sawi lang duh a. Tin, he ministry-ah bawk, mitinin a dikna leh chanvo an hmuh theih nan, awlsam zawka dan rorelna te an chan ve theih nan thingtlang court hlatna hmunah te Village Court din na turin Gram Nayalayas Act kha Mizoramah adopt a ni ve ta a. He House zahawm takah hian, chung ang chuan department pawhin hma an la chhova, Reiek leh E. Lungdarah 2010-2011 chhunga din tur angin tih a ni a. Vawiin thlengin din ala ni lovin ka hria a, henge pawh hi 2010-2011-ah khan plan-ah khan nuai 107.52 hi dah a ni a. Tun 2011-

2012 ah hian dah a awm leh ta mang lova, khang ang din kha ala awm leh ta mang bawk silova, kha lo dah sa kha hman chhoh mai tur nge tih hi ka hrethiam chiah lova. Hengte hi din chhoh ni sela, thingtlang Court pan harsa zawkte tana tangkai tak tur a ni a. Chu chu ka'n sawi lang duh bawk a.

Tin, hei nichin lawkah pawh Question Hour-ah kan sawi lang a. Kan House Leader zahawm takin dan rorelna a ngai pawimawh a. Dan chuan ama kawng a zawh tur a ni (The law shall take its own course), te a ti thin a. Chutiang chuan danin a kawng a zawh theih nan infrastructure te he Ministry hian a ti phuisui chho a. A thawktu lak belh lam te. Chutih rual rual chuan Pu Speaker, Court lama rorelna te duhthu samin a kal chak lo han tih nawk nawk te pawh a awm thin a. Amaherawhchu, sawi tawh ang khan Separation of Judiciary te a taka kalpui a han ni a. Court-te pawh an inbun fel chho mek a. Transitional period-ah kan awm a. Civil case-ah phei chuan thuneihna khatianga invuah thar chhoh te a han nihah khan Court-ah pending te tunah hian a tam em em mai a. Chu chu a chhan pakhat a niin ka hria a.

Tin, a chhan dang lehah chuan khami court a thubuai va buaipui tur sorkar ukil, Govt. Advocate kan tih te, tin, Criminal Case-ah Public Prosecutor kan tih te, heng te hi an lawmman, an fee hi, Pu Speaker, a beitham em em mai a. 2000 kuma bithliah kha a ni a. Chu chu tihsan hi a hun tawh hle mai a. Heng te pawh hi nikum 2010-11 ah khan professional service atan hian Nuai 50 dah a ni a. Kumin 2011-12 ah hian Nuai 91 leh sing nga a lo lang a. Heng te hi tihsan theihna tur a ni dawn em? A lawmawm in ka hria, hetianga a rawn sang hi. Kum 2000 a mi Pay te pawh vawi engngemaw zat revise a ni tawh a. Chutih lai chuan sorkar ukil te leh Govt. Advocate te leh Public Prosecutor te fee hi tihsan a hun a ni. Tin, sorkarin a thawh that em em, thubuai nei si, ukil rawihna nei lo te, Legal Aid a tanpuina te leh, thubuai hi Pu Speaker, misual chauhin an nei lo a nia. Thubuai ka nei dawn lo, tih ngawt theih a ni lova, min min tihbuai miao chuan thubuai kan nei a ni thei a. Chuvang chuan tu te pawhin Court thubuai hi neih theih a ni a, khanga thubuai nei a ukil ruai thei si lo te sorkarin a rawih sak thin, legal aid, kan tih te, tin, Criminal case lamah Defence Lawyer te a rawih sak a, a lo defence turin. Chu chu danin a phut vek a ni a. Heng a Defence fee te, Legal Aid fee te hi a tlem lutuk a. Heng hian Court-a rorelna pawh hi nasa takin a nghawng thei a ni. Phur tak leh tha taka an thawh theihna tur chuan tunlai khawsak harsa leh thil man to tawhah heng ang te pawh hi tihsan a hun tawh hle a ni tih kha ka'n sawi lang duh a.

Demand dangah ka'n kai tawh mai ang e, Pu Speaker. Demand No. 20-na, School Education – he sorkar tharah hian hmalakna a nasa em em mai a. Hei change a thleng nasa a. Education Reforms Commission te dinin zirna siamthat tumin, Right of Children to Free and Compulsory Education Act-te implement chhoh a niin, thil thar tam tak a awm a, vawiin nia buai nuai ang a kan han hriat te pawh hi, a lehlamah chuan result-ah zaa za pass na school tam tak a awm chho te pawh hi, he department pawh hian hma a sawn chho hle a. Chutih rual chuan mid-day meal tihte, SSA, RMSA tihah te tha tak a kalpui chhoh a ni a. A lehlamah department lian leh mihring enkawl an ni a, duhthusam a fel fai thlap ni thin lo mah sela hma lakna hi chu hengahte hian a nasa em em a ni tih ka'n sawi duh a.

Tin, Demand No. 24-na, Medical & Public Health Services, health infrastructure set up lamah te hian hma lak a nasa hle mai a. Rural area lama health service lamah te, tin, hospital medical education tihah, health clinic tihte, PHC

building tih changtlun chhohah te hma lak a nasa hle mai a. Ka bial chhung Zemabawk North-ah Health Clinic Centre min dah sak a ka lawm hle mai, chutih rual chuan mihring kan pung zel a Sihphir Vengtharah te khian Health Sub-Centre Sihphir khaw hnih khian kan intawm a ni a, Health Centre te min dah sak ve thei se. Tin, Maternity Centre emaw sawlam bial leh sawlam rawn paltlang ho hian, sawlamah sawn Maternity Centre hi kan duh ve hle a ni tihte kha Pu Speaker, hman hmawh takin kan sawi lang a ni. Ka lawm e.

Pu B. LALTHLENGLIANA : Pu Speaker, ka lawm e. Demand No. 20-na leh 21-na hi kan sawi pawlh zawr zawr ang a. Tlem lai deuh khan Mizoram Scholarship Board hi a hran a ding tur a sawi kha a ni a. Chu chuan technical zir tur, department hrang hrang a technical department a mi ten anmahnia scholarship an pek thin kha he Scholarship Board hian post matric scholarship te leh research scholar nena a bul tum tawh tura ruahmanna kha awmin ka hria a. Amaherawhchu budget-ah khan ka en ngun lo nge ni, ka hmu zo ta lova. Kha kha tih tumna a awm leh ta lo nge ni ka hre lova. A tira ruahman ang khan tihpuitlin theih ngei ni sela chuan kan ram tan a that viau ka ring a. Kan C.M. zahawm tak pawh khalaiah khan a interest a ni tih ka hria a. Kha kha ka hmuh zawh loh takah chuan engatinge tih kha ka'n sawi lang zawk duh a.

Tin, a pahnhnaah, chuan RMSA leh SSA hna lak dik lo lutuk kha kan sawi fo a, a ni lah tak a. Entirman, mark hmu sang berin mark 80 a hmu a, chumi tluk thuk mark hmu te la lova, mark 32 hmu te an lak daih lai kha a tam lutuk a, Pu Speaker. Hei Serchhipah ringawt pawh hian a hmu sang berin mark 84 a hmu a, a hmu hniam berin 32, chu chu thlan an ni. Chutih lai chuan mark 42 hmute kha thlan an ni lawi lova. Tin, Kolasibah pheh chuan a dik lo hi a nasa em em mai a, a hmu sang berin mark 74 a hmuh laiin, mark 74 hmu te, mark 70 hmu te, mark 62 hmu te, mark 61 hmu te kha lak an ni leh chuang si lova. Khatiang ang hna lak kha kan hre teuh a, a dik loh zia tlang hriat a ni. Tun chinah chuan khatiang lutuk kha ni tawh lo se ka duh a. Heng hnalak verification finding report han en hian a tawp lutuk a ni. Hetiang em em hi chu kal dan tur niin ka hrelo a, chung chu Pu Speaker, a tawi zawngin kan sawi duh a.

Tin, niminah khan kan Minister zahawm tak khan SSA hnuaia building sak, class room sak kha a sawi a, sak mek a awm a, sak zawh tawh a awm a. Sa zo tawha kan in ngaih laiin Lunglei District ah 10 lai mai sak loh a lo awm der mai a, tih lai kha, engatinge, DEO, SDO hmun tinah kan dah a, Circle Education officer kan dah teuh a, chung ho chuan an mahni bial theuh a mi kha an hrechiang lo em ni? Statistics fel tak neiin hma an la lo em ni? Engatinge sa zo tawh a an inhriat laia, Govt. School sawm lai mai sak loh la awm thei te kha, department emaw, Minister emaw, deficiency a ni thei mai lawm ni? Thil ni theia a lanna chu Pu Speaker, SSA scheme hman a nih khan inspecting staff zawng zawng te SSA lamah hman tangkai niin a lang a, chung avang chuan inspecting staff te hian an bial chhunga school awmdan hi an hre lo em em niin a lang a, building chhiat dan te, naupang awmdan te hi an hrelo em em a ni. Bialtu MLA te hian mahni bial chhung a mite hi chu kan hre fe zawka. Amaherawhchu niminah Minister zahawm tak khan SSA leh RMSA a thawk tu tur teaching staff leh non- teaching staff te lak an ni tawh a, hetiang lak a nih chuan inspecting staff ho kha an hna ngaiha kir leh vek rawh se. School zawng zawng hi ngun takin inspect sela naupang leh zirtirtu ratio te pawh chiang sela, chuta tang

chuan recommendation rawn siam sela, sorkar hian school pakhat a zirtirtu awm tlurh, a lehlama pakhat chauh, chu pawh chu qualify nilo teacher awm te hi siam rem ran ni sela. RMSA teacher lak chungchang posting-ah hian, entirnan Saitual school-ah chuan zirlai 56 an awm a, zirtirtu 8 an awm sa a, RMSA zirtirtu 7 han pek belh ngawt mai te kha eng hisap hmang hian nge ni khang kha tih a nih?. A lehlamah High School-ah zirtirtu indaihlo em em an awm bawk si a, transfer and posting an tih lai khan Mizoram sikul din hmun hi an chiang lo viau em ni? An duh lai laiah duh zat zat hi an dah tawp tawp mai em ni. Heng te hi kan kalphung tur a ni dawn em ni? Education Minister in thil tha a duh a, Commission-te a din a, Expert Committee ten an thlir a, chumi dung zui chuan hma lak chhoh mek a ni a, khang khan awmzia a nei ta lo em ni. Kan kal dan han thlir hian a va buaithlak em em ve, tih lai kha Pu Speaker ka sawi duh a. Hei RMSA zirtirtu lakah phei chuan Mathematics teacher-ah 23 thlan a ni a, advertisement a qualification an ziak ang nilo zirtirtu 12 qualify loh lak a awm a, English-ah hian 23 select an ni a chumi zinga 2 chu qualify lo an ni.

Tin, Laboratory Attendanah hian 222 lakah hian Kolasib District-a mi Matric chunglam an ni tur a ni tih a nih laiin matric hnuailam lak an awm a, khatiang te te khan thil diklo, fello, engemaw tia fel mai tur a awm a, amaherawhchu, department lam hian an enchiang lo nge ni a required qualification an ziak kha tun dinhmunah kan ram tana thil harsa ve tak engemawzat a awm a, khatiang ang khan an kal leh thei si lova, chu chuan dik lohna hi a rawn thlen ni te pawh hian a hriat a, kha kha kan kal zelna turah uluk ila a thain ka hria a.

Pu Speaker, lumpsum grant chungchang nimirah Minister zahawm takin a sawi tawh a, kum khat dawn lai an hmu tawh lova, ngaihtuah ran sak theih ni sela a thain ka ring a. Tin, Elementary School te SSA in a la ang hian High School-te, Higher Secondary School-te hi a thawktu lo awm sa te an qualify a nih chuan ban lovin RMSA teacher-ah hian rin nghal ni thei sela chuan ava lawmawmin ava finthlak dawn em tih kha ka sawi duh a. Chutih lai chuan M.P. High School, New Zokhawtharah khian zirtirtu hun rei tak lo thawk zawng zawng an ban a, RMSA teacher-in an thlak tawp mai a, nupui fanau chawma eizawn nana lo hmang tawh khatiang a han tih tawp mai kha qualify lo an nih chuan ka hrethiam a, qualify an nih chuan ban kher lova rin nghal kha kan ram rorelnaah hian kan tih tur a ni dawn lawm ni. Dikna hi luipui angin luang se tih thupuiah kan hmang a, dikna luipui anga luang lo lutuk a kal hi ram rorelna kal zelna a tha dawn em ni tih ka rawn sawi duh a.

Tin, Deficit Middle School, Mission School, deficit ho harsatna hi nimirah lamah ka sawi tawh na a kan Minister zahawm tak hian ngaihtuah sak hram thei sela tih kha ka'n ngenpui duh a. Tin, adhoc aided Middle, High School leh Higher School te dinhmun hi ensak ve sela.

Tin, Pu Speaker, Health Department-ah chawhma lamah khan Minister zahawm tak leh Chief Minister zahawm tak khan an sawi tawh a, Referral Hospital Medical College-a hman tur chungchang te, tin, Aizawl Civil Hospital Referral a sawn tur chungchang kha kan ngaithla tawh a, kha kha chu ka sawi thui lovang a. Amaherawhchu Pu Speaker, emergency purchase tia Damdawiin a damdawi mamawh vawiin thlenga tender mumal chhuah lova lei hi a tha lo hlein ka hria a, chu chu a that lohzia tilang chiang tu chu, Pu Speaker, han en la paracetamol a ni, hei hi chutianga an lei chu a ni a, han en ila a mawngah hian thil hlawm lian pui pui a awm a tur nge ni engnge ni a hriat loh, hei hi damlo ten ei sela an thihpui angem, thihpui ta sela tunge

mawhpur dawn? Health Minister hian a mawh a phur dawn lawm ni? Chuvang chuan hetiang damdawi tender mumal tak chhuah lova duhsak zawng damdawi zuartute lei tir leh ringawt maia kum 3 deuh thaw kal hi a fello in ka hria a, tun chinah chuan kan Minister hi fimkhur deuh hlek tawh sela a thain ka hria.

A tawp nan Pu Speaker, building sak chungchangah hian a satu hming a work order an pek hi Lalhmangaihzuala Upper Republic, kum 23 mi a ni. Hei hi RTI a kan zawh chuan departmental a sak a ni tih a ni a, amaherawhchu department lamin chutiang chu an hre miah si lova. Chutihlai chuan Minister zahawm tak hian quality hi ka duh avangin PWD lam quality control lam hi ka rin zawh loh avangin keimahin tuktin ka va en thin a, a ti a. Kan hriat leh zel dan chuan labour hlawh te leh thil dang hi amahin a va pe thin niawm tak a ni. Estimate Amount hi cheng nuai 244.2 a ni a. Engatinge PWD norms-ah khan S.E. power a awm a, E.E. power a awm a, nuai 244 hi engtin nge tianga an tih mai theih? Departmental kan tih hi mimal te pawh a lo ni mai lo maw? Chu chu tha ka ti lova, departmental anih chuan department-in la sela, department hotuten mawh phur sela a thain ka ring a. Chu chu kan sawilang zawk duh a.

Tin, Pu Speaker, khawngaihtakin. Labour & Employment-ah hian Youth Commission hi dah a ni tlat mai hi thil inhmeah lo tak niin ka hria. Sport-ah hian Youth & Services tih kan la nei a, Youth Services sport-in a enkawl lai hian a tira a awm ang khan Youth Commission hi la bet sela chuanin Mizoram thalaite hian nasa takin hma kan sawn pui mai awm mange. Tin, tunah hian Commission Chairman leh a thawhpuite kan siam a. Keini hun lai kha chuan a changtu Minister hi an chair nghal mai a. Hetianga Minister changtu hman lova mi dang lak hi sum tih hekna mai mai niin a lang.

Tin, Pu Speaker, Poly-Tarpoulin leiah hian tender chhuah chungchangah buaina a awm reng a. Chumi avang chuan lei hleih theih lovin a awm reng emaw tih laiin Chief Minister duhsak tak farm chu a hmunah ka zuk kal a, 5000 silpaulin than lai mai pek a lo ni a, a roll-in a lo thleng a. Chu chu an duh ang size-in an siam mai a ni. A tlang thuina a awm a, a hole siamna a awm a, a tuamna te chu a awm ve vek a. Kha kha industry a ni lo. Entirnan, Pu R.C. Khuma dawr saw industry ang chuan kan sawi ngai lo. Puanthan vai ram atangin a la a, kawr etc. atan a thui a, chutiang deuh chu a ni. Chuvangchuan, Minister hi Silpaulin kan dil thin a, a mangang em em a, min pek a duh a, min pek tur a nei mang thin si lova. Duhsak luat kan neih avang leh thil khawtlai thin leh fello awm thin hi a dikin ka hre lova. Term hmasa lamah Silpauline lei chungchangah helaiah a dik nge diklo ka hre lova, a pan tak an rawn la lut a. Tuna i dinglama thute hian an pawt thler a ni. Khatiang deuh chiah kha tuna supply tir tum hi niin a lang. Hei hi chu a rang thei ang bera tihdanglam ni sela a thain ka hria a. Minister, kan manganna kan sawiin min pe thin a kan lawm khawp mai.

Tin, Sericulture-ah kum dang aia an Plan budget lo tlahniam duai mai kha R.E. ah tal kan Finance Minister-te leh kan Planning Minister-te hian pekbelh thei sela, hei hi immediate-a kuthnathawktute kumkhat chhunga kan intodelh theihna a nih avangin min ngaihpawimawh sak thei se. Ka lawm e.

SPEAKER : Tunah Pu T.T. Zothansanga. Thu awih deuh hlek ang u.

Pu T.T. ZOTHANSANGA : Pu Speaker ka lawm e. Hei demand 10 kan nei a, kan sawi hman loh takin a tawplam atangin ka rawn lehkhai teh ang kei chu. Hei Unstarred Question-ah khanin Sericulture-a zawhna beneficiary list-te kan dil a. Tin, a thawktute designation te ka'n dil a, tha deuhin min rawn pe a, ka lawm khawp a. Khata chhanna min rawn pek atang khanin ka sawi hmasa duh a ni a. 1972 U.T. kan han nih chhoh atangte, he department hi an awm chho ve char char a, 1985 chhoah te, tikhanin an han thang chho a. Amaherawhchu, hei nikum leh nikum hmasa kan han en ringawt pawh hian beneficiary hi a slow down tlat mai a, pawl ka ti a. Vai nu in sari an kaih chung hi chuan a pawimawh reng ringawt mai dawn a ni. Hman niah ka sawi tawh a, fiamthu. Vai nute chuan an duhtusam berah chuan ka damchung hian muga pakhat sari hi chu nei ila aw tih hi an dream ber a ni ka ti a. Muga sari tak phei hi chu pakhat hi singkhat sanga aiin a tlawm theilo reng reng tunah hian. Khatiang kha a ni a, Zoram hian kan tharchhuak thei a, kha kan tharchhuah a kha a market a tha, sorkar tih buai a ngai lova. "Hotute hnenah min sawipui rawh u" tih a ngai baw si lova. Chuvang chuan Sericulture a kan hotutena an thiamna leh finna, an theih tawp an chhuah naah hian tang leh zual sela, mipuia pawh awareness ti leh zual ila, hemi kan ram ina kan thil tharchhuah zingah chuan a tha ber mai awm mange tih kha kan sawi a. Tin, Subject Committee lamah ka Chairman na hnuaiah a awm hlauh mai a, a department lam te pawh enpui chu ka lo la tum tho ang a. Chu chu kan sawi hmasa duh a.

Tin, a letlingin ka kal dawn ka tih kha. Hei NLUP-ah hian Vety. thlangtu hi kan thahnem khawp mai a. Kan Vety. hi hmun tam takah hian tihchangtlun hi a tulin ka hria a. Ranvulhna area kan ni a, Mizote chu ranvulh a eizawng lem lo tan pawh kan han indan chuan ar pahnih khat tal, vawk pahnih khat tal vulh hnam kha kan ni a. Tunah hianin ka hriatsual loh chuan VFA Field Worker hi 37 zet hi dah khah loh niin ka hria a. Khing Champhai leh a chhehvelah te pawh kan mamawh nasa khawp mai a. Ka zuk zawt thin a kan hotute, DP&AR lamah harsatna kan nei thin a, Finance lamah a tlang lo thin a ni an ti a. He kan ramah hian ran lamah intodelh kan tum a, ran atangin intodelhna tih chhoh leh zel kan tum si a. Khalai karah khan ran hri te a leng a, vawileh khata thi puk puk thei a lo ni baw si a. Khalaia a vengtu tur kan siam kha chu a ngai a ni. Ramah mipui tam tak an awm a, a venghimtu tur sipai an tul ang chiah hianin ran kan vulh naah pawh hian a vengtu tur VFA emaw hemi Doctor chin thleng pawh hian kan sorkar hianin rilru nei chho se a tha in ka hria a.

Tin, sa thianghlim ei chungchangah hianin hei Mizote chuan "naktuk chu ka vawk kan khawng thlu mai teh ang" ti a. Khawlaiah a remchang chang kawnah vawk khawng thlu mai hnam kan ni a. Helaiiah pawh hian vai ram ang deuh hlekin a certificate te nen a mumal taka talh a, sa thianghlim a ni, sa hrisel a ni tih a verify theih ang zawng a kan kal hi a tul tawh mang e aw ka ti. Tunhmain zial hi a khu hi a tha lo em mai, ka ning kan ti thin a. Amaherawh chu, tun hunah chuan a hriselna zawngin miin kan en tawh a ni. Chutiang chuan sa pawh hi tunhma chuan tui kan ti a, a peih apiangin an tih hi hriselna lamah khan alo fimkhur vek loh theih. Khalaiah khan ka rilru an kal thui deuh hlek baw a. Hei, Vety Doctor te hian non-practicing allowance hi an la em tih hi ka hre lova. An la lo a nih phei chuan khatiang sa talh tur kha han buaipui tel zar zar se, han la tel baw se a awm tho in ka hria a, kan sawilang

tel hram a ni. Tin, ka bialchhung Rabung bialah khian Zawlnghak ram tha deuh mai kan nei a, hman atangin Rabung mipuiten phal takin sorkar tan an lo pe tawh a ni. Hei tuna kan kal dan zela kan kal a nih hi chuan kan faten sava hming pawh an hre tawh lo a, kan ran vulh ngei ngei sial pawh hi hmuh tur an nei tawh mang lo a ni. Chuvangin khilailah khian ram tha deuh mai sial awmna huang Rabung hmun a an lo siam, Zawlnghak ram khi tih puitlin leh tha khawpin ka hria a. Nakinah chuan kan tu leh kan faten a picnic ang zawng leh excursion ang zawng va kal te pawh an la duh dawn a. Khimi khi a puitlin chuan a tha viau dawn in kan ring a. Sial hre lo, la hmu ngai lo pawh hi kan tam tawh a, khilailah Rabung hotuten phal taka min lo pek khi a ti puitling zawnga hmalak tha ka ti a, nikum khan vety-a kan hotute te nen ke in kan han kal a, a ram a thui bawk a kan hah khawp mai a, chuvangin ti changlung zel turin hmalak tha kan ti a ni.

Tin, Higher and Technical chungchangah hian Champhai khawpui chungah a District Level ang pawh ni sela, Higher Secondary School pakhat chiah kan nei a zirlai 600 chuang kan nei a, pakhat tal min din sak leh sela hun lokal turah ka duh khawp mai. Champhai khi tih changtlun kan tuma, ₹ 9.51 crore DoNER atangin kan dawng dawn a, a hma hruai ₹ 3.41 kan dawng tawh a ni, khing feed tur khian Higher Secondary School pakhat dang neih belh leh ngei ngei a tul ka ti a, ka'n rawt bawk ni sela.

Tin, Health Department-ah khan, NEIGHRIMS chungchangah hian Khualbuk sak kha ka resolution-ah a tel a, mahse a chhuak dawn lo hlauh mai a, a pawl ka ti a, nitin 70 vel Mizo kan in entir tawh a ni a, harsatna kan tawh tawh a, chuvangin rilru kan pek a tha tawh in ka hria a ni. Chutih rualin thi kher tur hian Aizawl hi kan pan emaw ni chu, ka ti a, kan pan nasa. Champhai Hospital-ah va kal ila a tam zawk chu Aizawlah refer kan ni, hreawm ka ti khawp mai. Doctor hi engati nge kan indaih loh em em? tunah private Doctor 60 Sorkara lut duh kan awmin ka hria a, Sorkarin a engage mai theih loh avangin private-ah an kal kual a. Chuvangin a hna pe zawng ang hian kan Sorkarin hma la thei se ka duh khawp mai a, Champhai khawchhunga Hmeichhe lam Doctor kan nei lo te khi a lungchhiat thlak khawp, mipui tan leh bialtu tan pawh a tha lova, thlakhatah mi 80 te an piang ve a, Doctor thiam awm si lo, an kumkuruh te kha kau lo se chuan raicheh a thih a ni ringawt mai a ni. Champhaiah hian hmeichhe lam Doctor hi min theh chhuah ve thei lawm ni.

Tin, Rabungah khian PHC tun hma atang khan kan nei tawh a, thla hnih vel Doctor hmel kha an han hmu a 2007 khan, chubak chu a Doctor hmel hi an hmu tawh ngai lo reng reng a ni. Rabung a mihring nung 1800 awmnaah khian Doctor min pek ve theih hi ka duh khawp mai a, appointment nghet kan neih theihna tur hi zawn a hun ta in ka hria. Farkawn te pawh Doctor an nei lova khatiang chi te, khawtinah Doctor pakhat tal neih theih dan hi chu min zawn sak teh u. Pu Speaker ka lawm e.

Pu LALTHANSANGA : Law and Judicial-a Demand No. 4-naah hian, kan Deputy Secretary hi vawiinniah hian resignation te pe in a nihna atang hianin a chawl tih te a awm a, chu chu eng Department-ah nge absorb a nih tak tih a kha a hmasain ka'n ti duh a.

Tin, material lei chungchangah hian High Court phalna hi an la deuh kher mai a enge maw ni a chhan aw, 13th Commission in a an tihah hian Chief Secretary hova Committee khan kha kha a hriatpui kha chuan High Court-ah khan ngai chiah khanin a lang lova, mahse kha kha an han la kher a kha engnge maw ni a chhan aw tih kha min hrilh Chiang thei sela. Tin, chubakah hetilalah hian Pu Speaker, a hming te pawh han sawi mai ila Pu K.L Liana article ziah avang hianin High Court khan an rawn khak deuh va, tunhma pawh khan a ziak fo mai thin a, hei hi Separation of Judiciary vang hi emaw ni aw tih kha rilruah a awm deuhva. Engati nge hetiang anga an rawn tih mai tih laia hi rilruah a awm deuh hlek a, tin, kan Law Department pawh hian post te pawh hi an create viau a, Ram Nalayanayan te pawh hi an han ti a, East Lungdarah te pawh ti turin panga an thlang a, chung bakah chuan panga tih belh leh tur a ni a. Hemiah hian engnge achievement kha a awm chhoh dan tih kha Pu Speaker, ka'n hre duh deuh bawk a.

Tin, hei Parliamentary Affairs-ah hian lekha hi a rawn kal hlawl mai a Demand No. 12-naah khan hei hi 18.11.2010-ah khan a ni a, Assurance Committee Chairman an rawn address a, hemiah hianin Assurance reng reng hi Parliamentary Affairs Department kaltlangin ti tur a tih na hi Executive Order hi kan han hmu daih mai a. Mahse, hei hianin keimahni Assembly internal working system hi a rawn kalh deuh tlat mai in a langa, chutih laiah chuan keimahni internal working system a tih buai deuh avang hianin Pu Speaker, i phalna angin hei hi enge an rawn tihna hi a chhan aw ka han ti deuh a, hemi keimahni assurance rules-a kan hman danah hianin a 10-naah hianin 'After the committee has approved the assurance they shall be forwarded to the Department of the Government concerned with the committee observation', tih a ni a. A 11-naah hian 'The Secretary of the Department Head of the Government shall communicate to the Secretary Legislative Assembly. The action taken on the assurance and the extension which has actually being implemented', tih hian a rawn dah avang hianin hemi a hi kan Parliamentary Affairs Minister hianin min han hrilh Chiang bawk se tih a kha hetilai Demand No. 12-naah hian ka'n sawi duh a.

Tin, Education chungchang kha chu nimirah te kan ngaitla a, August thla chhung hi chuan beiseina sang tak nen kan lo thlir dawn a ni a. Tin, Rationalization a hi hman te kan han ti dawn a. Hei, kan sikul teachers lak leh engemaw hemi lak hian nimirah chanchinbuah pawh a rawn lang nasa viau mai a, a hma ami te pawh khan an rawn sawi tawh a. Hemi chungchangah hian tunah te pawh hian pawl thenkhat hianin Group 'B' te pawh hi MPSC kaltlangin tih ni se ti ang lek leka sorkar han rin lohna ang lek lek te pawh hi a awm a. Hemi staff vel lak chungchangah hianin Group D ang chin te two-tier system deuh hian Pu Speaker, kal thei ta se la. Staff Selection Committee ten khamia kha lo ti ve ta se la. Tin, a bikin zirtirtu tur ang te phei chu trained loh tan phei chuan tih loh ni se la. Trained te chauh hian dil ni ta se. State dangah te phei chuan an train a. Chumi an training certificate zawng zawng nen khan registration an ti a. West Bengal-ah pawh khuan anmahni hun lo kal tura kha an inhre deuh mai ang khanin han kal thei ila. Chutiang ang te pawh chu an awm ve bawk a. Kan ramah hi chuan emergency deuh deuh hian kan han ti a. Hei hian thil controversial tak tak hi a rawn siam chhuak ni hian a hriat a. Chuvang chuan, hetiang lai te pawh hi Pu Speaker,

controversial lutuk lo deuha han kal dana hi vawiin niah chuan kan zir chhuah hi a tha hlein ka hria, chutiang ang policy thar te pawh chu kan hmang thei ang em? Zirtirtute pawh chutiang ang dungzui deuh chuan lak ni ta se la tih kha Demand 20-naa ka'n sawi duh chu a ni a.

Demand 24-naah hianin Medical and Public Health Services tiha hi, hei hi sawi tur hi a tam hle mai a. Kha vawiinah pawh khan an han sawi viau a. Heti lampanga Subject Committee te pawhina an tih a an chhan theih loha kha a Department kha chuan khu lamah khan a lo chhang a. Mahse, an lo pawm loh hlauh a ni a. A buaithlak hle mai a, kan Department hi, tunhnai chho khan Tender lo hian damdawi te pawh hi lei hi a tam ta hle mai a. Hei hi enge a chhan aw tih a hi Pu Speaker, min han hrilh Chiang se la. Engati nge nia hei hi Tender lova emergency purchase-a an lei avang khan damdawi tha lo te a awm a. Nikum hmasa kha a nih chu, Biate CHC-ah khian vitamin vel te pawh kha expire daih tawh kha an han pe teuh mai a ni. Kan Minister zahawm tak ho hianin kan bial khi kan kaldun a, a bial hlui te a lo ni baw k a Biate te, North Vanlaiphai te kan han tlawh a. Chumi tum pawh chuan khatiang ang kudam, store zawng zawng kha kan tlawh a. An ni pheih hi chuan a'n rap deuh tawn tawn a, "Heitiang hi ka hunah hi chuan awm lo tur a ni", a ti a. Kha kha engtiangin nge improvement kan neih tiha kha ka'n zawt duh baw k a. Tin, damdawi hi tender lohva lei avang hian vawiin niah hian Medical Department hian eng zahin nge ni ang a lose ang? Hemi MRP ang lo hianin hetilaih tender chu ni se la a lowest rate khan lak mai tur a ni a. Hemi a hloh tur a hi eng zah hi nge chhut chhuah hi a chakawm hlein ka hria tiha kha ka'n engto deuh a ni. Chutihlai kar chuanin an Budget te hi a pung tlem ang reng viau mai a. An earmark leh an normal plan hi en ta ila a inang lo hlein ka ring a. Vawiinah te pawh hian Mizoram kan hriseh loh zia kan sawi ngun hle mai a. Chumiah te pawh chuanin nakinah chuanin Revised Estimate-ah te pheih chuan Revised Budget-ah hi chuan tih pun deuh ni se la tiha kha ka'n sawi duh deuh a.

Labour and Employment-ah hian hetilai kan Budget Speech-ah Building and Construction Workers Welfare Board atang hian lakhs 38 lai an hmuh lai hianin, vawiinah Labour & Employment Budget a hi nuai 30 velin an tlahniam ta a ni. Kan han sawi ang khan Youth Commission te hi hemi hnuai a awm a ni baw k si a, kan hma hi a thim hle hian ka hre thin a. A chhan chu vawiinah hian Labour Inspector te neiin engkim mai hi vawiin nia Contractor ho leh pawn lam atanga hna rawn chhang hi an tam tawh sia. Hetiang inspect zung zung tur hian he department hi upgrade a ngai hle in ka hria a, chutih lai chuan an plan an tla hniam leh daih mai a. Trade & Commerce pawh hi an budget hi a tla hniam hle mai a, nikum ai khan cheng vaibelchhe 250 velin a tla hniam ta a ni a, engnge ni a chhan niang aw an ti a, khu kan Bazar-te pawh khu bazaar pawh a nuam hle tawhin ka hria a, bazaar hanluh tawntirh a bawlhhlawh bawm ringawt te pawh khu kan la sawn thei lo a ni a. Chutih lai kara an budget han tlahniam a hi paw k ka ti a.

Pu Speaker, Vety-ah hianin (Speaker : Minute khat ila nei) hei kan budgetah hian tunhma a awm chiahlo NLUP line department reng hianin Grant in aid general non salary tihah hian a rawn lang ziah mai a, hei hi eng a tana tih tur nge nia tih laia hi ka hre chiahlo a, niminah khan kan sawi ang chu ka ti a, hei hi tunhma a tello rawn tel thar niin ka hria a. Hei Sericulture-ah pawh hian ₹ 120 an dah ani. Engtingnge ni ang aw ka ti a. Disaster Management & Rehabilitation-ah hian kan kal leh lawk ang a, Demand 30-na ah hianin. Hei silpoulin kan lei danah hianin a

controversial hle in a hriat a, hemi chungchangah hian kan hotu berte pawh an inrawlh lek lek a hriatna a awm a. Hemi chungchangah hian tender an invite-ah hian Chiang takin tita sela ISI, ISO mark tello pawh hi lak tur ang khan an han ti ta a. Damdawiin te chu ISO minrawn pek avangin kan chhuang a, bangah kan ziah kelkul lai hian ISO te hi lehlam departmentah chuan a tha lemlo a maw chu aw tih tur lai kha an awm leh a. Khating an paih avang te a an kal chho laite hi a pawika ti a.

Tin, kan Minister hi a fakawm a, kan mamawh apianga silpoulin min han pe thin hi a lawmawm hle in ka hria a. tin, Pu Speaker, zawh nan hei Sericulture hi kan sawi duh a, Sericulture Department hi a pawimawh a, ka hma ami khan a sawi thiam bawka...

SPEAKER : I hun a tawp tawh a nia, kapu ai kha in sawi kep leh dawn a mi?

Pu LALTHANSANGA : Pu Speaker, a lawmawm e, hei te chauh hi kan zawt teh ang ... a lawmawm thin e.

Tichuan, Sericulture Department-ah hian nikum aia an budget tlemna hi nuai 1054 in a tlem ta ani, amak angreng hle in ka hria a, Pu Speaker, kan Minister tan pawh hian a hrilhai thlak hle in ka ring a. Nikum budget speech te han en kha chuanin Sericulture hi kum 25 lai lo ding tawh te a ni a, post pawh hi 39 vel hi post ruak awma fill-up ngai khawp te a lo awm a. Chubakah chuan kum 2010-2011 ah khanin hmalakna tur hi a rawn tarlang nasa em em a, chhungkaw 200 hnenah hianin Theihmu phun tur hi nuai 80 vel kan pe ang tihte kha an awm a, chutiang chuanin District Office sak tur te leh eng engemaw hetilalah hian a rawn tam mai a. Hei, Pangngang chi tepawh hi nuai 4 leh sing 5 kan pe ang a, Cocoon-te chutiang/khatiingin tihte a ni a. Tin, a rate-te pawh kha an han revised hial a ni a, a rate hlui 120 te kha 150-ah te an han dah chho te kha a ni a, Cocoon tepawh kha. Mahse khatiange kha waviinah chuan retrospective an rawn hmang leh ang a, a hniam leh ang a tihte kha, chutih lai karah chuan price escalation hi a nasa si a, engkim mai hi a to chho chak si a. Sericulture Department tan hi chuan thil lungchhiat thlak tawp a ni mai awm mang e aw, heti zat maia an budget han tlem ta hi tih hi Pu Speaker, ka'n engto pui deuh a ni. Hetianga an hmalakna hrang hrang an han tarlanah te hianin ka bialah ngei Khawlailung-ah tepawh khanin Demonstrator te min dahsaka, chutianga hma min laksak tur khan kan Minister zahawmtak hian min han tiam a.

A bikin thingtlang bialtu te tan phei hi chuanin Pu Speaker, ngai em em hi chu thingtlang pa, lo a va feh thei tawh manglo, nauawm paha an hnathawh atan hian a rem em em mai a. Chutiang anga tan te chuanin Pu Speaker, nasa leh zual hianin kan Sericulture Department hian hma te la in, trainers train te an han tih chhoh te hianin village wise ang te leh hetiang ang khaw hrang hrang ang te pawh hianin han ti chho sela tih kha Pu Speaker, ka'n ngen duh a. Nikuma hmalakna tur hrang hrang an tihah hian an lak that tawktak loh avang hianin an budget hi a phai ta nge ni, engnge ni Pu Speaker, kan Minister zahawmtak hian min hrilhfiah theih chuan a lawmawm hle in ka ring tih

kha ka'n sawi duh a. Hei, i zahawm thin hle mai a, hun min pek belh thin avangin i chungah ka lawm tak meuh meuh a, mi rawn tih tawp hma in ka'n tawp mai ang e. Ka lawm e.

SPEAKER : Tunge sawi leh dawn le, Pu Nirupam Chakma.

Pu NIRUPAM CHAKMA : Pu Speaker, ka lawm e. Demand No. 4 – Law & Judicial hi helaiah Act kan passed tawh a, khami kalpui dan tur kha Minister zahawmtakin min hrilhfiah thei sela, a wind up na-ah khan. Tin, Sub-Divisional Court hi Chawngte-ah kan nei lova, Lawngtlai-ah kal a ngai a, tunhma chuan Saiha-ah te kal a ngai thin a, tunah tlemin a hnai tawh a, Lawngtlai-ah kal a ngai a. Sub-Divisional Court neih dan tur kha Secretary hnenah pawh kan sawi tawh a, hei hi hma min laksak thei ang em? tih kha ka zawt duh a. Tin, Family record leh Registration of marriage hi compulsory a ni a. Mahse, court an neih loh chuan registration kha a harsa dawn a. Chuvangin arang thei ang bera Family court hi, tin, marriage court hi din belh a ngai a ni. Tin, Mizoram Court hi Pu Speaker, engemaw zat chu an published tawh a, upto date in publish thei sela tih kha suggestion ka siam duh a ni.

Tin, Parliamentary Affairs chungchangah khan Demand No. 14-ah Parliamentary Procedure hi training a ngai a ni. Department tam tak te khan Parliamentary Procedure hre mang lo te pawh an awm a ni. Hetah Assembly-ah thu kan sawi a, entirnan Assurance te, Minister ten an pe a Department lam khan bawhzui char char tur a ni a. A hnuah Assembly Assurance Committee-in an bawhzui a, chuti chungin an chak thei si lo, chuvangin hei chu vil a ngai.

Tin, Pu Speaker, proposal pakhat siam ka duh chu Department tinah Legislative Cell hi siam sela, mawhpurthu bik Officer siam ila, chutah chuan Assembly Business te, anmahnin an khawih thei ang a, zawhna leh chhanna emaw, Bill siam emaw, Assembly thil reng rengah chuan mawhpurthu bik neih loh hi a fel lo. Chuvangin hei hi chu Legislative Cell angin Department tinah establish a ngai. Tin, hei Assembly Proceeding an chhiar duh em? an chhiar ngai em? tih kha ngaihtuah a ngai a ni. Department Official ten an chhiar ngai em? An chhiar ngai chuan kan thusawi reng reng hi khawiah nge Minister Assurance pek? Khawiahnge, engtikah nge MLA ten an ngaihmawh an sawi? Kha chu department ten sawi ngai lova, bawhzui tur a ni a. Chuvang chuan Assembly Proceeding pawh hei kan Assembly Official te kan zawt a, copy inpe ngai em? kan pe ngai an ti a ni. A then chuan vawi hnih vawi thum dil te pawh an awm a, pakhat copy pek kha khawiah nge an dah pawh an hre si lova, chutiang te pawh a awm thin. Chuvangin Assembly Proceeding-ah hian official te, a bik takin, Secretary te, kan Director te chuan chhiar ngei ngei tur a ni a, copy pawh an duh chuan Assembly in tam tawp pek theih ni sela ka duh a.

Tin, School Education chungchangah khan, Pu Speaker, hei waviinah High School Internet webside ka brows naah hian kan en tawh a. Higher Secondary School belkhawm District wise-in 81, High School 497, Middle School 1072 Primary School 1682 kan nei a, a tam em em a ni. Amaherawhchu, kan sawi duh chu Department-ah Medical leh Education

Department hi Mizoramah hlawhtling ber an ni a, kan ngaihtuah chiang ngai em second highest literacy rate kan neih dan te hi, harsatna tam tak nei chungin staff te pawh tam a ngai school te pawh a tam, a budget han en khan salary bak kha chu nuaih 200 nge 300 an nei a ni. Chuvangin, maintenance kha a harsa ang tih a lang a, amaherawhchu, rawtna pakhat kan siam duh chu Pu Speaker, building maintenance chungchangah border area-ah chuan BADP te kan nei a, RD atangin ruahmanna kan siam thei a entirnan building repair chungchangah khan School Department in a neih loh pawhin Department dang atangin tihdan kha a awm a ni, NREGS a pawisa pawhcomponent hmangin maintenance an ti thei a ni Village level-ah chuan, chutiang anih loh chuan building maintenance a harsa dawn a. Building maintenance mamawhte chu Minister zahawm takin chhut chhin ila a bik takin RD ti mai ila BADP te pawh RD hnuai an ni a, NREGS te pawh an nih avangin, tin, Department dang pawh theih se, coordination nei sela ka duh a. Tin, School Department website hi upgrade thei se ka duh a, tuna langah chuan school awm zat chu a lang a, school tin profile lang sela, an date of established atangin number of teachers te, number of students te a har lo, an ti lang lo mai mai a ni. Chuvang chuan, he website hi upgrade in heng ang data hi input sela mipui in kan en thei dawn a, khawiah nge zirtirtu tam, tunah hian rinhlelhna tam tak kan nei a ni, khawpuiah a tam an ti a kan hre bawk si lova, khawiah nge tam, thingtlangah kan nei lo kan ti a, chuvang chuan, transparency a awm loh chuan rinhlelhna a awm thei dawn a ni. Chuvangin, he thil pawh hi a rang thei ang berin school profile pawh hi website-ah upgrade thei se mipuiin an hre zawk ang. Tin, Pu Speaker, Posting and Transfer Rules a rang thei ang berin siam theih ni se, a chhan chu hard posting te, soft posting te, category siam a, nih loh chuan thingtlangah kal duh an awm lova. Hemi thilah Pu Speaker, SSA chungchangah ka sawi duh chu Minister zahawm takin amah leh amah problems a insiam a ni. MNF Sorkar tih anga District level-ah appointment siam mai sela, interview pawh awm lovin, felfai taka a tih duhna avangin tunah buaina a awm zawk a ni a, MNF Sorkar lai chuan District level-ah engmah buaina awm lovin interview pawh awm mumal lovin an la hmiah hmiah mai a ni, chutiang angin ti sela, duh duh in kan la mai ang chu. Chuvangin a leh pekah chuan recruitment centralized lo in interview pawh ko lo in ti sela, kan duh duh kan la ang a MNF tih dan ang in, duh duh kan ko mai ang a. Tin SSA-ah khan Village Education Committee Pu Speaker, circle..... te, BRT te, District Mission a nih ang in a nih dan phung pangaia kalpui mai ni se. A dik takah chuan SSA zirtirtu laknaah chuan Village Education Committee recommendation lak a ngai ziah a ni, interview pawh a ngai lo. Tripura-ah chuan an duh duh an la mai a ni, engah nge an interview, regular post-ah lo chuan hetiang hi a tul lo, Village Education Committee in a duh duh a la tur a ni. Recruitment an siam ang a sikulah an kal duh lo a, chutiang chu sawi tur tam tak pawh a awm ang, appointment neih hnuah pawh vawi khat mah kal duh lo pawh an awm ang. Chuvang chuan Village Education Committee recommendation angin appointment pawh a bik takin SSA-ah khan tih theih sela ka duh a. Tin Higher and Education-ah Pu Speaker, hei Mizoram Law College te, pahnih chauh la provincialised loh kan nei a ni, Deficit-ah kan dah a, hei hi chu a fel lo ka ti a ni. Enga tinge college pahnih chauh kan dah ang. College pahnihcommittee pawh an duh a tunah hian. Chuvang chuan provincialised law law loh, tichuan dan pakhat hnuaiyah kan awm ang a Deficit a awm dawn lo

a ni. Tin, Science stream hi keini bial lamah zirna tur kan nei lo a, Commerce pawh kan nei lo bawk a, a awm theih dan tur min ngaihtuah sak thei sela ka duh a ni.

Tin Medical chungchangah Pu Speaker, Borapansuri P.H.E hi, hei hmannah pawh ka sawi tawh building tha deuh an sa a, eng chen nge khatiang in kan dah ang? Doctor te an thawk thei dawn em? Nurse te min pe thei dawn em? Minister zahawm takin vawiinah sawi chiang sela. Tin, Health Department website ka en a kan District-ah primary Health Center awm zat chu a tarlang a, chuta a lang pakhat chu Lawngpuighat a ni, mahse building pawh la sak a ni lo a, chuvangin an tar chhuah tawh law law chuan building hi a rang thei ang berin min sak sak se la, wrong information kha mipuiah pek a tha lo a ni. Pu Speaker...(Interruption)

*Speech not corrected

SPEAKER : Lawngpuighatah chuan Police post te pawh a awm ani lawm ni?

Pu NIRUPAM CHAKMA : Aw awm e. Lawngpuighat hi either side a ni a Chawngte river atangin khaw lian tak a ni a. Tin, Pu Speaker, NRHM chungchangah khan hei upgradation of Civil Hospital Aizawlah khan kei pawh Subject Committee V a Committee member ka ni a, kan chhui chiang a, member tam tak chuan Department fel lohna a ni an tih kha chu a dik tawh lo. NRHM chung chang ah a thunei ber chu State Level-ah chuan State Mission a ni. Chu chu a kaihhruai chu Director a ni, hetah Secretariat lamah pawh hriatna an nei vak lo. Chuvang chuan Department ang a kan blame chu a dik lovang. Kan blame duh a nih chuan State Mission Directorate a ni, chu chu chiang se. Tin, he thil hi a serious viau va, Assembly zahlohna a ni a, Assembly aiawhah kan thawk ve a wawi tam tak kan chhuia kan chhui chiang tawh a, min chhang thei lova, engatinge central sorkarah khatiangin UC an pe a chuvang chuan Assembly zah lo... Assembly a nih hi. Nakinah Privilege Motion te pawh move a ngai dawn asin. Pu Speaker, Labour & Employment chungchangah khan, minute khat chiah, hei tawng thiam vak lo ka ni a, bawk si mai rawh. Pu Speaker Employment Buiding Chawngte-ah kan nei a, MNF sorkar lai atang tawhin miin an luah a, ka sawi duh tawh lova, hetah chuan vawiinah pawh sawi ka tum lova, ka sawi angh min ngai rawh, chu chu re-construct pawh a ngai a. Tin, keini bial hi backward a ni a, ITI pakhat tal chu min establish theih dan a awm em? tih kha ka sawi duh a. Tin, Pu Speaker, Vety chu ka sawi lo ang a, Dispensary pakhat Chawngte Sub-Division atan an ruahman a ni a, mahse sak tum chu Lai council-ah daih ani. Chuvang chuan tuntum chu min tih sak thei lo pawh ni se pakhat tal chu kan Sub-Division lamah a tih theih em? tih kha. Tin, Silpaulin min pe thin a kan lawm em em a, hei session zawh veleh bial ka fang dawn a, MLA zawng zawng te a tam thei ang ber min pe thei ang em? Pu Speaker, ka lawm e.

*Speech not corrected

Pu P.P THAWLA : Pu Speaker, abial hla deuh lam kha lo in zui phawt mai ila, a tha in ka hria. Demand 20-naah tlem han sawi duh ka nei a, School Education lamah hian. UT sorkar bul kan tan a education lamah kan Department te nasa taka tan an lak chhonzawm zel a. Tunah hian State sorkar kan lo ni ta a, amaherawhchu, UT sorkar kan nih chhung zawng a kan Mizoram sorkar hmalak tawhna kha state puitling kan nih tawh hnua kan chhonzawm dan hian a hma kha kan tluk lo deuh emaw chu aw tih mai theih tur khawpin thingtlang lam Education Institution te chuan hriatna riau kan nei. Dik takin Post ruak fill up chungchangah te thingtlang lam hian kan tuar a. Entirman pakhat han sawi ta ila Zawngling Govt. High School-a clerk awm chhun chu 2001 khan a boral a tun thleng hian Govt. High School ve meuh clerk nei miah lovin a awm reng mai a, heng te hi regular a lak theih loh pawh in MR te talin clerk hi a pek theih mai lawm ni tih ka han sawi duh a. Tin, kan missionary headquarter, Government High School, Serkawnah chuanin IV Grade 2 an neih kha 1 a thi a. Pakhat a pension tawh baw a. Government High School ve meuh mai IV Grade pakhat mah nei lova kal reng mai te hi a harsa a, department lama kan hotute chuan theihpatawpin tan an la tih ka hria a, Sorkar lam ina lak theihna/phalna a pek miao si loh chuan tihngaihna a awm lova. Hetiang kawngah hian kan sorkar lam hian lo inphal ve deuh sela. Department ten mamawhna an thlen hi min ngaihsak deuh sela a tha lawm ni tih ka han sawi lang duh a.

Tin, ka bial chhungah private High School a la awm nual mai a. Sorkar in heng private High School te tanpui nan grant-in-aid school group 2-ah a siam a. Cheng 1,50,000 kumkhata dawng chin leh Cheng 120000 kumkhat a dawng chin kha an awm a. Tunah hian hetiang ho hianin grant-in-aid sum hi an dawn lohna a rei hle tawh in report ka dawnga. Hengte hi engnge a chhan? a hma lama an dawn tur ang ang hi chu lo pek theih ni sela a tha lawm ni tih House-ah hian ka han tarlang duh baw a. Private tawh lehnghala an beisei tlemte pawh an beisei huna hmu thei lova an awm hi chu an khawngaihthlak bik em mai a. Chu chu ka han tarlang duh a ni. Chutiang Private High School-ah chuanin RMSA hmalaknaah zirtirtu an lo pe thei thova chutiang a nih chuan a hmuna Managing Board hovina staff an lo lak tawha te kha RMSA in interview a teacher tur an lak hunah khan khang sikul ami te kha lo ring mai sela. An grant in aid hmuh piah lamah RMSA sum atanga appointment nen an tan kawp chuan school enkawl kha nasa takin an hlawkpuiin an lawmin ka ringa, chu chu kan han sawilang duh baw a. Tehkhin nan Kawlchaw Private High School-ah chuanin a hmuna thawktu RMSA sum atanga Teacher an lak tur atanga lo beiseia lo dil ve tute an awm reng laiin anmahni kha an chang ta lova. A tir atanga tel map lo pawn lam mi daih mai kha appointment an lo hmu a, an lo zuk luhchilh ta mai a. A hmuna a hmun lo nghak tu tan chuan a beidawn thlak hle in ka hria a. Khatiing lamah khan chianguang deuhin kan sorkar hian han ngaihven sela, a lawmawm hle ang tih ka han tarlang duh baw a ni.

Tin, Middle School-ah Class VIII a tel tawh avangin zirtirtu 427 vel lai lak belh tur a awm baw a. Hengte hi lak a nih chuanin a sikul awmna tur khua mihring kha a qualified ve deuh tho an awm chuan intihsiakna lamah lo tlahniam deuh mah se lak hram hram ni sela. Tichuan in transfer kual te hnuh chhuah leh te ngai lovin ngaihtha takin an thawk nghal thei anga, sikul in nasa takin a hlawkpui ngei ang tih ka ring baw a ni. Pu Speaker, Demand 21-naah han sawi leh duh ka nei a. Higher and Technical Education lamah hian a hma a kan ngaihthlak tawh ang khan entrance exam na lamah hian kum 2010-ah te, 2011-ah te harsatna department lamah kan lo neih thina kha a pawl hle mai a. Khatiing kha awm tawh lo turah beisei ta ila, heng hi

thawktu te fimkhur loh vang leh inthlahdah vang te pawh a ni thei a. 2010 ah khan chuan result vawi 2/3 lai an han en takah chuanin Zawngling tlangval pakhat T.T.Lakmo phei kha chu a tawpa tawpah a tum 3 na velah kha chuan Doctor zirtur pakhatnaah kha chuan a lo lang thei ta mai a. Khatiang te a lo awm thei ta khanin thil kal tawh hnuah te rinhlehna tamtak min siam sak a.

Tin, kan hmalam hun lokal turah pawh fimkhur leh zuala hetiang kawngah hian kan hotuten tan an lak a tul hle in ka hria a. Kuminah pawh khan complaint kha a lut nualin ka hria a. Mahse department lamin court-ah te an kal tak si avangin an beisei ang kha hmu lovin tam tak chu an awm ni te in ka hria a.

Tin, nichinah khan kan Health Minister zahawm tak khan a rawn tarlang zeuh tawh baw a. Manipur RIMS-ah sawnin 2009-ah B.Sc (Nursing) zir turin Aizawl District ami 2, Saiha District ami 2, Champhai District ami 1 tirh thlak an ni a. 2009 November Ni 24 ah Ist Year B.Sc (Nursing) admission an la tawh a ni. Tun thleng hian Ist Year Exam an la nei thei lova. Harsatna leh manganna nasa tak an taw a. Chu chu thu hnuhng berah chuan Aizawl District mi 2 chu Educational Loan pekin an duhna hmunah an zir thei ang. Mahse, a dang District 3, Aizawl mi ni si lo tan kha Loan kha a pek theih baw si loh avangin tunah hian mangang takin an nu leh pa te nen an awm a ni tih hriat a ni a. Hei hi Health department lam kan minister zahawm tak te, Education lam ten heng kan harsatna te hi a solve pui mai dan te a awm em? RIPANS ah hian chutiang mi 3 dang te chu hmun danga loan la a zir thei si lo te hi.

SPEAKER : Ngawi rawh lawk aw, Pu Thawla. Khi kan hun a tawp a. Minute 10 hun kan han inpekah hianin minute 7 vel kha a sawi tawh a. Mahse kan han tihtawp tir lawk dawn em ni? Hun a hmang tlang dawn em ni? Nge kan luh leh hunah minute 4 vel kan han pe dawn zawk? Nih leh tlang mai rawh se aw. Minute thum/li vel aw.

Pu P.P. THAWLA : Pu Speaker, ka lawm e. Tawi tein ka'n sawi belh ang e. Tin, khatiang kha Higher & Technical leh Health Department khanin khatianga zirlai harsa tak, mi state ami, mangang taka awm te dinhmun kha a solve sak dan a awm em? Hetah Mcon ah te emaw, RIPAN ah te emaw a seng luh dan mai te a awm em tih kha ka han tarlang duh baw a. Chu chu ngaih pawimawh tul hlein ka hria.

Tin, Demand 24-naah hian ka han tarlan duh chu Mizorama district piang hmasa 3 ah khan Saiha district kha a hma chuan Chhimtuipui district tih a ni thin a. Saiha kha District Headquarter a ni a. Kan Civil Hospital saw a mawi tawh lo khawp mai. Dam lo nih pawh a huphurhawm tawh a ni. Damlo han in admit na tlak pawh a ni tawh vak lovin ka hria. Han len nikhua pawhin a zahthlak hlein ka hria. Damlo tan pawh dam a hnekin dam loh zual pawh a hlauhawm zawk a ni. Chuvang chuan hei hi a thar in sak sak a tul hle tawh a ni tih hi he House-ah hian ka han sawi lang duh a. Chumi a thar sak hma pawh chuan kum hnih khat chhung pawhin tuna mi pawh saw tun aia tha zawk a maintain hram ni sela. A thianghlimna kawng thu ah te, an khum emaw an mut puan emaw, an almaira te emaw kha thianghlim zawk leh thar zawk a han maintain hram hram ni sela, tih a duhawm hlein ka hria a. Chu chu, Pu

Speaker, ka han tarlang duh bawk a. Tin, Saihaah te, Tuipangah te leh hei district lama kan Hospital lamah te hian Specialist doctor te min dah sak a ngai hle a ni. Specialist kan la neih loh aleiah bial hla te phei chuan Aizawl khawpui rawn pan, dam lo te an lo thih tam phei chuan khawpui bialtu te tuar loh kha kan tuar nasa hle a nia. Nichinah Khawbung lam pang bialtu in a rawn sawi te pawh kha thil dik tak a ni. Khang te kha ka han tarlang duh bawk a ni.

Tin, Pu Speaker, a dang lelah chuan, hei, NLUP a lar bawk a, Disaster Management Minister zahawmtak Demand 30 na enkawltu pa hianin a phak ang tawk tawk chuan Silpauline hi min han sem den den thin a. Keini ang Opposition tan phei chuan silpauline kan dawn tam hian NLUP kan lo sem ve hi a ni reng mai a. Chuvang chuan tun session zawh chuan a aia tam zawk min pek ngei kha a tha hle a ni, mahni bialah. Kei phei chu a hla ber ka ni bawk a. Tin, ka bial lam hi opposition lam bial a ni bawk a, chuvang chuan opposition bial a ni tih hriat loh turin silpauline tam tawk man min kentir phawt mai se, tih ka rawn ngen leh duh a, Pu Speaker.

Vety Department lamah, Phuraah te khuan Surveillance Doctor te kha dah a ni thin a. A chhan chu Myanmar lam atang a ran tam tak lo luhna a nih avangin. U.T. sorkar lai pawha khatiang doctor te kan dah a, quarter tha tak tak te kan tih theih laiin, tunah hian quarter pawh a awm tawh lo, a doctor chin hriat pawh ni tawh loa awm reng mai te hi tha lo hlein ka hria a. Chuvangin chhim lampang hi development kual chhuah tur a kan thlir a ni bawk nen, Phura zawl lama doctor min dah sak thinte kha Vety Department hian min dah sak leh ngei sela tih hi ka duh a, chu chu ka han tar lang leh duh bawk a.

Tin, Pu Speaker VFA post 37 awmte pawh kha, train chhuak tawh, appointment la hmu lote pawh awm nualin ka hria a, khatiangte kha lak a centre kan lo hun tawhna zawng zawngah hian dah leh hram ni sela tih Pu Speaker, ka han sawi tel duh e. Ka lawm e.

SPEAKER : Tunah chuan, kan hun a lo tawp a, minute 5 laiin kan pel tawh nghe nghe a, i lo chawl tawh ang u. Dar 2 ah kan tan leh dawn nia.

2:00 P.M.

SPEAKER : Parukin kan sawi tawh a, tunge sawi leh dawn? Pu K.Lalrinthanga a ni ang a, chutah Pu Hmingdailova. Pu K.Lalrinthanga i lo sawm ang.

Pu K. LALRINTHANGA : Pu Speaker, ka lawm e. Hei waviin a kan Demand sawinaah hianin kan Minister te hnena thil thlen duh tlem ka nei ve a, chungte chu han tar lan ka duh a ni.

Demand No-20, School Education Budget head No-31 leh 32-ah khan, Grant-in-Aid, general tih hnuaiah khan salary leh non-salary tih a awm a. Salary-ah khan cheng nuai 5124.95 a awm a, non-salary-ah khan cheng nuai 1917.40 a awm a. Hemi hi ka hmuh khan lawmawm ka lo ti ve a, a chhan chu Vairengte khu mihring

singkhat chuang awm tawhna a ni ve a. Civil SDO hmun a ni a, zirna lamah khuan an tlahniam em em a. Institution an nei tha vak lo a. Mihring sing chuang awm tawhnaah khuan Higher Secondary School (Private in) pakhat a awm ve a. Mi tlawmngai ten an din ho a ni a. Chutiang chuan Higher Secondary School private in a awm ve a ni. Mihring sing chuang awm tawhnaah khan. Chuvang chuan helaia sum leh pai heti zat hlawh atan leh hlawh atan nilo belhkhawm cheng nuai 7000 chuang zet mai awma hi khulai Vairengte School tanpui nan, eng tin emaw, building leh zirtirtu te hlawh atan khuan min pe ve thei ang em? tiin ka han ngen duh a, chu chu ka han tarlan duh a ni a.

Tin, Trade & Commerce Demand No. 44-naah khanin Budget head 27, minor works atan nuai 75 a awm bawk a. Hmanni a Starred Question ka zawhnaah khan Vairengte a market sakna tur atanah hian ruahmanna a awm em? tiin zawhna ka siam a, chhannaah khan awm lo tih a ni a. Vairengte khu kartin Cachar vai te leh Mizoram lampang atanga market intawm siamna hmun a ni a, hemi Lungdai te Kawnpui te leh Aizawl atang te pawhin, wholesale a bungrua tam tak an zuk lakna thin a ni a, Vairengte market khu a chhe tawh hle a, athen chu tlu lek lek te pawh a awm a, khu khu siam tha turin department pawn ngaihtuahna an siam ve fo tawh thin a, amaherawhchu sum leh pai harsatna avangin tun thleng hian kan la ti thei lo niawm in ka hria, chhannaah pawh khan chutiang chu a ni a. Helaia minor work a sum nuai 75 awm atang hian engemawzat tal chu min then sak ve thei dawn lawm ni tiin kan ngen duh a ni.

Tin, thildang pakhat leh chu Demand No. 30-na Disaster Management & Rehabilitation-ah khan Budget head no. 50-na other charges tihah khanin nuai 1462.70 a awm a, hei hi eng atana hman tur nge ni ang aw tih ka lo ngaihtuah a, ka rindanah chuanin silpaulin leina te hi a ni mai awm mange aw tiin ka ngaihtuah a, chute a nih chuan Serlui bial chhunga mi rethei tak tak khuan In chung atan hian silpaulin hi an mamawh em em mai a, Mizo Pa in Siallu te kan hmang thin a. Amaherawhchu, tunlaiin Siallu te a awm tawh lova, tunlai hian Serlui biala mi harsa tak tak thenkhat chu refugee rawn kal cham hlen ta te an ni a. Chungte chuan mau hnah te In chungah an hmang thin a ni. Hetia kan Minister in silpaulin min han pek thin te hi leimin khuh nan te hian kan hmang phal lova, In chung atan kan hmang tlangpui hlawm a, chenna tak tak atanah. Chuvang chuan helaia sum leh pai heti zat a awm si chuan In chung atan hian min pekbelh thei angem? Kan chanai min pek bakah hianin Silpaulin In chung tur min pekbelh thei angem tih kha kan zawt duh a ni.

Tin, thildang leh chu AH & Vety Demand No. 34-naah khan department staff lak thar na tur ang chi kha ka hmu lova. Chutih rual chuan sorkar quota-in Vety doctor zirchhuak hi an awm reng a, kumtin in engemaw zatin an zirchhuak a. Serlui bial a bik takin Bilkhawthlir leh a chhehvelah khuan Bawng vulh te, tin, Vairengte lamah pawh Vawk vulh te a tha duh em em mai a, eizawna tlak a ni hlawm a ni. Bilkhawthlir phei chu Bawng hnute hian Kolosib khu an chawm a, an lak zawh sak seng lo a, chutiang ang chuanin ran vulh khu a tha duh a. Amaherawhchu, a enkawlina lampangah hianin Doctor an awm lova a buaithlak em em mai a mipuiin ran enkawl turin Doctor te an mamawh a, helaiah hianin Doctor te hi lakbelh dan a awm lawm ni tih hi zawhna ka han zawt duh a, chutianga Doctor te lakbelh a nih chuan khunglai hmunah te min dahsak theih ka ring a. Kan mipuite harsatna, ranvulha

eizawng mi tam takin an lo tangkaipui ve theiin ka ring a. Chungte chu ka han zawt tel ve nghal duh a ni e.

SPEAKER : Awle, tunah Pu Hmingdailova Khiangte, a dawtah Pu John Siamkunga.

Pu HMINGDAILOVA KHIANGTE : Pu Speaker, vawiina kan Minister zahawm tak tak pathumte demand chungchangah hian han sawi ve ka duh a. A hmasa berin Demand No. 24-na Health hi kan sawi duh a. Kan Minister zahawm tak Pu Lalrinliana Sailo hian thingtlang lamte a ngaihven a, a chungah kan lawm hle a ni tih kan sawi hmasa duh a. Engvangin nge kan lawm kan tih dawn chuan Kawnpui-ah leh Lungdai-ah kan lo nghah reng Dental Surgeon min pek avangin kan lawm hle a.

Tin, Lungdaiah hian Quarter pathum min sak sak bawk a, tin, nikum khan kan dil angin sawtah Bukpui-ah Motor min pe a, kan lawm hle a. Tin, Quarter pakhat leh tui dahna tur min pe bawk a, a chungah kan lawm hle a ni.

Tin, han sawibelh ka duh erawh chu Hortoki khu Malaria infected area a nih a chiang a. Khuta kan Health Sub-Centre ve khu a tlu lek lek reng mai a, kan Minister zahawm tak hnenah pawh hian ka sawi a, ngaihtuahna pawh a hmang chuan ka hria a. Kan lawnchho va, a ban kan vuan dawn kha bul a lo nei lova, ka bawkkhup ti tih a, mahse, ka in nemkang leh thei hram a. An IV-Grade ten theihtawpa an lo repair thin avangin a tlu lo mai a lo ni a. Khu khu min hriat nawn sak leh se kan duh a ni.

Tin, kan Hospital pathum Bukpui, Lungdai, Kawnpui hian hungna an nei lo vek mai a. Kan hriat angin damdawiin te hi chuan hungna (Fencing) an mamawh a. Hei hi remchang hmasaah min siamsak thei se kan lawm em em ang tih hi kan sawi duh a ni.

Tin, Demand 20-na School Education-ah hian sawi tur ka ngah viau a, nimirah khan kan sawi tawh a, a lawmawm zawng tam tak kan Minister zahawm tak hian min buatsaih sak a, SSA School building te, ka bial kan tlawh hian School building Primary School leh Middle School chhia hi ka hmu mang lo, an tha vek mai. A pawimawh zawk erawh chu, a chhunga zirna kha a nih kha kan sawi tawh a. Chu chu kan Minister zahawm tak pawh hian min hriat reng sak tho ang ka ring.

Tin, RMSA pawh hi min duh sak viau ni hmiang ka ti mai a. Building thar a lian chi kha ka bialah khuan pahnih a awm a. Serkhanah leh Bualpuiah. Tin, a renovation/extention chi kha pali lai Bukpui, Lungdai, Hortoki leh Thingdawl-ah khuan a awm bawk a, an sa mek hlawm bawk a, ka lawm hle a ni tih kan sawi duh bawk a.

Kan sawi duh belh leh chu Pu Speaker, kumin matric result kha kan en a, last 2/3 years kha chu matric result kha chu a tha tawh viau a. Kuminah

khan Govt. H/S te pawh an la tel tlat mai a. High School 29 result an nil mai kha a hmuh a hrehawm hlein ka hria. Chuta ka ngaihtuahna chu kan Minister zahawm tak leh kan sorkar hian an ti thei ang em ka hre lo. Mi huat zawngte pawh kan sawi palh ang tih a hlauhawm viau a. Amaherawh chu, Education lamah Quality Education kan duh a, tin, he ram hian ropui takin Industry te kan din mai dawn lova. Kan neih theih ve awmchhun hi chu Quality Education a ni tih kan hria. Chuvang chuan heng result nil school hotute hi kan Minister zahawm tak hian a chinfel dan a ngaihtuah mekin ka ring a. Transfer kual tur emaw, special coaching te emaw ni dawn tih te ka ngaihtuah. Chutih laiin Private H/S ah 3000 pawh hlauh mang lo ten an school result an ti tha a. Lungdaia kan private H/S neih phei khu chuan 1st division leh 2nd division-ah a pass tir vek mai a. An nupa in an hlauh zat chu ka hre lova, Private zirtirtute chuan 3000 an hlauh zo lo tih ka hria, an fakawm hle. Khatiang ang kha tum ila chuan H/S a thawk tawh B.A hi chuan engati nge maw nil result hi an neih le tih hi ka han sawi chak deuh a.

Tin, a dawt leha chuan Demand No. 34-na. Kan Vety Minister hian Mizote hian sa kan duh hle a ni tih min hria in ka ring a. Chuvang chu a nih ka ring a, min ngaihtuah hle a. Tun hnaiah pawh khan Vety Hospital renovation tur tam tak a siam a. Ka bialah khuan Kawnpui leh Lungdaiah pawh min siamsak dawn a, ka lawm hle a. Amaherawh chu, han sawibelh tur te erawh chu ka nei nual a. Nisapuiah sawn MNF Ministry pahnihaah khan VFA leh Chowkidar awm thin kha an bo daih mai a, khawi lamah nge an transfer kan hre lo a ni. A chhan leh vang sawi teuh lo ila, an transfer bo a. An tangkai khawp mai nghe nghe a. A bik takin Lungdai atanga hmar pheiawh sawn ran an vulh nasa a. Kan hriat angin Lungdaiah te phei chuan tuna kan VCP khu NLUP tih hmasak tuma bawng vulh hlawhtling berte zinga hmuh a nih avang pawhin inthlan hma pawh khan Bhavan-ah amah ngei kha alo lang a, kan en a nih kha. Chutiawng bawh chuan ran vulh kan uar nasa em em a khulai phei khuan. Ran a damloh in, tin, rai tir te an lo ngai a thingtlang lama kan mi leh sate an mangang em em a ni. Vawikhat lai phei kha chu Lungdaiah Doctor a awm lo leh nghal a, mangan chhiatin an mangang a. Tunah erawh chuan min pe tawh a, kan lawm khawp a. Chuvang chuan VFA hi ramdangah pawh an mamawh ve tho in ka ring. Nichina kan MLA zahawm tak Pu P.P.Thawla'n a rawn sawi tawh ang khan hmun 37 a awm thin kha tunah hian a awmlo a ni. Training te pawh hi an ko mek chu niin ka hria a. Heng te pawh hi a hmanhmawh dan a awm em tih ka hre lo. Tin, VFA lo senior tawh thingtlang a awm lova headquarter-ah khawimawi laia awmin ka hria a, chungte chu min thur chhuah sak sela he VFA hna hi hlauh tha zawk nen nuam zawkin an la thawk thei tho lawm ni, Pu Speaker, tih hi ka zawhna bawh a ni. Nisapuiah hian Compound te, quarters te pawh an nei vek a tunah erawh chuan quarter chu a awm tawh lova a hmun erawh chu Nisapuia kan VC ten an lokal leh hunah tiin a hmun chu an la zuah hram hram a ni tih kha min lo hriat sak bawh sela. Ka lawm e, pu Speaker.

Pu JOHN SIAMKUNGA : Pu Speaker, ka lawm e.

Awle hei budget kal phung hi i vei lam ami te pawhin an hre thova, budget kalphung hi a ngai reng lo tih kan hriat a ngai. Sorkarin ram a kaihhruai duh dan angin budget hi a danglam duai duai thei a Department tina sum an chan dan pawh hi Sorkarin ram a kalpui dan a zirin Department thenkhat an lawk deuhva, a then a tlem deuhva, chuvangin sorkarin ram a kal

pui duh dan ang zelin budget hi a kal mai a ni. Chumi nilova, nikumah chutiang chu a ni a, engatinge kan in tih vak vak hi a ni lo, sorkarin engti zawngin nge ram a kaihhruai dawn a, budget hi engtin nge a herh kau tih hi kan hriat thiam a ngai zawk a ni. Niminah khan ka bial Tarphe kawng kha pinga sawi a ni a, ka zawt fiah a, kawng hi a ping reng reng lo, a tlang reng a ni; thudik lo House a sawi kan ching leh zauh hi a tha lo khawp mai. Hmanah pawh NLUP sem chungchangah mobile phone an lei chur chur ang khan Lunglei West bialtu khan a sawi a, a hmunah kan kal a, Chief Minister te nen kan zawt fiah a, mobile pakua chauh an hralh laiin hralh chur chur ang sawi te a awm tawh a; mi 700 vel (beneficiaries te) sem an ni a, Mobile pakua an hralh a, nidanga an hralh dan thin te pawh zawh a ni a, thu dik hi sawi hram hram ni sela ka duh khawp mai.

Awle, Demand No. 20-na School Education chungchang hi a ni a, kan thlir hian School inspection chungchang hi kan uar lo viauin a lang a, hei hi a pawimawh viau in ka hria a. Tunhma kha chuan inspection uar a ni a, school endik thin a ni, chu chuan rah tha tam tak a chhuah a, vawiinniah chuan tu tu te emaw sawi kha kan hria a ni mai a. Inspector ina a report atang hian thil hi kal thei thin ta se la a duhawm mange aw ka ti a, chu lampang te chu kan Minister zahawm tak ten min lo chhinchhiah sak sela.

Tin, CCE kan kalpuinaah hian tha takin kan kalpui a, kan sorkar pawh a kal tha viau in ka hria a. Mahse, CCE kan kalpui chuan zirtirtu lamah kan in daih a ngai a, zirtirtu in daih loh naah hi chuan CCE hi a nih angin kan kalpui hlei thei lo a ni. Chumi a nih avang chuan tuna an khawih mek zirtirtu sem rual hna, rationalization of teachers hi chak lehzuah in kalpui sela tih kha ka han request duh a ni.

Tin, Hnahthial College-ah sawn Geography hi la an tam a, sawlaih sawn Geography subject hi hawn phalna chu pek an ni lo nachungin Higher Secondary lam atangin hemi subject hi la an tam avangin sawlaih sawn an rin hawn ve ta mai a, chutihlai chuan naupang hi an ngah ve hle mai a, kan Minister zahawm tak ten min lo chhinchhiah sak thei sela, saw tia an tawp leh mai saw chu a uihawm dawn a, a feeder te a tha bawk a, Geography subject saw min hawn belh sak lo a nih pawn, saw mi lampangah sawn concentrate a, min ngaihtuah deuh turin ka han ngen duh a.

Tin, Medical and Public Health, Demand No. 24-na hi. Hei, Health Worker Training School-te din a ni dawn a, a lawmawm hle mai a. Tin, Doctor indaih lo lutuk hi a pawh khawp mai. Health Care lamah theih tawpin sorkarin hma a la a, mahse, duh ang erawh chu kan thleng thei hauh lo mai a. Chutih laiin Sub-center te leh PHC building te tam tak sak belh tum te a ni a, hei hi nasa taka he sorkarin Health Care lam a ngaihsak zia a tilang in ka hria a. Tin, chutih lai karah Hnahthialah sawn Doctor an indaih lo riau mai a, Doctor pakhat chauh a awm a, damlo te an tam deuh thin avang leh a khaw thenawm ten an pan khawm thin avangin Doctor dang min dah belh thei em aw tih kha karawn request a. Tin, South Vanlaiphaih pawh Doctor an awm lova, chulai chu min lo chhinchhiah sak se tiin ka han ngen a ni. Kan hre vek a Doctor an duh zat lak tur an hmuh loh leh an hlawh a tlem si avanga tam takin an rawn luh duh loh thu te pawh kan hria a ni.

Demand No. 28-na Labour & Employment chungchang hi, kan ngaihthah rei tawh a, hei hi tuna kan sorkar chak tak hianin tunah hma rawn la in engtiang ang zawngin nge kan kalpui ang tiin tan a rawn la a, a rawn thuan chho ve zel a. Kumina an Budget pawh nikum te leh a kum hmasa te han thlir chuan sang tak ani tawh a ni. Chu chuan sorkarin a han kal tum dan a chu Labour & Employment lamah hian nasa takin tan a la dawn a, labour force kan ngah a, hengho te hi nasa takin train tir a tum ni te in ka ring a, chumi ka'n sawi duah nachhan chu tunah hian kan NGO, ram hmangaih tu tak tak ten hlawh bithliah na te an han nei a, helaiah hian kan tan ve deuh loh chuan Mizo te hi kan bet zawk dawn in alang a, hlawh inang rau rauva kan chhawr duh loh zawk a te kha an hlawh a sang ta daih mai a, kan chhawr duh zawka te kha an hlawh a hniam ta zawk si a. Chuvangin kan mite train hi a tul a ni, hlawhfa nih phung kan hre lova, hlawhfa awm dan tur pawh hi kan hre vak lo a ni. Chumi taka chu training kan ngaihna lai a ni a. Vawiin nia kan House Leader zahawm takin a sawi thin, "Mikhual tam takin ei an hmuh theih laia engati nge kan hmuh theih loh." a tih hi, helampangah hian hma la ta se la. Mi ina awmdan tur te, hlawhfa kan niha awmdan tur te, nungchang thlenga engtiang zawnga nun tur nge tih te thlenga kan inzirtir hi a ngai. Chumi a nih loh chuan vawiin niah hian chhawr theiha ram an awm lova. Kan chhawrlai mekte pawh, "Helai hi han siamtha teh", ti ila Mizo-ah chuan siam that ai chuan ban an duh mai a ni. "Ka peih tawh lo" an ti mai a. Hnamdangah erawh chuan han siamthat tir ila, an hlawh kha a kiam chuang lo tih an hria a, an siamtha mai a, lungawi takin. Chumi a nih avang chuan kan mite hi kan training tir loh chuan hmun dang atanga lo lutte hian kan ramah inhlawhna tur an hmu nasa si a, kan mite hi nakinah chuan a dawng dawng kan la ni dawn a ni.

Tin, thiam thil neih, carpenter a ni emaw, mistiri(cement) a ni emaw, hengte pawh hian inhlawhna an hmuh theihna tur chuan hlawhfa nunzia, hlawhfa kan niha kan nundan tur, kan awmdan tur, hengte thlenga kan inzirtir loh chuan nakinah inhlawhna hmu lo Mizo kan la tam dawn a ni. Tunah pawh kan tam a, kan tam chho mek a. Chuvangin, helamah hian L&E lam te hian hma a la thei ang em? A khawih chi a ni em? tih te kha ka hre chiah lo nachungin hetiang lampang hi chu khawih thei se chu a that ka ring a.

Tin, Trade & Commerce chungchangah hian, hei nasa takin kan sorkar hian hma a la a. Champhai lamah hma a la a, khawthlang Tlabung lamah hma nasa takin a la bawk a. Hmannia kan hriat tawh ang khan theihtawp a chhuah tak meuh tih kan hria a. Khilam Thingsai lamah te leh a piah lampang zelah leh chhim lampangah Sitwe thlengin theihtawpin hma a la tih kan hria a. Hengah te hian tuna kan sorkar chak takin hma a lakna hi a lawmawm takzetin ka hria.

Tin, AH & Vety lampangah hian Demand No. 34-ah. Hei hi market awmsa a ni a. Kan ZNP unautena, "A rate hre sain kan chin tir ang", an tih ang deuh hlek khan a rate hre sain tun NLUP-ah hian kan vulh tir a ni. New Ngharchhip-ah leh Ngharchhip velah khian ranvulh an thlang a, bawng vulh an thlang a. Tunah khian an bei mek a, society an indin a, a society-in a kengkawh a. A chi tha neih theihna turin Burma-ah te han kalin an han dawr pawp bawk a. Tunah khian khilai hmun khi Burma lam atanga bawng an rawn khalh luhna hmunpui ber a ni a. "Engzat nge kum khata an khalh luh thin te lo chhiar teh u." te hi ka ti thin a. An han chhiar hian a tam thin em avangin, "Khatiang zat pawh kha ni lo se la, hmun lia thena hmun khat tal in

vulh theih chuan market tha tak in nei dawn a ni. Chuvangin, hetiang lampanga Mizoram chawm hi tum teh u. In chawm thei hauh lovang a. Lunglei in chawm theih paw'n helai bial hi chu ran vulh avanga mihausa awmkhawmna in ni thei ang." ti tein kan inhrilh a. Tunah pawh khian nasa takin an bei chho a. Tin, AH & Vety hian chutianga nih bawk avang chuan a bul lawk, Thingsai-ah dispensary te minrawn sak sak dawn a, a lawmawm takzetin ka hria a. Tin, South Vanlaiphai lamah pawh hetiang hian nasa takin hma an la a, ran vulh an uar a. Chumi a nih avang AH & Vety hian dispensary min sak sak dawn bawka, Hnahthialah te, a lawmawm tak zel a ni. A tawp bera kan sawi duh chu kan budget hi a tha a, budget kalphung hi sorkarin a mipuite hruai a tum dan zir zelin, a inthlak danglamin a thenah a dah tamin a thenah a dah tlem thin a ni tih kha kan hriat atan ka duh a. Chumi ni lova, he department-ah hian a tlem bik, nikumah, hmanah chutianga ni si ti zawnga kan chhut kha chuan, chhut dan fello leh chhut dan thalo, chhut dan mawl tak niin ka hria a, ka lawm e, Pu Speaker.

SPEAKER : Pu H.Zothangliana.

Pu H. ZOTHANGLIANA : Ka lawm e Pu Speaker, A hmasa berin demand No. 20-na School Education chungchangah kan Minister leh amah thlawp tute hmalakna a zarah RMSA te SSA sum hmang te in kan bialchhungah leh bial dang dangah, zoram pumah hma lakna nasa tak a tak takin kan hmu mek zel hi a lawmawm ka ti a. Ka bial chhungah pawh School thar te min sak sak a, tin, a awmsa nasa takin min thumthat sak mek bawk a, hengte avang hian tawi te talin lawmthu han sawi hmasak hi ka duh a ni. Chutih rual chuan lawm a kim tawh lohna lam pawh thailan ka duh a, Lawngtlai District-ah sawn High School 14 kan nei niin ka hria a, chung zingah chuan School 2 chiah in Headmaster tak tak an nei a ni, hetiangah kan awmna hi a rei tawh khawp mai a, kan Minister pawh hian a hria a, thahnem ngai takin a buaipui a ni tih pawh kan hria a. Amaherawhchu dan 'rules' a lo awm avangin leh chu rules chu kan hotuten an ngaihpawimawh loh theihloh avangin thiltih fel duak duak a har khawp mai a. Dan angah chuan Headmaster-ah chuan a senior-a te kha promote tur an ni miau si a, an han promote a, zirtirtu senior pui pui khawi khawiah emaw a bik takin hmunpuilam zawk a lo inbengbel nghet tak takte an ni tlangpui a, chung ho chu an pension dawn aruaia thingtlang lama hlawhpung chuang em em mang hlei lova in sawn kha an duh thin lo va. An duh loh thu kha thuneitute hnenah chawp leh chilhin an thlen mai chuang lo lehngal a, engemaw chen ngaihchan hnuah, chhuanlam an han siam kual a, a loh theihloh hnuah an declined a, chutih chung chuan thla 5/6 te, a aia rei te hun a lo kal duai mai a, a dawtah an ni aia junior deuh zawk senior kha promotion pek a han ni leh a, chu pawh chuan chutianga bawk chuan a han hnuk khawtlai leh a, chungte avang chuan a bik takin thingtlang lamah keini bial chung chauh ni lovin Zoram kiltin maiah hian harsatna tam tak min thlen a ni. Hei hi kan Minister leh kan hotute hian a tul a nih chuan a rules relaxation lam a te pawh hi an ngaihtuah mai a tul tawh a ni lawm ni tih hi ka rilruah hian a lian khawp mai a. Chu chu tawitein ka'n tarlang zawk duh ani, demand a tam avangin ngaihpawimawh zawng zawng kan sawi seng lo ang a, kal puat puat a ngai a.

Pu Speaker, Demand No. 24 - Medical and Public Health Services-ah hian lawmthu sawina tur tamtak a awm rualin pakhat chauh han sawilan ka duh bik a awm a Lawngtlai-ah ANM (Health Worker) Training Centre kan

Minister-in min dabsak dawn tih kan hria a, kan lawm tak meuh meuh a, a mipui aiawhin vawiih hian he House kaltlangin kan lawmthu hi ka puang chhuak ve duh hrim hrim a ni. Lawmthu kan sawi rualin a chuti deuh tih erawh kha chu sawitel ve zel a ngai a. Thingtlang lamah baw Doctor kan nei thei hlwllo hi a manganthlak a ni. Keimahni lam tawngin a uar nan, a fiah nan, kan nei thei hlwllo hi ka ti a nih chu. A mangan thlak khawp mai, Pu Speaker, entirnan ka hriat chian ve chin example-ah han tarlang ta ila, Sangau-ah te chuan Ministry inthlak hma lawk khan Doctor awm chhun chu P.G zir turin a chhuak a, chuta tang chuan vawiih thleng hian Doctor kan nei thei lova, Bualpui NG-ah khian Doctor a hmingin a awm der der a. “Ka pu, hei hi i lak chhuah loh chuan a thi mai ang tih kan hlau” kan ti a, kan Minister hnenah kan sawi a. Nimahsela lak chhuah mai kha chu a remchang bik lo a niang, replacement a har thin baw si a, kan hlauh ang ngei ngei in min thihsan ta mai baw si a, paw kan ti hle a, vawiih thleng hian a ai thlaktu tur kan la hmu zo lo a ni. Hetiang karah hian kan Minister te leh thuneitu ten theihtawpin kawng min han dap sak thin a, Doctor te tlawmngai turin an ngen a, an hlauh tepawh Central Sorkar ina a tuk sak aia tamin an han ruahman sak a, chuti chung chung pawh chuan Doctor te hi kan mithiam chungchuan te, kan chhuan tawlawl te an ni a, chumi avang chuan an hlu em em a, thingtlang kilkhawr te tea kal lo hian, Aizawl leh hmunpui dang zawkah hian State pawn lam thlengin inhlawhna tur an hmu seng khawp mai si a. Thingtlang lama kal an tan a harsa em em thin a, RCH-a contract Doctor te, a biktakin a mithar deuh chan chang an nih avangin thingtlang lama kal tura tih an ni thin a, thingtlanga kal ai chuan an bang deuh zel a, Aizawl-ah ringawt pawh hian Private Clinic-ah leh khawi khawiah emaw an inhlawh a, Private Hospital-ah te. Thla khatah a junior pawl pawhin cheng sing 4/5 hi chu harsalo te in an hlauh thei vek mai si a. Chutiang ang chu a nih avangin anni ngawt nilo deuh, 3(F) Doctor, Ministry hmasa ina a dika dawh thlu lutuk lem lova an lo lak, mi 66 te kha Sorkar-a luh theihna chance a awm hunah chuan loh theih loha duhsak turte pawh anni sa deuh baw a. Chuvangin, 3(F) Doctor te kha thingtlang lama kal tur zawka tih te ni se, an hnial lo deuhin ka ring a ni. Chutiang chuan kan hotute hian ngaihtuahna min siamsakin action min laksak thei se kan mamawh mang e aw, tih kha ka han sawi duh a ni.

Trade & Commerce Demand No. 44-ah sawi tur tam tak karah Kolodyne Multi-modal Transport Transit Project tihpuitlin a ni chho mek hi kan lawm takmeuh a. Zoram mipui tan thil hlu leh ropui tak a ni tih hi inhriat sa leh kan hriatsa mah nise, ka sawi nawn duh. Hemi chungchangah hian thil lawmawm deuh mai - Chhim lam hi a chhe lam tehkhin nan min hman teh fo a hi a ni ngawt lo a ni - tih sawilan tel ka duh a. Nangni lam Hmar lama compensation a in buai luai luai lai hian Chhim lamah chuan Km 100 vel zet kawng an lai mek a, compensation-ah kan buai ve nuaih nuaih lo, a felfai riau. Chungu nungchung buk, chu e kha e, ti a, kam chhe tleuh nana min hman fo a pawh hi a ni vek tawh bik lo a ni tih hi ka sawi duh a ni. Engpawhnisela, hei hi thil lawmawm tak a ni, Compensation scandal kan nei ve lo a ni tih hi Zoram mipui hriatah ka puang duh a ni. Chutih rual chuan he Project a hi chak taka umzui a nih a pawimawhin ka hria a, kan hotuten tunah pawh an ngaihven em em rual hian min umzui sak chak zel se tih hi ka han sawi duh a ni. Hun ava tawp hma dawn em Pu Speaker, Pu Hmingdailova Khiangte ina a hman zawh loh kha khawngaih takin min ‘bawksik’ ve mai rawh. Pu K.S. Thanga pawhin ka ai pawh i sawi nghal thei a ti a Pu Patea’n a

chhuah hma khan a ti bawk a. A nih leh engpawhnise, min phalsak tam leh tak tak dawnin ka hre lova, i vei lama thu ka nih ve loh vang hi emaw ni?

DM&R Demand No. 30-ah hian kan Minister zahawm tak Pu Nihara chungah hian lawmthu ka sawi duh a, Silpauline min sem liam liam thin a kan lawm tak meuh a ni. Chutihruual chuan Ministry hmasa chhung khan kan senior te ka zawt kual thuak thuak a, MNF Ministry chhung khan vawiina kan pu tena in tih ang hian an lo ti ve hauh lo a ni tih ka hria a. Social Welfare a ni emaw, DM&R a ni emaw, Department dangah te, nangni kan pu te, senior te Opposition a in thut lai khan engmah an lo chantir ve ngai lo che u a. Chu chu hre reng chungin in tha hi ka han ti em em khawp a, Ha aiah ha ti lova, in chan ang tho innaute Opposition in chantir zel tho a hi a tha hle ka ti a. Ka lawmpui hlawm a. Chutihruual chuan i veilama thute chan hi tihniam chuang lovin, titlem chuang lovin Ruling Party member te hi chu kan pu te hian Khawngaih takin tlem chuan min han vur ve deuh sela, inthlan te pawh a hnai ve deuh tawh alawm mawle.

Pu Speaker, hei Labour & Employment Demand No. 28-ah hian Lawngtlaia kan Office chauhrauh zia hi ka'n sawi zawk duh a Hman kum atangin a hming chuan a awm ve a, Grade IV pakhat, chutah pawh engtia kan tih thu lovah harh vang tak ni lem lo hian a thutchilh ve ngar ngar a, tun Ministry tharah hian heti em em chu min ti a, clerk pakhat min pek belh a chu chuan Saiha atangin lang in minrawn vil zeuh zeuh va hma chu kan sawn kan lawm. Amaherawhchu, kan duh khawp lo, kan kham khawp lo em em a ni. He Employment Exchange Office hming pu ve lem hian sponsorship pawh an ti thei lova hengte hi khawngaih takin thuneituten min en fel sak thei hram se kan va mamawh tak em kan ti a ni.

Awle, engpawh nise Pu Speaker, ka duhtawh mai ang e, hun chu min pek belh hrim hrim a ka lawm khawp mai. A tawp nan tak tak chuan demand no. 21 Higher & Technical Education chungchangah thil dang tam tak sawi tur ka neih rualin Lawngtlai College atangin Lecturer min sawn chhuah sak hnem tawh lutuk a, khawngaih takin min sawn chhuah sak tawh suh u tih hi kan mipui zawng zawngte aiawhin he House-ah hian ngenna ka han siam ve duh hrim hrim a ni, eng anga hmehriat nei tha leh thil ti thei pawh ni selangin Lawngtlai atanga Lecturer sawn chhuah a an post nena an kal emaw khawiah emaw an attached bo daih a hi kan remti tawh lova, a replacement/aiawhtu kan hmu thei bawk si lova, kan khawngaih thlak ve em mai, saw lama kan College neih chhun tlemte te zing a mi a ni, engpawh nise hei hi min hriat sak hram hram turin kan pu te, kan hotute kan ngen a ni e. Pu Speaker, ka lawm e.

Pu K. LIANZUALA : Pu Speaker, ka lawm e. Demand No. 4-naah hian kan tan ang a, kan House Leader zahawm tak kaihhraina hnuaiyah Congress Party in a manifesto te ti hlawhtlingin Law Commission a din a. Dan kan neih mek te ennawn a siamthat ngai te an siam tha a, tichuan, tunah hian tangkai taka hman ni te pawn a lang a. Chutihruual chuan Pu Speaker, kan sawi duh chu dan leh hrai lamah mihring kan lo harh chho zel a, he kan Law Commission vawiina a dinhmun angah hi chuan thuam chak fe a ngaiin ka hria a, chuta tana pawimawh hmasa ni a kan ngaih chu Law Research Officer

Dan hre mi, Dan thiam kan mamawh niin ka hria a, chu chu kan Minister zahawm tak hian min hriatsak se tha ka ti a. Tichuan, tunah hian kan Law Commission Member te hi, Pu Speaker, full time an awm lo niin ka hria a, nihna dang nei, hna dang chelh an nih avangin he Law Commission pawimawh tak, kan ram kalchho zel a pawimawh tak ni tur hi a nih tur ang a nih loh phah ni te pawn ka hria a, a khat tawkin meeting an nei thei chauh a ni. Chuvang chuan, hei hi kan ennawn ngai, kan thuam that ngai niin ka hria a, tin, co-terminous staff bak saw an nei meuh lo a ni, henge pawh hi regular a hna lak theih, pek theih te pawh an ni lawm maw ni le, chu chu a pawimawhna hriain Sorkarin, Minister-in ngaihtuah na hmang se tih hi ka'n ngenna a ni a. Tin, tangkai zawkin State dangah te leh Central ah te pawh Law Commission hi an hmang niin ka hria a, chuvang chuan hetiang ang te hian kal ve theih dan te a awm em tih hi ka'n sawi duh a ni.

Tin, hei kan Mizo hnam dan, customary law te kan han nei a siam that te hi a ngai fo thin a, hnam dan te hi. Tunah pawh hian kan NGO te, MUP kan tih te leh MHIP te pawh a niin ka ring a kan hnam dan hi tha tawk lo ni te pawn an sawi a, heng te hi siam that a en that a ngaiin ka hria. Chumi tur chuan kan Law Commission bawh hi kan thuam chak, kan siam that ngaiin ka hria a. Chutiang ni tur chuan siam that ni thei se a lawmawm hle ang tih hi ka ring a chu chu ka'n sawi duh a ni.

Tin, Demand 20-na, School Education chung changah hian Pu Speaker, ka starred question kha a chhuak hman loh hlauh a. Hei kan House Leader zahawm tak hmalak na leh rem hriatnaah hian Mizoramin a kan mamawh leh kan thangthar te tana thil pawimawh ber, kan hnam ro hlu ni tura ka ngaih Sainik School, Chhingchhipah khian kan nei thei dawn a ni tih kan hre tawh a. Chhingchhip khua an fakawm hle in ka hria a, compensation an uar lo a, nichina ka hma a mi sawi ang khan, an teak huan rei tak an lo enkawl tawh te, an ser huan te, a then pheh chuan Ngiau an ching a ni. Pu Speaker, keimah ngei pawh a hmunah ka kal a, ram tha tak a thlawnin an pe a ni. Chu chu chanchinbuah te kan lo hmuh angin DoNER Ministry atangin cheng vaibelchhe 82 zet hmuh niin kan hria a. Tin, 12th Finance Commission atangin vaibelchhe 50 zet hmuh ni bawkin kan hria a ni. Mahse ka starred question un-starred a leh tak a chhannaah khan hma thar em em a awm in a lang lo a, a muang riau in ka hria a, he thil hi, a hman hmawh theih deuh lawm maw ni le! kan hnam ro hlu pawimawh tak ni si hi ka ti a ni. Nimina kan Senior pakhatin a sawi ang khan Sainik School hi lungpui chungah nghavawk theih nghilh ang mai hian a reh vawng vawng mai ang tih hi ka hlau khawp mai. Chuvang chuan kan Minister zahawm tak leh Sorkar hian tan la se ka duh khawp mai a, chuti lo chu nakin zelah kan hnam ro hlu tur hi, hei a Sorkar ang pawhin sawi ta ila Pu Speaker, kum 2 leh a chanve term kan hmang der tawh a pawisa sanction thawm kan hriat kha kum a liam tawh a ni. Mahse vawiinah chuan bawngtuthlawh cheh khat pawh la cheh a ni si lo hi a pawi ka ti khawp mai a, hei hi enzui a hmalak theih dan awm se tih kha kan Minister zahawm tak leh Sorkar pawh ka'n ngen duh nghal bawh a ni.

Tin, RMSA, nichina an sawi tawh ang khan kei pawh Department leh Sorkar duhsaknain bialah khaw 7 ah RMSA hnuaiyah building sak ve te kan nei a, a lawmawm ka ti khawp mai a, ka tang ve a bialtu nihna angin, an sak

that loh ka hlau a ni. A hmunah Pu Speaker, ka tlawh veka camera nen ka kal a ni. An sa tha hlawm khawp mai. Tin, thingtlang a ni a balu te, rora te, hman rua te an tha lo chungin a tha thei ang ber hmang turin kan in ti a, Silchar atang ten Brick te Balu te an la ngat ngat a ni. Chutih ruala kan sawi tel duh erawh chu pawisa lam harsat vang a nih chu ka ring tho naa, pawisa a harsatzia kan hre theuh a hna an thawk hlei thei tawh lo a ni, engatinge in va chhunzawm muang ve ka ti a, min chhanna chu pawisa sanction kan hmu thei lova, pawisa awm lova kan thawk hlei thei lo va kan chawlllo thei lo a ni tih hi min chhanna ani, chu chu kan Minister zahawm tak hian hma chaktaka min lak sak a, heng hi kan zavai atan a nih ka ring a, RMSA building-te hi sak zawh thuai thuai kan nghakhlel tlang em em a ni tih kha ka'n sawi duh ani.

Tichuan, Demand 24-na Health Department lamah hian, hei kan Health Minister zahawm tak chungah hian lawmthu han sawi ka duh a. Hei a hminga kan bial veah hian PHC te, hetiang ang hi kan nei lo hle a, Chhingchhip-ah khian SHC kan nei a, chu chu NRHM hnuaiah buiding tha tak mai min sak sak avang in lawmawm ka ti a, chutih rual erawh chuan Ngentiang-ah khian sorkar hmasa-ah khan PHC hawn a ni a, Pu Speaker, i hre chiangin ka ring a, Tuichang kama awm kan ni a, hei kan Health Minister zahawm tak nen hian Constituency-ah kan inrina a ni a, a chhak tlangdung a bialah chuan khawtin deuhthawah khian PHC changtlung tak a awm deuh vek mai a, keini biala awm ve chhun khi a han hlat deuh vang te pawh a ni mahna le ka hre lova, tunah khian kan dinhmun a tha lo a ni. Staff kan indaih lo hle a, kan damlo thei nasa, Pu Speaker, nichina Pu Hmingdailova MLA zahawm takin a sawi ang khan Malaria infected hmun a ni khi lai khi, Tuichang kam a ni a, a lum em em a, hnathawka ramriak nasa an ni a, doctor kan nei a a fel thlawt mai a, kan Doctor erawh chu a awm nghet tha a kan lawm em em a, amaherawhchu nurse te Staff dang te leh hmanrua medical supply te, a han thlalara kan nei hlei thei lova chu chu a paw ka ti a, khaw pasarih velin kan intawm a ni. Khi damdawiin khi a pawimawh khawp mai a min thuam saka kan mamawh te min pek sak turin vawiinah hian kan Minister zahawm tak hi kan ngen in kan chah duh a ni.

Demand 34-na Animal Husbandry-ah hian Pu Speaker a hminga kan bial ve hi NLUP tih hmasak khan a ti tha pawl kan niin ka hria a, ranvulhah khian kan ti tha em em a, chuta dingchhuak ta khi khawtinah khian sawi tur an awm a ni. Tichuan Hmawngkawnah khian tunah Sial an la vulh a, Bawng an vulh bawk a, Mizoramah chuan chawl miah lova Se vulhna awm chhun khua a nih te pawh ka ring a. Chu chu tunah pawh hian an thlang deuh vek a ni khaw 4 khaw 5 khian. Entirnan Vety lama damdawiin kan tih ang chi dispensary hi kan nei lo em em mai a. Hmun khatah erawh chuan Chhingchhipah min han repair sak ve hram a. Hei hi a Minister chungah pawh lawmawm ka ti a. Tunah hian ran vulh an thlang a. An hlawhtling leh ngei dawn a ni.

A hminga bialtu kan nihna ang pawhin zirtirna pawh kan in pe tha a ni. Chuvang chuan lo hria se kan minister zahawm takin ka duh a. Khilaiyah khian khawlian khaw 6 vel kan nei ve a. Chhingchhipah chauh mai dispensary kan neih kha a tawh dawn lo a ni. Ran vulh nasa kan nih avangin a tam dawn a ni. Chuvang chuan hmun dangah te min dah belh sak ka ngen a.

Tin, Lungphoah te repair ngai em em mai kan nei tawh bawk a. Chu pawh chu min hriat sak se ka duh a. Chuvang chuanin vety hmun constituency tinah hian Pu Speaker, a theih em ka hrelo kan minister hian min hriat sak se. Vety Hospital

te pawh hi min dah sak thei lawm maw ni le? Constituency pakhatah pakhat tal te chu. Dispensary kan han nei a, VFA pawh an awm mang lova a chang chuan, rana eizawng kan ni dawn sia.

Ran damlo, IV Grade ten an han chiu ve nawk nawk zel mai hi a ni a, ran dinhmun hrechiang lo khan khatiang te a nih avang khan Pu Speaker, minute khat lek. Vety Hospital hi constituency pakhatah pakhat tal te hi chu min dah sak thei lawm ni? Hun te a zo tawh a. Pu Speaker, ka lawm e.

SPEAKER : In sawi lak lawh lai deuh pawhin in hun a tawp khan in han bawk thei zela, chutah lawmthu min la han hrilh zela. A lawmawm khawp mai. Tunah chuan Pu Lalrobiaka i lo ko leh ang.

Pu LALROBIAKA : Pu Speaker, ka lawm e. Hei demand kan han sawiho a, a tawpah khan remti ti khan kan tluk pui leh dawn che u a, churang chuan kan minister-te, a demand neitute khan kan sawia hi min lo ngaih pawimawh sak tur che u in ka han ngen hmasa duh che u a. Chutih rual chuan sawi tur a tam khawp mai a. amaherawhchu kan sawi vek seng lo vang a.

Tuhma angreng, kan sawi duh chu kan bialtu hrang hrang tena an sawi kha keini bial lam ka lo in compare in anni kha chu an la tha viau zawk niin kan hria a. Hei Mizoram leh western countries te an inan lohna chu khawvelina western countries an tih hi chuan advance country, hmasawna ina a lo kalna hmasate a ni deuh zela. Amaherawhchu, vanduai thlak takin keini ramah erawh chuan khawthlang ho erawh hi chu development-ina min thlawhsan kan ni deuh tlangpui a ni.

Tichuan, chung avangte pawh chuan sawi tur a tam khawp a. Kha Bialtu hrang hrang tena an han sawi kha kan lo ngaihthlak in an ni kha chu an la tha viau a ni tih kha kan sawi duh a. Tichuanin demand 20-na leh 21-na kha kan sawi pawlh nawk nawk anga. Heti zozai hi sum an awm thei a. Hetih rual hian hei hi chuan hna a thawk ang tih ka ring a. Chutih rual chuan keini bial hi sawi tak ang khan development-in a thlawh khum kan ti dawn nge ni, chutiang chu kan nih avangin mamawh kan ngah em em a ni. Tunah hian Dampa bialah hian khaw 32, sub-village te nen kan awm a ni a. Chutih rual chuan khaw 32 mipui enggemaw zat awmna ramah khuan Plus 2 zirna hi kan la nei lo a ni. Kha, member zahawm tak te chuan in neih thu leh zirtirtu te pawh in duh thu in han sawi a. Keini chuan a zirnaina pawh hi kan nei reng reng lo a ni. Vawinah hian a vanduaithlak ka ti a. Helaiyah kan minister te pawhin min lo hriatsak sela. Ani Education Minister hnenah pawh hian vawi tam tak kan sawi tawh a. Tunah hian Phailengah private-in mi tlawmngai ten an din a. An result lah chu a'n tha thei em em lehngal a. 100% te an han passed a, 12-ah te pawh. A hminga bialtu nihna angin chawimawina hial te pawh han pek tha ka ti a. Amaherawhchu hun leh sum leh pai ten min la permit loh avangin chawimawina ka la ti thei lo a ni, chutiang chu a ni a.

Tin, chumi piah lamah chuan minority, Bru unau te leh Chakma unau te nei kan ni a. Khaw enggemawzat kan nei a. Zirna lamah kan tlahniam em em a. Tin, zirtirtute pawh hian tuna kan lak thar angah te pawh hianin min zuam deuh em maw ni chu aw, tih te ngaihtuahnaah a awm lek lek a. A then churawn awm duh

mang lo, hna hmuhna atan chauha duh te kan awm a ni. Chutiang chu a ni a. A bik taka minrawn ngaihven te pawh thain ka hria a.

Tin, ka'n sawi duh pakhat, nikum khan na deuh maiin Cyclone in Silsuri khua a nuai a. Kei pawh a hmunah ka zu kal a. Chumi tum chuan Deputy DPC (SSA) Mamit, Education atangin ka hruai a. In 60 chuang a tlu a. Tichuan Middle School leh Primary School luah tlak lohvin a tichhe vek a ni. Hetih lai hian tun thleng pawhin mau hnah inchunga hman thin te, mau a lo tam avangin hman tur a awm si lova. Baihvai takin zirlai te an awm a ni. Tichuan Tour programme te leh Report te kan han pe a. Vawiin thleng hian Bawng In atan pawh a itawm lohah tunah hian Silsuri bikah hian naupang te 200 rual sikul an kal a ni. Hei hi, Pu Speaker, kan minister zahawm tak hian min en sak sela, min sak sak sela tih hi ka'n duh a. Ka'n sawi tel nghal bawka ni. An khawngaihthlak a ni. Vawiin niah hian an rilru tak takah pheichuan, hmanni khan an VCP a lo leng a, 'heti em em mai chu, thlauhthlak kan nih dan em em mai hi National Human Right ah te kan thlen mai dawn em ni? tih te hi ka rilruah a awm rum rum', a ti hial a ni. Vawiin niah hian Inspector emaw District Education Officer emaw chutiangin tumahin kan report hnu pawhin an la en lo a ni. Chutiangte chu kan bialte an ni a, kan vanduai a. Chuvang chuan nasa zawka tan min lakpui hi a ngai a ni tih kan sawi duh a ni.

Tin, entirnan, a chuanchung kan han tih, Kanghmun tlangdungah te, a bik takin Elementary lamah zirtirtu kan nei chhe em em a. Head neihna fumfe pawh hi kan nei mang lo a ni. Bawlteah khuan an Head a accident a, a che thei si lova, aikal ang deuh ten tih dan tur a awm lo'm ni, te kan han ti a, mahse aikal kha kan phal tawh si loh avangin E.V. pakhatin naupang 78 vel bawka enkawl a. Tunah zirna thar an ni leh nghal a, zirtirtu pakhat tan chuan a tih ngaihna hi a awm lo reng reng. Kan sawi vek seng lo ang a, a tam khawp mai. Chutiang chu kan dinhmun a ni. Hmun hrang hrangah khuan min han zir chiang ula, a bikin minority kawlte leh, minority kher lo a pawh khu kan rilru lam a ni emaw, kan hmasawna hi helaiah hianrawn dak phak ve turin ngaihtuahna zau tak leh in khawngaihna karawn dil a ni, Pu Speaker.

Tichuan Medical : Demand No. 24-na, hei, a amount pawh hi a tam khawp a, a lawmawm ka ti a, kan Minister pawh ka'n lawmpui a. Heti zozai nei ta chu kan bial lamah te pawh vung arawn chhuah thar turah han ngai phawt ila thain ka ring a. Tichuan hei, keini bial, a bik takin West Phailengah te kan harsatna kan sawi thin a, a theih ang angin min tanpui thin a, chungah chuan lawmthu ka sawi duh a, chutih rual erawh chuan hei aia nasa in minrawn hre turin ka duh a. Khulai khua khu kan Minister khua hi a ni ve tho bawka, chulai chu ka'n sawi duh a.

Tin, an PHC, Phailengah khuan doctor te chu kan nei ve a, amaherawhchu Aizawlah hian anrawn refer chho zung zung mai a. Chung avangte chuan harsatna eng eng emaw kan tawka. Tin, khulai khuan hmanrua te a awm tha lo a, X-ray khawlte min han pe ve a, technician min pe leh bawka si lova, X-ray khawla pawh kha a chhe tawh mai thei a ni. Chutiang vel te chu kan ni.

Tin, Reiek damdawi inah quarter te kan mamawhzia hi kan Minister zahawm tak hian min hriatpui a. Tun tumah hian min tih sak ve dawn ni awmin kan hria a, kan lawm hle mai a. Chutih rual erawh chuan, Kawnpui lam bialtu in a sawi ang deuh khan, Reiek hmuna kan Health Sub-Centre khu chu a luh pawh ka lut ngam tawh lo, an do kalh teng tung mai a, a chhuat nise kan tlahawlh palh ang tih hlauhawm

khawpin a awm a. Amaherawhchu hmun dang a awm chuang si lova, an la luah a ni. Chutiangte a nih avang chuan vawiin niah hian nasa zawk a min ngaihtuah a ngai a.

Tin, a bik takin Phaileng kha han sawi leh ila, District pumah hian malaria hmun a nih avangin District Headquarters ai pawhin patient Phailengah khuan kan ngah zawk thin a ni. Amaherawhchu a enna khawl te, technician han neih loh changte leh eng eng emaw kan nei tam em em a, chuvangchuan Aizawl ah anlo chho zel a, chungte chuan harsatna tam tak min thlen a, tin, hetah hian hmanraw tha zawk te, tin a thawk tute pawh nasa zawka minrawn equipped hi kan mamawh hle a ni tih kha kan sawi duh a, tin, patient an tam a, mipui kan tam bawk a, tin, hetah Tuipuibari atang te, hmun hrang hrang atangin khulai khu anrawn pan khawm a ni. Chuvangchuan chei that kan ngai a, cheithat pawh hi kan awm kan in ti a ni tih hi kan sawi duh a.

Tin, Animal Husbandry & Veterinary ah hian Demand-34 naah khan, han sawi chho veleh ila, MNF sorkar, sorkar hmasaah khan an sorkar phat atangin khawtin deuh thawa VFA te awm thin leh quarter-te pawh awm thin a kha, VFA khawiah nge an sawn chhuah tak kan hre phak tawh lo a, quarter atana khawtina an lo pek leh quarter a te chu tunah hian a rawih chhe mek a ni. Chutiang te chu a nih avangin a Phaileng chauh mai kha minrawn pe a, kan Minister khan, khaw dang dangah pawh hian min pe belh nghal turin kan ngen nghal bawk a ni e, ka lawm e.

SPEAKER : Tunah chuan Pu C.Ramhluna thusawi turin i lo sawm ang.

Pu C. RAMHLUNA : Pu Speaker ka lawm e. A hmasa berin Demand No. 4-ah khan kal ta ila, kan sawi duh chu tunah hian MJS Officers post 21 vel a ruak niin ka hria a. Hei hi tukin zingah pawh khan kan hria a, House Leader zahawm takin a sawi a, kan Legal process hi a chau em a ni e, a ti a, a sawi a, hei hi indaihloh vang te pawh a ni thei a, chuvangin heng hote hi arang lama hnawh khah sorkar hian a tum em tih kha ka zawhna ni sela. Chumi rual chuan kan sawi duh chu he post 21 hi kan hnawhkhat dawn a nih pawhin vawi khata han hnawh khah vek mai ai hian a Stage deuh hleka hnawh khah hi a tha ang em? A chhan chu kan zirlai lokal zel atan te pawh khan incentive pek ve a kha a tul mai awm mang e aw, tih kha rilruah khan a awm deuh a. Post 21 ruak kan hnawh khah vek mai khan a zirlaite tan khan prospect kha a chau dawn riaua hriatna ka nei a, chu chu kan sawi duh a, chumi rual chuan kan Minister zahawm tak hnenah lawmthu kan sawi duh chu Sub-District Judicial Magistrate pakhat Lawngtlaiah min han dahsak ve ta a, tun hmain Lunglei lampangah kan thawn thin a, Case tam tak ngaihtuah ngaite tunah chuan kan hmunah kan ti ve thei ta a, a lawmawmin ka hria a, chumi rual chuan quarter tur te hi min ngaihtuah sak sela tih kha ka han sawi duh bawk a.

Demand 20-naah khan School Education ah khan han kal ta ila, hei tukinah hian an allocation a sang tha viauin ka hria a. Hetah hian thil tam tak sawi tur chu a awm ngei mai, mahse hun kan nei tlem si a, chulaia ka han sawi duh chu, assistance to Non-Government Primary Schools te, Middle Schools te, operational blackboard te, High Schools te, Higher Secondary Schools te, khamiah khan tanpuina kha a lo pung ta viauin ka hria a nikum lam ai khan hei hi lawmawm ka ti

a. Hei hianin School ho an salary lampang leh benefit hrang hrang an neih an demand ve renga kha engemaw chen pek theih a nih ka ring deuh hlek a, chuang chuan hei hi lawmthu kan sawi ni sela. Kha lampang kha kan Minister zahawm tak hianin lo en uluk deuh hlek sela a thain ka hria a.

Tin, kan sawi leh duh chu Education Reforms Commission Recommendation-a kha sorkarin a pawm tawh tih kan ngaithla a, helaiiah hian thil pahnih han sawi duh ka nei a. A pakhatnaah chuan Adult education hi ka ngaipawimawh riau a, ka bial khu Mizoramah pawh literacy percentage a kan hniamna a ni a, chuang chuan hemi adult education hi hma min laksak sela a tul riauva hriatna ka nei a. Hetah pawh a rawn sawi a Education Reforms Commission Recommendation-ah khan establishment of peoples education centre tihte hi siam ni sela a ti a, khami kha a awm thei te a nih ngai chuan kan mipuite hianin anmahni In leh lo atangin ziak leh chhiar thiam lo te pawhin an zir thei dawn in ka hria a, chu chu a lawmawm ka ti a. Tin, chumiah chuan hei Directorate-te pawh a nei hranpa ve a, hlawh pawh tam tak nuai 32 leh sing 2 te, State Administration atan pawh nuai 30 leh sing 1 te an nei a chuang chuan hetiang Directorate hranpa deuh thaw a an dah ve pheih chuan thil tihtheih turah ka ngai a, chu chu vawiinah hian ka han sawi duh a ni.

Tin, ka han sawi leh duha chu private school hi Mizoramah hian a tam em em tawh mai a hemi hi Education Reforms Commission pawh khan a hria a ni. Nimahselangin hemi private schools ho hi, anni pawhin sorkar hian recognize sela, enkawl tha sela tih kha a duhdan a ni a chumiah chuan sorkar a beisei dana chu panel inspection te hi nei sela tih a ni a. Panel inspection hi once in three years nei sela, tichuan private school hova kha school norms ina a phak loh hova kha chu in siamthat dan te kha anmahni leh anmahni khan an nei ve anga. Tin, department pawh khanin “chutiang/khatianga in tih loh chuan school khar a ni ang” ti ang khanin warning te pawh an pe ve ang a. Tichuan Education lamah khan a quality lamah an kal tha thei ang tihte pawh kha an rawn recommend a, hetiangte pawh hi implement theih ni sela a tha hlein ka hria a.

Tin, chubakah chuan private school a thawk hote hi a theih hram chuan provident fund tihte leh anmahni tana benefit awm thei hrang hrangte kha tihsak ve ni sela tih kha an recommend a. Helaiiah hian thil pakhat kan sawi leh duh chu khulaiiah khuan Divine Intervention School, Vaivakawnah khuan a awm a, khu khu a tha viauin ka hria a, ani chuanin P.F. te pawh hi a dah sak thlap thlap mai a, tichuan, lo chhuak duh ta pawh ni se khami benefit nen khan an chhuak thei dawn niin ka hria a, chu chu vawiinah hian Pu Speaker tih theih ni sela a van tha awm em tih kha kan sawi duh a. Tukin zingte pawh khan leh nimin lam te pawh khan sawi kha a hlawh tawh a, SSA leh RMSA a thawkte lak dan chungchang thua khan thil fello deuh a awm nia hriatna kha a awm a (tukin zingah Vanglainiah a rawn chhuak ut mai a). Un-qualified Teacher ho kha mi 44 lak an ni tih a lo lang ta a. Tukin zingah pawh khan Member zahawm tak Pu Thlenga khan a rawn sawi tawh a. A va endiktu tur te pawh kha Sorkar khan a siam a ni a. Department lam leh MSU lam aiawh kha an kal a ni a. Hemi Un-qualified Teacher lo la tute hi tute nge an nih a, hengte hi Sorkar in engtin nge action a lak dawn? Qualify lo na na na kha engtin nge an lak theih? Hei hi a mualphothlak hlein ka hria a,

Ruling Party kan mualpho a ni mai lova, ram a mualpho a ni. (Speaker : Chair kan han inthlak lawk ang e, i sawi zawm leh dawn nia) Qualified tak tak kan nei tam hle si a, hetiang laia un-qualified teacher 44 Mizoram Sorkarin a la hi Mizoram tan a mualphothlak in ka hria a. Literacy percent chu kan sang hle si a. Tin, mithiam kan ngah hle si a, chutiang laia un-qualified teacher kan lo la hi a zahthlak hlein ka hria a, chuvangin, hei hi a pawl ka ti a. Chuvangin Pu Chairman, hei hi kan ngaihpawimawh a thain ka hria a ni.

Tin, chuloah chuan hei CCE hi kan han ti a, hei hi ka hmuh dan chuan a zirtirtu te hian an tlin lo tlatin ka hria zirtirna lamah hian. Hmanniah khan kan vengah khian mi pakhat a lo kal a, a fanu khan harsatna a tawk a. Market-ah kal ulangin an thlai zawrh te hi 20 vel Saptawngin rawn dah rawh min ti a, ka hre der silova. Chuvangchuan, kan inah te pawh khan a rawn kal ve hial a. Ka lo ziah sak ang nawk nawk a ka hriat ang te kha. Khatiang kha a ni a, chhungkua khan an zir a ni ber mai a. Chuvangin, Zirtirtute hi training tha kan pek si loh chuan he CCE hi nakinah chuan problem a tling dawn a.

Tin, Folio bags te pawh hi a nihna takah hi chuan Private School te pawh pek theih ni sela a tha hlein ka hria a. Chu chu sawi loh, Govt. School te pawh hi kan la pe zo thei lo niawma hriatna te kan han nei lehngal pheh hi chu Pu Chairman, helamah hian kan Sorkar hian hma nasa takin la sela thain ka hria a, chu chu ka han duh a ni. Sawi tur tam tak a awm a, kha kha khami demand-ah kha chuan ka han sawi theih ni sela thain ka hria a.

Demand No. 21-naah hian Higher & Technical Education Department-ah hian ka han sawi hmasak ber duh chu Polytechnic School din chungchang thu hi a ni a. Nikum lamah khan Kolasib ah te, Mamit-ah te, Champhai-ah te leh Lawngtlai-ah te khan din tura hmalak kha a ni a. Allocation pawh an dah tha viau a, 200 lakhs kha dah a ni a. Ka bial bik han sawi ta ila, Thingkahah khian ram kha pek an ni a. Mahselangin, an sa hlei thei tlat lova. Nimahsela, an ram pek a kha kawng kha laih a nih hmasak phawt loh chuan a thleng thei si lova Motor-in. Khami kawng laihna tur kha anmahni khan an nei si lova. Chu chu department dang nena an in coordinate that loh va a in link that loh chuan kha kha problem a awm dawn tlat a. Chu chu Pu Chairman, hei hi min lo hriatpui sela a thain ka hria a. Kha kha ka han sawi duh a ni.

A dang lehah chuan Pu Chairman, khalai Polytechnic School-a kha khawngaih takin min lo ensak ta sela, engtin nge kha kha hmalak dan tur ni ang. A kawng laih a kha PWD hote khan min tihsak thei dawn em tih te kha ka rilruah a awm a. A dang lehah chuan kan sawiduh leh chu Scholarship chungchangah, PMS (Post Matric Scholarship) hi nikumah khan dan lo angin sorkar hian overseas scholarship-ah hian an lo divert a. Chu chu Govt. of India khan a hria a, tichuan Mizoram sorkar hi nuai 77,46,568 hi in reimburse tur a ni a rawn ti ta a. Hei hi dan lo ang taka thil lo tih hi engtizia nge ni? Centrally Sponsor Scheme a nih avangin Govt. of India prior concurrent lo chuan tih theih loh hrim hrim a ni a. Chuvang chuan hetia kan lo hmanghuh a nih pawhin engati nge Govt. of India kha kan lo rawn hmasak loh? Phalloh tih kha a awm lova, prior concurrent in lak loh vang tih kha a ni a. Chu chu

Govt. of India hian State Govt. hi a rawn chawitir ta kha a ni a. Hei hi an reimburse tur a ni e, a ti a, hei hi engtin nge hma kan lak tak tih te pawh hi hriat a tulin ka hria a.

Tin, chubakah chuan kan sawi leh duh chu MBBS group-ah te, Biology group-ah leh General group-ah hian Govt. of India-in seat an pek 260 vel atan hian stipend hi an pe niin kan hria a. Hemi bakah hian midangin anmahni finna in seat tam tak an hmu ve a ni. MBBS ah te, Engineer-ah te hmundangah te. Khang hote kha Pu Chairman, kan sorkar hian stipend kha a pe ve thei lo em ni tihte kha ka han ngaihtuah a. Chu chu ka han dilpui a. Tin, Scholarship Board te pawh hi hman a siam tawh kha a ni a, siamthar leh hret te a awm em? Siamthar leh te a awm anih chuan a copy te min pe thei em tih te pawh kha kan zawt duh leh bawk a ni. Kha Demand 3 chauh ka cover thei mai a, a va tlem ve, ka lawm e.

Pu CHAWNGTINTHANGA : Pu Chairman, ka lawm e. Ka hmaa sawitute khan vuivaina deuh leh lawmthu sawina an han nei nauh nauh a. Kei pawhin a hmasain thusawi hawnna atan ka bial Chalfilh Constituency khi a hautakzia hi kan sorkar leh kan Minister-te hian min hriatpui ula ka duh em a. Tlungvel constituency atang khan eng emaw zat an hlep a, an vawm chho a. Saitual constituency atangin eng emaw zat an hlep a, an vawm chho a. Suangpuilawn constituency-ah khan an vawm khawm raih a. A nihna takah chuan sa zuartuin a misa a vawmkhawm deuh raih ang ni te hian ka in hria a, kan khawngaihthlak khawp mai a, BDO 3-in min zakzeh a. Tin, Electric Department-ah hian Division 2 in min zakzeh a, PHE Department-ah Division 2 in min zakzeh bawk a. Khatiang vel kha kan ni a, a hahthlak reuh khawp mai a. Zakzeh renga awm mai hi khawnge anni te hi a lian zawk hian an dip ral dah a nge tiin kan Minister-te leh kan sorkar hotute hian min lo en bik thin se ka duh thu ka han sawi hmasa nge nge a ni.

Vawiinah hian Demand tam tak sawi ka tum lova. Demand No. 22-na Medical and Health Services kha kan sawi ang a. Chawhma lamah khan Minister khan an hmalakna thenkhatte a sawi nual tawh a, Civil Hospital tih changlung te, Referral Hospital nasa taka chei that leh a nih dan zawng zawng te, NERC College building din tur a nih thu te, District Hospital theih tawpa tih chantlung tum te kan ngaithla a, a lawmawm em em a ni. Health Department hian state plan atang te, 13th Finance Commoission pawisa atang leh National Rural Health Mission atangin hma an la, an tuam zau em em mai a, Zoram pumpui hi min tuam tak meuh meuh a ni. Tunah pawh Health Sub-Centre sak tura ruahman mek a ni a, hengte avang hian Mizo mipui hian kan Minister-ah lawmthu kan sawi tur a nih ka ring a. Kan bial Phuaibuangah pheih hi chuan PHC kan beisei ngailoh concert building-in min sak sak a, tunah hian an la complete lo na a, rang taka zawh thuai kan beisei a. Chu mai ni lovin hmun kilkhawr a nih avangin Health Sub-centre-in min tuam chhuak zo lova, mirethei te te kan nih avangin damdawi leh enkawltu kan mamawh ve si a, clinic center kan ngen a. North Lungpher leh North East Tlangnuamah clinic center min pe tawh. He sub-centre building hi MLA fund atangin kan sak a ni a. Tunah hian tha takin kan function tawh a. Thawktute min lo pe bawk a kan lawm tak zet a. Miharsa te hian Health Department chungah lawmthu kan sawi duh a ni. Amaherawhchu, mamawh kan nei a, duhthusam kan nei a, kan bial chung sub-centre building thenkhatte sak that ngai em em anih tawh avangin min sak sak mai dawn emaw kan ti a. Amaherawhchu hmun dang tuam a ngai aniang e.

Vabak man tum an sawi ang deuhin kan man mai dawnah kan ngai, a sawt hla leh thin. Nghakhlel takin kan thlir reng a ni. Niminah pawh Minister ka sawipui a, “tuna TFC grant atangin kan rawn tuam dawn alawm” a ti a lawmawm khawp mai. Hei hi a takin min tihhlawhtlin sak ka duh a, lawmthu pawh ka sawi nghal a ni. Sorkar hmasaah khan awmze nei mumal vak lovin Phullen khuaah khian PHC an han hawng a. Mahse, mahni a function thei lovin Suangpuilawn hnuaiyah a awm vel mai mai a, hei hi kan sorkar tirh atang khan a hrana function ve thei turin theih tawk in kan nawr a. Health Minister hian thahnem ngai tak leh theih tawp chhuah in tunah chuan laboratory technician te min pe a, kan khawl mamawh tur ang te min pe in a hranin min function tir mek tawh a, kan lawm takzet a ni tih hi ka sawi duh nghe nghe a ni.

Tichuan Health Sub-centre sak ngai em em Sesawngah te, Khawruhlianah te, Buhbanah te, Phullenah leh Suangpuilawnah te, Khawlian leh Phuaibuangah te kan la nei a. Hmun thenkhatah min tih sak tawh mahse hei hi a rang thei ang bera min rawn sak sak thei turin kan Minister khan min lo chhinchhiah sak turin ka han ngen bawk a ni e.

A dawt lehah chuan Demand No. 28-na Labour & Employment chungchang kha ka han sawi duh a. Ni e, Labour & Employment-ah hian kan ram hmasawna hi a kal zel dawn a, kan sorkar chak tak hian kan leilung hausakna te hai chhuakin tunah hian hma a la tan mek a ni a. Kan ram leilung hnuaiyah hian Natural Gas deposit te, Petroleum deposit te tam tak kan la hai chhuak dawn a, chutih hunah chuan Multi National Company te leh International Company atang te pawhin investment siamin kan ramah te hian an rawn la lut duh dawn ni te pawhin a rin theih a. Chutih hun atan chuan labour chungchangah hian management fel tak kan neih a ngai em em a, Labour Law tha tak kan neih a ngai a. Keimahni inkaihhruai na tur dan fel tak kan mamawh anga. Company lian ten min rawn luh chilh hun a inbuatsaih chuk chuk lova tunah kan inbuatsaih hi a ngai em em a ni tih hriain kan sorkar hian labour lampanga mithiam leh mi experienced te bul min tan pui turin a la chhuak mek ani tih kan hriat avangin sorkar chungah hian lawmthu kan sawi a ngaiin ka hria a. Tichuan heti lama hma chak tak a kan lak zel hi a pawimawh em em a, kan Minister hianin helam panga hma lakna tur hi chhinchhiah bikah rawn nei zel se a lawmawm hle in ka hria.

Tin, han sawi tel ve hram ka duh a chu, tunhma kha chuan Workmen Compensation Act hi Law & Judicial Department hnuaiyah a awm thin, eng emaw ti chen atang kha chuan Labour Department hnuaiyah hian a awm tawh ni te in ka hria a. Labour Department hnuaiyah hian Labour Commissioner an awm a. Amaherawhchu, Workmen Compensation Commissioner a hi Workmen compensation Act hnuaiyah a hranpa a Commissioner siam a ngai a ni tih hi hriat hmaih palh a hlauhawm hle in ka hria a. Workmen Compensation Commissioner hi a Act hnuaiyah a hranpa a siam tur a ni a, qualification te, experience te pawh a Act khan tuk a nei nghe nghe a. Ani hi Workmen Compensation claim reng reng dan anga court ang tituaia lo relfeltu tur a ni a. Hei hi kan Minister te hian lo chhinchhiah sela, lo en Chiang sela, a tul anga chak taka hma an lak hi a va pawimawh ve tih ka han sawi duh a ni.

A dawt lelah chuan Demand No. 34-na Animal Husbandry hi a pawimawh khawpin ka hria a. Hei NLUP programme kan han siam a, beneficiary tam tak Vety Department hnuai hian kan nei nghe nghe a ni. Nichina kan sawi tawh ang khan Vety Department hi hun rei tak thlahthlam a lo nih tawh avangin a tlabal em em mai a. Dispensary te, hospital te pawh chei that hleih theih lohvin a awm a ni a. Hmun tam takah VFA awmna hmun pheih chu a ruak heihuai mai a, 37 lai Mizoram-ah hian a ruak a ni tih kan hriat tawh kha kan hmalama sawituten an rawn sawi lang tawh a. Chutiang chu keima Constituency-ah pawh khian a awm a, Sesawng-ah khian a awm a, Khawlianah pawh khian a awm a ni. Vety Doctor kan neih hnai ber chu Saitual-a mi a ni leh ringawt mai a. Saitual atang kha chuan khitiang hmun harsa han vil kha a har em em a. Hman kumah pawh khan Khawlianah ran hri a leng a, he House-ah ngei pawh hian ka sawi tawh nghe nghein ka hria. “A rang thei ang berin han kal teh u” ka ti a, ka han hrilh a. Hetah Director-in doctor a han hrilh chho a, doctor a han insiam a, a han kal thlen meuh chuan a thi tur ang zawng zawng a lo thi zo vek tawh. Chutiang chu kan dinhmun a nih avangin hmun leh hmuna enkawl hi kan ngai tak tak a ni tih hi kan hriat a pawimawhin ka hria a. Chuvangin, Saitual atang khian han hnaih chho deuh hlekin Phullenah emaw Suangpuilawnah emaw Vety hospital kan nei thei lo a nih pawhin vety dispensary hi chu a ngei ngeia min siam sak a ngaiin ka hria a.

Tin, Rural Animal Health Centre hi khith Phuaibuang tlangdungah awm se. Tin, Khawruhlian tlangdungah pakhat tal hi awm se a tha hlein ka hria a. Chu chu min chhinchhiah sak turin ka han ngen a ni e. Hun a tawi lutuk deuh a ni e, sawi ka la chak tehreng nen. Ka duhtawh mai ang e. Pu Chairman, ka lawm e.

CHAIRMAN : Pu S. Laldingliana.

Pu S. LALDINGLIANA : Pu Chairman, a hmasa berah chuanin School Education chungchang thu Demand No. 20 kha ka sawi duh a. Ka sawihawnaa ka sawi duh, hei hmanni lawk khan kan sorkar hi PRISM khan an lepe a ni a. Khatih laiah khan Prof. Tlanglawma khan thil pakhat rawn sawi a nei a, “Sikul tam zawkah hian medium of teaching hi English a nih lain Mizo tawngin an zirtir thin a. Kan naute hi English-ah hian an hniam em em tawh a ni” a ti a. Kha kha thudik tak a ni ka ti a. Tin, chu bakah College tam takah vawin hian kan Lecturer te hian Mizo tawngin teaching hi an pe tawh a ni. Hei hi a pawh thei dawnin ka hria a. Nakin hun lo kal leh zel tur atan siam that theih a nih lai hian kan siam that a tulin ka hria. Tin, School Education chungchang thu bikah hian lawmthu sawi tur pawh tam tak a awm laiin hun a tlem si a, ka sawi lovang a. Ka ngaih pawimawh pahnih khat chauh tarlan ka duh chu zirtirtu indaih lohna chungchang a ni a. Hetah hian a bikin Pu Chairman, thingtlang bialtu kan nihna angin thingtlanga zirtirtu indaih lo lutuk, khawpuia tam si hi tih fel theih dan hi a awm tawh lo’ m maw ni aw tih hi vawin hian ka sawichhuak leh duh a ni.

Tin, inspecting staff te pawh hi nichina hun hmasa lama kan ngaihthlak tawh ang khan engemaw zat kan nei a. Kan chhawr tangkai tawh lo nge thil dangah hian an buai deuh ka hre lova. Tunhnaia Hindi teacher kan han lak tharah te pawh khanin ka bial chhung Sethlun atangin lawmawm takin min laksak ve a. Khith khawchhak lamah Murlen-ah min han dahsak a. A han kal vang vang a, Murlen-ah chuan a han zawm dawn ta a. Amah ang kha Hindi teacher pahnih kha an lo awm reng

tawh mai a. An Headmaster khan, “A, nang chu i lo kalna a hla em mai, haw leh mai rawh. Kan indaih tawh e. A tul tawh love” tiin a rawn haw thlak tir leh ringawt mai a ni. Khatiang te kha thil awmdan a ni a, en chian deuh a tha em aw tih kha ka’n sawi lang duh a. Tin, a tha duhna avang zawkin zirtirtu transfer/posting chungchang thuah pawh hian sawi duh ka nei a. A aiawhtu dah si lova zirtirtu kan la chhuak thin a hi, hei hian thingtlangah a bik takin harsatna tam tak min siamsak a, a khaw mal te pawh kan sawichhuak ang e, Pu Chairman, Thingfal khua ka bial chhungah khuan zirna lamah an tang ve hle mai a, MLA Fund atangte pawhin ka theih ang angina kei pawn ka tanpui a, zirtirtu indaihlohna a bik takin Mathematic teacher te pawh MLA Fund atangin kan ruai hial a ni. Chutiang chuan kan tang a, kuminah khan 100 a 100 an pass a ni, kan lawm ve khawp mai a. Mahse kuminah khan vanduaithlak takin High School a Science Teacher kha tunah hian min sawnchhuah sak leh daih mai a, aiawhtu kha an dah silova, a bik takin pawl 9 leh pawl 10 zirlaiten mathematics-ah anmahni sum sengin tuition an la mek a ni. Chutiangte chu kan dinhmun anih avangin khawngaih taka min enfiah sak ka duh a.

Tin Demand No. 21 Higher & Technical chungchang thuah khan nachina kan ngaihthlak tawh ang khanin Mizorama College kan neih zawng zawng Chawngte College leh Law College tih loh hi chu tunah hian Sorkarin a provincialised ta vek a, hei hi thil lawmawm tak a ni. Tunah hian tihur tam tak a awm a, nikumah khan ka sawilang tawh a, Pu Chairman, vawiinah hian Saiha College tih loh kha chu Principal nghet hi pakhatmah Mizoram College-ah hian a awm lova, hengte pawh hi siamfel theih tawh a ni em aw tih kha rilruah chuan a awm khawp mai a. Tin, a Directorate lam pang hrim hrim pawh hi han en ta ila, Director nghet pawh kan nei chuang lova, Higher & Technical-ah hian, Joint Director nghet kan nei lova, Deputy Director nghet pawh kan nei chuang lova, Interse seniority list a awm a, hemi hmang hian a tul a nih chuan siamthat ni ta selangin, khata tang khan option pein a duh chu Directorate lamah hian kal sela, a duh chu teaching line lamah hian kal sela, khatiang khan felfai takin a siamthat theih tawh lawm maw ni le, tih kha thahnemngaihna avangin kan sawi lang leh hram a ni.

Tin, UGC norms chungchang pawh hi vawiinah hian sawi hrim hrim thain ka hria a, a thenah kan hmang a, a thenah kan hmang lova, hengte pawh hi kan hman mai hi a tha zawk em? UGC norms kan hman avanga a Sorkar ang leh a ram ang pawha hamthatna tam tak kan hmuh te hi a awmin ka hria a. Heng building kan sak theihloh Hostel kan tih te pawh hi UGC fund atangin kan sa thei a, chu chauh ni lovin College building sakna te pawh hi engemaw zat UGC atangin a lo kal thei a, hengte pawh hi awmzia nei zawka min kalpui theih dan kha kan Minister hian min zawnpui theih dan a awm em aw tih kha ka rilruah hian a lian hle a. Tin, College zirtirtute chungchang hi Pu Chairman, vawiinah hian sawi chhuah ka duh a, kan hriat angin College zirtirtute hi awl hle ang hian kan hria a, mahse an awl hle lo a ni tih vawiinah hian ka sawi duh tlat a ni. Tunah pheih chuan semester system kan kalpui dawn a, an hah hle dawn tih hi a chiang tawhin ka hria a, College zirtirtute hi englaimahin, entirnan, fourth pay leh sixth pay inkarah emaw hian harsatna hi an siam ve ngai lo reng reng a, anni chuan beisei an nei a, an beisei chu nakinah kum 10 a ral ang a, pay revised a awm leh ang a, UGC in kan pay tur chu an rawn set fel leh mai ang, chutiang chuan kan kal leh mai ang an ti a. Dawhthei takin an nghak thin a, tunah pawh hian sixth pay an nghak ngar ngar a, an nghakchhuak a, sixth pay a lo chhuah hma khan Mizoram sorkar hnuaia thawk, anmahni tlukpui tam takte pheih chu stage khat a sangah te, stage 2 a sangah te pawh an jump hman hial a ni. Chuti chung chuan

anni chuan an nghak ve ngar ngar a, an hun a lo thleng a, an han la ve ta a. Tunah hian Sorkarin an pension age hi kan la siam fel theih loh vang niin ka hria a, 80% arear an lak thin, Fifth pay a an lo lak tawh thin pawh kha vawiin thleng hian Zirtirtute hian an la la thei lo a ni. Hengte pawh hi nghakhlel takin an thlir mek a, tihfelsak theih dan hi awm se tul hlein ka hria a, kan tarlang duh a.

Pu Chairman, Demand No. 24 Medical & Public Health Services chungchang thua hian sawitur tam tak a awm a, amaherawhchu ka sawi tam lovang a, kan Minister a changtu hi ka congratulate duh a, a thawk rim hle a, a thawhrimna avangin Mizoram-ah hian kan neih loh tur tam tak kan nei a ni. Tunah hian Community Health Centre hi 12 kan nei a, Primary Health Centre hi 57 kan nei a, Health Sub-Centre hi 370 kan nei a, Health Clinic Center hi 83 kan nei a. A nihna takah chuan India Public Health Standard Norms ang chuan Health Sub-Centre nei tur chuan, Pu Chairman, Population hi a tlem berah mi 5000 awm a ngai a ni, khaw pakhatat hian. Mahse khaw pakhatat chuan 5000 hi kan awm lo chiang khawp mai, chuti chung chuan kan mamawhna zawn hriain kan Minister hian Health Sub-Centre a theih ngang loh pawhin Clinic Center tal tea min la han tuam tang tang mai hi chu a lawmawm ka ti a, lawmthu ka sawi duh a.

Sawitur tam tak a awm a, ka sawi seng lo ang a, amaherawhchu, improvement/hmasawna kan neih tur thungah chuan a bik takin Doctor lampang chu ka sawi lo ang a, hetah, thingtlang kilkhawr lehzualah hian Health Sub-Centre a thawktu Health Worker kan tih awmthaduhlo tam tak awm erawh hi chuan Health Department hmel hi vawiinah chuan a tibal a ni tih hi ka sawi duh a. Ka bial chhungah ngei te pawh sawnin awm tha duh lo engemaw zat an awm a, explanation call rawh u vawi tamtak ka tih an call tawh, chutah pawh la kal tha duhlo engemaw zat hi an awm tlat a ni. Hengte hi chu a tul anga action lak te hi a tha lawm ni tih kha vawiinah hian ka'n sawilang duh ani.

Demand No. 44 Trade and Commerce chungchang thu-ah hian sawi tur tam tak a awm a, Pu Chairman. A bik takin Indo-Bangladesh Border trade kan tihte, Indo-Myanmar Border Trade kan tihte pawh hma chak takin kan la a, a lawmawm hle. Amaherawhchu, tun aia chak hian a kal theih em? Tunah hian Sorkar kum chanve chu kan lo hmangral tan chu a ni tawh der mai a, Central Sorkar a inhawng hle a, Political level-ah engkim chinfel tawh leh chinfel theih niin a lang baw si a, chutih laia a official level a duh ang tawka kan chak thei lo hi chu tunai hian in enchian a tha em aw tih kha ka'n sawilang duh a ni.

Tin, Demand No. 34 - Animal Husbandry & Veterinary chungchang thu-ah hian he Department hi Pu Chairman, tuam that a, sum leh pai pawh tam zawk dah tulin ka hria a. A chhan chu, NLUP kan flagship programme-ah pawh chhungkaw tamtakin Vety hi an thlang a ni. Chuvangin, tunah hian thingtlang a la tuam hneh lo lutuk, hmanni lawk khan Pu Chairman, ka bial chhung Zehet khua-ah chuan Vawk note 65 zet mai a thi a ni. An mangang em em a, min rawn phone a, tihngaihna a awm si lo, Lunglei-ah Vety Department Joint Director te kan va phone a, anni pawhin an tir thla thei chuang lova. Rural Animal Health Centre kha a awm miao chuang si lova, Dispensary chu sawi loh. Chuvangin, he Department hi tuam that a, thingtlang-ah nasa zawka Rural Animal Health Centre kan tihte hi dah a tul in ka hria a ni.

Pu Chairman, minute 1 lawk min pek belh langin, ka bial chhung Mamteah te sawn entirnan han sawi ta lawk ila, NLUP dawngtu hmasa chhungkaw 2 te khan an tihlawhtling em em mai a, tunah sawn bawng 30 chuang ve ve an la vulh a ni. Inthlan lawmthu sawia kan va kal te pawhin bawngchal 2 min talh sak a, chutiang chuan chhungkua sawn an dinchhuah pui a, saw mite inspired avang saw a nih ka ring a, a chhehvel khuaah sawn mi tamtakin ran an vulh mek a, tunah sawn. Sawng ho enkawl thei tur te sawn Rural Animal Health Center hi kan Minister zahawmtak hian min dahsak thei se la tih hi vawiinah hian ka duh khawp mai. Ka bial chhung Mualcheng khua-ah tepawh a hming chuan kan han dah a, VFA te pawh kan han dah a, mahse vawiin thleng hian a building te, quarters te kan la sa thei lo va. Chutiang a nih avang chuan he Department hi thuan that theih ni se a va tul tehlu em tih kha ka'n sawi duh a ni. Pu Chairman, sawi tur tamtak a awm a, hun a awm tawh silova, duhtawk mai ang, ka lawm e.

CHAIRMAN : Pu R. L. Pianmawia.

Pu R. L. PIANMAWIA : Pu Chairman, ka lawm e. A hmasa berin Demand No. 20 na – School Education bikah hian ka bial atan chuan bul kan tanna atanga han chhutin mark 100 ah 60 an hmu tawh a, lawmthu ka sawi duh a. Tin, lawmthu sawi leh zelna turah hian kawng khat han sawi leh ka'n duh chu Higher Secondary School hi Darlawn, Zohmun leh Sakawrdaiah kan nei a. Darlawn leh Zohmun hi Aided an lo ni tawh a, Sakawrdai hi Lumpsum a la ni a, Aided-ah han dah chhoh ve phei chu ni sela Mark kha an hmuh belh leh ngei ngei dawnin ka hria a, chu chu kan sawi tel duh a.

Tin, zirtirtu indaihlohna chungchangah hian tuna kan dinhmun han chhut han chhut hian kan mamawh hi August thla hian a phuhru zo dawn chuangin a lang lova. Chuvang chuan helaia kan neihsa te pawh hi heti zawng hian a siamrem theih dan a awm lawm ni? S.S.A hnuaiyah hian zirtirtu tam tak kan pawt peng a. Hei hianin hmun tam taka kan hnawhkhahna tur hi chu an la kep ve theiin ka hria a. A siam rem theih ang ang siam rem a, S.S.A atanga zirtirtu atana kan hman tam tak hi zirtirtuah School-ah let leh ta se, nasa takin min chhawk ang tih ka ring a. hei hi lawmthu sawi chungin ka'n sawi tel duh a ni.

Tin, Demand No. 28-naah Labour & Employment-ah hian lawmthu ka'n sawi duh a. Hei keini khi Hmar thimpui, Zangkhaw bungbut hnan kan nih avang hian an khawngaihna ka dil a. Mipuite tan Aizawlah rawn kal a harsa a, mi kan rethei a, kal man pawh kan nei lo va, a hmunah registration te min rawn tihsak mai thei lawm ni ka'n ti a. Kan ngenna tlawm tak min lo tihhlawhtlin sak a, Darlawn leh Sakawrdaiah Employment Registration min rawn tihsak avangin lawmthu ka sawi a. A lehpek zelah phei chuan khawtinah min tihsak thei sela chu a lawmawm leh zual ang tih ka sawi duh bawk a ni.

Tin, Trade & Commerce-ah hian a rim a ra kan la hre lo khawp mai a, ka bial hi kan la mawl deuh hlek a. Chuvangin Market engemawte hi chu khaw hnih/khatah tun Budget thar hman theih hunah chuan min rawn hriatsak ve thei se tih kha kan sawilang tel duh a.

Tin, Demand No. 24-naah Health Department chungchangah hian thil tam tak min tihsak tawh chungin mamawh kan la ngah hle a, sawi tawh ang khan a hming ringawt atang pawh khan tihtur leh siam tur a tam tih a hriat mai a. A hmasa berah chuan Darlawna Damdawiin kan neih khi Sawlenga awm thin Darlawna sawn thlak kha a ni a, ram buai avang khan, a senior veng vawng tawh hle mai a. Tun dinhmunah chuan P.H.C. a la ni a, C.H.C. hming te hi han tar ve theih se chuanin kan lawm hle ang tih kha ka'n sawi duh a. Tin, Sub-Centre kan tih ang thin Clinic Centre ang a kha kan Minister khan nikum Independence Day dawn khan Sunhluchhip, khaw rethei tak mai, cheng sawma damdawi chi li/chi nga rawn lei thin khuaah khan hawn phalna min rawn pe hlauh mai a, kan hawng ta a, a lawmawm hle mai a. Tun Independence Day lo thleng leh tur hi Khawpuar hian kan Health Minister awka hi hriat an chak leh hle mai a, chu chu Independence Day lo thleng leh tur atan hian Khawpuar hmar tawpa awm khua te khian Minister aw an lo hre leh thei ang em tih kha kan sawi leh duh bawka.

Tin, Doctor indaih lohna chungchangah hian a nghet a lak an nih loh avang hian kan doctor te hi kan indaih loh phah em aw ka ti deuhva mawl deuhva ka ngaihtuahnaah chuan, tunah a nghet turin thawk dawn se hlauh tih san vak lem loh pawh khan thingtlangah hian an in chuh rum rum mai dawn emaw ni chu aw ka ti deuh va. A chhan chu hlauh tlem te hlauh tur pawhin thingtlangah pawh miin an dil tuk tuk a ni a. A ngheta tihdan hram te hi ngaihtuah dan a awm thei lawm maw ni le tih ka sawi duh a. Tin, Doctor thingtlang a awmte hi an motor neih thina te a kha Sorkar hmasa khan NRHM atangin a ni awm e, ambulance kan tih mai thingtlang mi mawlin kan hriat thiam danah chuan ambulance kha pek an ni a, motor te an kawt tawh lova kha kha doctor ten a dang an neih loh avangin an ring tlat bawka si a, damlo phurhna tur atan a tangkai thei bawka si lova, churang chuan hei hi awm tho si hian motor an neih leh theih dan tur hi NRHM atang bawkin nge thil dang atangin ngaihtuahna thar Sorkar hian nei thei hram se. Tin, tuna NRHM-in motor a pek ambulance kan tih a a thawktu driver te hi thla tin ₹ 2500 an pe ve a, hei hi chu a theuneu lutuk hret a ni, an khawngaih thlak awm khawp mai. Churang chuan, kaihhraina hi a pek theih lawm ni Sorkar ang hian ₹ 5000 tal pe turin, hetiang a tlawmngai a lo thawk ve te hi driver tha tak takte an ni a, nakinah hetiang ang ringawt a beisei tur awm lova an thawh chuan driver tha kan hmu lovang a, thiam lo deuhin an khalh ang a, an accident pui ang a, kan chan hnem hle ang tih kha a rinawm in ka hria a. Tin, Health Department-ah hian thil pakhat fimkhur tula ka hriat chu injection chungchang hi a ni a. Injection chungchang hi training uluk taka pek a tul hle in ka hria a, tin, a khat tawka in fuih fo hi a tulin ka hria a. Injection chungchangah hian tuna theihtawp kan chhuah a, training nei mek leh la nei zel turah te pawh hian injection bik te hi mi kumkhaw chhiatna thlen theihna kawng a nih avangin fimkhur a tul hle in ka hria.

Tin, Demand No. 34-na Animal Husbandry chungchangah hian kan Sorkar a kan Minister in kan bial khi a rawn hre tan hle a, a lawmawm hle a. Tunah pawh hian New Vervekah Check gate siam a tul thu te kan sawi lang tawh a, tin, Sakawrdaiyah dispensary dah ve te, Zohmunah RHC dah ve te kan lo thlen tawh a mipuiin an nghakhlelh hle tawh a, heng awm theih hun tur hi tihtakzet a min lo ngaihtuah sak tul hle in ka hria a kan ngen tak meuh meuh a ni.

Tin, Demand No. 41-na Sericulture-ah hian Sericulture hi a hmelhriat leh a chhawr nasa pawl kan lo ni tawh thin a, amaherawhchu, hun engemaw chen atang khan a thawktute awm that loh avang te, an supervise that loh avang te, a chi tha an pek that loh avang te in, vanduaina avang te in hnuchhawn ramah tunah hian an dah ta a, a pawl hle a. Sailutara Thangtelawn ramah te farm ropui tak siam a ni tawh a. Tin, Darlawnah pawl farm entawn tlak tak siam a lo ni tawh a, chuvangin heng hi mipui te, he Department-a an beidawn kum khua lohna tur hian a thar a han chunzawm leh a tih takzet a hma han la leh turin ka'n ngen duh a, chu chu min lo hriat sak se ka duh tak meuh meuh a.

Tin, Demand 30-naah Disaster Management chungchangah sawi tawh ang khan kan Minister-in min duhsak em em a, a lawmawm a, amaherawhchu Sorkar hmasa te tih han entawn leh hlek se ka duh chu, hemi chungchangah hian, Sorkar hmasaah kha chuan kan bial chhunga MNF unit president te kartin Aizawlah an kal thei a, unit president pakhat in Silpouline panga/pasarih vel zel an hawn thei a chutiang khawp a tam chu an ngaihtuah thei a ni. Chuvangin tun Congress Sorkarah hian unit president te kal pawhina min dil a pakhat lek te kan hawn tir theih lai hi chu rilru a na ve a ni. Chuvangin kan unit president te kartin an lo kal ve a, panga tal a tam kan hawn tir ve theih nan min lo ngaihtuah sak thei se ka duh a, chu chu ka'n ngenna a ni a. Pu Speaker, ka lawm tak meuh meuh a kan hun neih angah te khatiang sawi theih na hun ka'n nei thei a, kan hotuten tha taka min dawnsawn avangin an chungah ka lawm a, lawmthu ka sawi tak meuh meuh a ni. Ka lawm e.

Lt. Col. Z.S. ZUALA : Pu Speaker, ka lawm e. Nichina ka bula thu Pu Zualtea, kan member zahawm takin a sawi Sainik School kha han chunzawm hmasak ka duh a. Chuvangin Demand No. 20 leh 21 naah hian ka'n lut nghal ang a. Sainik School hi India ramah hian 18 emaw a awm a, tin keini Sainik School Chhingchhipa mi khi kan han Sorkar phat atang khan kan C.M. zahawm tak Delhi trip hmasa ber khan hma a rawn la nghal a, tin chumi hnuah chuan 13th Finance Commission atangin leh NLCPR atangin pawisa allotment kan hmu a, tunah hian Planning Board hian 12 crore hi tun kum atan hian an earmark ni awm pawhin min hrilh tawh a a lawmawm hle in ka hria a. Heimi Sainik School hi kan ngaihnanah hian sipai sikul ngawr ngawra ngai te hi kan awm niawm in a lang a, mahse sainik school hi public school tha tak a ni mai a, CBSE syllabus a kal a ni a. Amaherawhchu a school hotute hi armed forces education department officer hoin an enkawl a ni mai a.

Tin, a Board-ah chuan General Officer Commanding hnai ber ho a tih a ni a, overall supervision-ah chuan State Education Minister hnuai a awm vek a ni a, chuvangin hei hi sikul tha ani a. Sikul tenghneng tete Mizoramah kan buaipui a, heng ho hi hnuchhawn vek a, an expenditure pawl hi sainik school-ah hian invest ila kan hlawkpui zawk hrim hrim tih hi kei chuan ka Chiang a. Tin, entirnan tun kumah khan NDA qualified 2 kan nei a National Defence Academy Officers Course ti nghal mai tur, chumi te chu sainik school Imphal atanga chhuak ve an ni a. Imphal-ah khian vacancy min pek hi kum 1-ah hian pali a ni a, ka hriatsual loh chuan scholarship Mizoram Sorkarin kan pek

hi khami mi tlem te atanga pahnih qualified awm te kha. Tunah hian keimahniiin nei ila Sainik School hi kum tin eng zat nge officer qualified tur hi kan produce theih ang tih ngaihtuah hian a phu hliah hliah a chuvangin School Education Department pawh hian chak zawkin hma min lak sak se a duhawm hle mai. A hmaa nawrchhuah nan khan Home Department khan nasa takin an bei a, tunah hi chuan education department-ah a lut tawh a chuvangin education Department mawh phurhna a ni in ka hria, chak zawka hmalak hi, an theih ang tawh chuan an ti ngei turah ka ngai hrim hrim a.

Tin, sikul education kaih hnawihah hian construction of Hostel at shillong te hi nuai riat leh a chan ve a awm a, tin post Matric Student hostel at Aizawl, hei hi a pawimawh khawp in ka hria. Aizawl khawpawna mi mirethei zawk ho High School an zawh tawh hnua an lo awmna tur hi Aizawlah hian siam a ngai a, entirnan Minority community a tang te hian hei hi khawiah nge an sak dawn chu ka hre lova allotment a awm a, a lawm awm hle in ka hria. Tin, scholarship ah hian in a sub-head, overseas a awm baw a. Tin, civil aviation te hi engtiang in nge scholarship te hi an lo pek a, Overseas scholarship te hi engtiang in nge an lo pek tih hi ka chiang chiah lova, wind-up naah te min hrilh theih chuan a lawmawm khawp ang, chubakah incentive cash award kan tih financial assistance hemi UPSC exam pass tan leh defence service exam UPSC in a conduct pass ho tan an pek thin kha tunah hian an la ti reng em? Engzat rate-in nge an tih kha hriat a chakawm khawp mai a, tin, kan bial chhungah sawn Government Model School a awm a, saw saw special school a ni a, hman deuh khana retaining wall an kawmchhaka mi a min chiam a, an School, Primary Section kha a ti chhe vek a, tunah hian an High School lamah khan an inhnawh khawm ta vek a, chutah pawh chuan an leng lo a, an chawkider quarter ah an inhnawh khawm a. Chutichuan a chung floor kha vertical extension tih theih a ni a, chumi a tan chuan Education Department hian pawisa a pe a, a lawmawm em em a, mahse kha pawisa an pek kha a tawh dawn lo a, sawta tan sawn kan Education Minister zahawm tak hian a tlawh tawh baw a, a hria a, min han ngaihtuah sak theih se chu a lawmawm khawp ang.

Tin, a dawt lehah chuan, AH & Vety hi kan bial chhunga NLUP sem hmasa leh sem tha an ni a, an subject-ah hian han luh nghal ka duh deuh hleka. Control of animal disease an ti a kan bial chhungah sawn in vawh lian pui pui talh tham tawh thih thut thut a tam khawp mai a, hemi hi control dan a awm em? chu chu uluk leh zuala min study pui a ngai ngawt in ka hria. Mirethei te te in vawh an vulh a , a talh hun nghak hlel takin an thlir a, a tuk lawkah an thi thut zel a, saw saw a pawh khawp mai a eng emaw tia further study emaw research emaw minrawn neih pui tur hian ka duh khawp mai a. Tin, hei mithun breeding hi anmahni department-ah hian a awm a. Mithun breeding hi ka lo hriat ve dan chuan ram ti bua tu an ni khawp mai a. Mizoramah hian a encourage chi viau ang em? hei hi NLUP ah te hian kan lo pe teuh tawh niin a lang a, mithun breeding-ah hian a theihna tur hmun awm ang a ka han ngaihtuah chu khengreng deuh, emaw border area deuhah te hian tih chi ni awm takah ka ngai a. Kan pi leh pu ten an lo sawi dan chuanin lo te pawh ti chhe tu, ram ti bua tuah hian an ngai niin ka hria a, hei hi uluk deuh hleka en chu a that ka ring. Tin, Slaughter House, ka bial chhung Salem vengah sawnin siam tumna a awm a. Hei hi a lawmawm kan ti a. Kan bial pawhin kan lo welcome a. Tin, a veng neitu tak Salem veng te pawh sawn an lo welcome a, a lawmawm hle in ka hria a.

SPEAKER : Pu Zuala hei i hun a tawp a, minute 3/4 vel ala nei a, kha kha kan han sawi zawh tir phawt dawn em ni ang? Sawi zo phawt mai rawh se aw.

Lt. Col. Z.S. ZUALA : Hemi slaughter house hi uluk taka tih loh chuan a rim chhia anga, nakinah chuan a veng vek sawnin an la sawisel mai ang tih ka hlau deuha. Chuvangin tun atang hian uluk zawka ruahman ni se. Tin, a dawt leh ah chuan Sericulture Demand No. 41-na, anni hi NLUP an sem tha a, kan bial chhungah pawh sawnin an popular khawp mai a. Sericulture-ah hian kan hriat angin Pu T.T.Zothansanga pawh khan a market that zia te a rawn sawi a.

Chu chu kan hriat vek a ni a. Bible-ah te pawh hmanlai Pharoa hunlai atang tawha hei hi chu market buai ngai lo a ni a. Hei hi nasa taka encourage ngaiin ka hria a. Kan thil tih tum tam tak hi market study kan neih that loh chuan nakinah a hralhna kan hmuh loh chuan a buaithlak dawn a. Chuvangin hei hi a hralhna awm sa, tunhma atang pawha a hralhna hnawng ngai miah lo hi encourage leh zual nise a tha in ka ring.

Tin, a dawtah chuanin Medical leh Public Health Services-ah hian Falkawn lama Civil hospital kan concentrate thei dawn a a tha hle in ka hria. Medical services ah mai lo pawh town traffic congestion tih thawl nan hian nghawng tha a nei dawn a. Hei hi tih ngei ngei tura kan Chief Minister zahawm takin a rawn sawi chhuak kha a lawmawm hlein ka hria a.

Tin, Aizawl south III leh Aizawl chhim lampang ho tan hei hi thil lawmawm tak a ni lehzual in ka hria. Tin, kan bial chhungah hian Health sub-centre Mission Vengthlangah Mission Venga awm thin kha sawn a ni. Chutichuan Mission Veng sawnin Health sub-centre hi an nei ta miah lo va. Tunah hian a hmun tur tha tak Kawltheihuanah sawn kan nei a. Hei hi kan Health Minister chak tak hian min rawn sak sak dan ngaihtuah se la kan lawm khawp ang. Mission Vengthlanga mi kha chhuhsak a, kan biala lak luh chu kan ti miah lo, amaherawchu a hranpain hetilaiah hian min rawn siamsak thei se a lawmawm khawp ang.

Tin, ITI-ah khuan Hospital tha deuh kan nei a. Sorkar hmasaah khan an lo vulh tha viau mai a. Specialist te hian an tlawh zut reng mai a. Tunah kan han sorkar ve atang khan zawi zawiin specialist ho khan min tin san ta a. Tunah hian Doctor pakhat kan nei a. Medical specialist hi chu an lokal ta lova, kha kha revive leh dan kawng te kan minister hian min zawn sak thei se, kar luana an lokal te chu kan beisei pha hauh lova, karkhat ah vawi 2/1 te emaw rawn visit thin se. Chutichuan ITI, Mualpui, College veng leh Bethlehem veng ho tan nasa takin an hlawkpui ang.

Tin, a tawp berah chuanin hei Law and Judicial hi House chhungah hian bill pass tura rawn put luh kan lo thlir zeuh zeuh a. Eng eng emawah hian observation hi a awm ta zeuh zeuh a. Law tena an lo vet tawh hnua he House-a an rawn pharh hi chu keini ang level-ah chuanin correct rual turah kan lo ngaih loh kha a ni a. Amaherawhchu, mithiam zawk tena an lo thlir hian correction te leh thil tihsual te hi a lo awm zauh zauh a. Hetah hian Law department hian uluk zawka kan dan te hi min enpui hi a ngai a. Chuvangin anmahni pawh hi tih chak lehzual a ngai ni pawhin a lang a. Heng hi ka han sawi theih chu a ni mai e, ka lawm e.

SPEAKER : Awle, kan hun a tawp a, tunah hian han phar sa chu Pu Joseph Lalhimpuia a ni a. Darkar chanve kan chawl ang a, dar 4:35 P.M.-ah tan leh kan tum dawn nia, chawl rih phawt ang u.

Recess at 4:05 P.M.

4:35 P.M.

Pu JOSEPH LALHIMPUA : Pu Speaker, ka lawm e. Demand 10 sawi tur a awm a. Minute 10 hun ka nei a. Ka sawi vek seng lo maithei a. Ngaih pawimawh thenkhat Demand No. 20 leh 21-na atangin thil tlem te tarlan ka duh a. Pu Speaker, a hmasa berin Education minister zahawm tak hma lakna a fakawm hlein ka hria a. Mizoram kan la neih ngai reng reng loh, Art Educator/Instructor te, Health Instructor te a za tel, a sang tel kan hmu a. Thil thar ropui tak mai a ni a. Hei hian kan naupangteah rah duhawm tak a chhuah ngei ang tih ka beisei a. Kan hriat angin zuk leh hmuam lamah kan insum loh avangin natna tam tak kan tuar mek a ni. Kan House Leader zahawm tak nupui phe chu meizuk duh lo pawlah nasa taka active a hna thawk, hma la a ni a. School naupang uniform ha meizial zu ka hmuh te hian ka rilru a na thin a. Hemi chung changah hriselna chung changa zirtirtu tur bik lak a ni te hi a lawmawm ka ti a. Lawmthu ka han sawi hmasa a.

Tin, Pu Speaker, pahnihaah chuan, Quality education nei thei turin training a ngai a, Trained teacher neih tam a ngai a ni tih hi member zahawm tak takte khan an sawi a. Chumi atan chuan CTE (College of Teacher Education) pakhat Aizawla kan neih hi a tawh lo hle a ni tih te kan hria a. Kan minister zahawm tak leh Education lama kan hotute, Lungleiah B.Ed trained-na min hawnsak turin kan ngen a, hma min lak sak a ni tih kan hria a. Kan lawm hle a, lawmthu kan sawi a. Tin, hei pawh hi chak leh zualin min bawhzui sak sela ka duh a. Ka han ngen chhonzawm a ni.

A pathumnaah chuan, House-ah kan leader zahawm takin a sawi tawh a. NIT Thenzawla dah tura sorkarin a ruahman/a siam hi lawmawm ka ti. Pu Speaker, mi thenkhat, engkim Aizawla dah vek emaw a bul hnaia dah vek tum rilru hi kan la awm a. Hei hi tha lovin ka hria a. Kan khawpui tawt zia te, a hrehawm zia te kan sawi chamchi a. Kal hleih theih lohvin Traffic pawh a buai a ni tih te kan sawi a. Chutih laiin engkim, thil lo awm tur zawng zawng pawh helai kan khawpui ber leh a chhehvela dah tum vekna rilru hi a rilru zim thlakin ka hria a. Chuvangin NIT Thenzawla dah sorkarin a'n tum te pawh hi a lawmawm ka ti a. Hei hian ram pumah pawh inpumkhatna leh hmasawnaah rah duhawm a chhuah zel ka beisei a. Chutiangan, Institution, India ram state dangah te pawh khawpui berah pawh awm lem lo hi tam tak a awm a ni.

Tin, Higher & Technical Education-ah hian zirna sang zawk chhonzawm turin India ram chhung mai pawh ni lovin khawvel ram hmun hrang hrangah kan zirraite eng emaw zat zirna sang zawk bein an awm a, chu mi atan chuan kan zirraite tanpui turin scholarship-te, stipend-te eng emaw zat kan sorkarin a pe a, hei pawh hi thil thar, thil lawmawm tak a ni a, wawin hian lawmthu kan han sawi tel a ni.

Tin, hei CCE hi kan han kalpui tan a, a lawmawm hlein ka hria a Pu Speaker, member zahawmtak thenkhat te khan nu leh pa leh chhungkaw tan tih tur a tam an ti a, hei hi kan thatpuina tur atana CCE pawh hi hmang kan ni pakhatin ka ring a, hei keini te takngial pawh hian ram rawngbawlnaah tul tak chungin kan han awm chung hian kan fate home assignment te leh eng eng emaw te kan signature han pek ve ngaite, enpui ngaite hi loh theih lohin a lo awm ta a, hei hi a lawmawm hlein ka hria a, hriatsa ni lo a, anmahni ngeiin an zir theihna tura hetiang CCE chhawpchuah a lo ni te hi Education Department hi he sorkarah hian Change tam tak a awm a ni tih tilang tu a ni a, a lawmawmin ka hria a, kan han tarlang duh a ni.

Tin, Demand No. 41, Sericulture Department chungchangah sericulture hi kan intodelh na tur pawimawh tak a ni tih member zahawmtak tak te khan an sawi a, ka pawmpui a, tunah hian Zemabawkah Grainage khawl lianpui mai, tha tak mai a awma, chumi support tu tur chuan hei kan Chief Minister zahawmtak, Lunglei High Powered Chairman-in, Lunglei ah Zobawkah min dah sak a, Lunglei District saw raw materials pe tam ber, thawh chhuak tam ber an ni, pangang, cocoon chungchangah hian. Chumi chhunzawm turin hei NLUP atangin kan Minister zahawm tak ten Zobawkah Grainage system liantha tak mai din turin ruahmanna min han siamsak a, a lawmawm hlein ka hria, Hnahtial bialte, tin, hetah Pu Zodintluanga kan Minister zahawm tak bial te, Zobawk leh a chhehvel te saw pangang khawi lama thawk hlawk te leh thawk nasa, eizawn nana hmang chhungkaw tam tak awmna a ni a. Sericulture Department Minister hmalakna a lawmawmin ka hria a, kan han tarlang tel a ni. Tin, hei Aizawlah sa thianghlim hrisel ei turin hmun hrang hrangah sa dawr thianghlim te, sa talh dan thianghlimte pawh kan han nei ta a, bul kan han tan chho a, a lawmawm hlein ka hria a, hemi ang chiah hian Lungleiah kan Vety Minister zahawm tak hian hei Demand No. 34-naah pawh khan an han tarlang a, Slaughter House din turin Lungleiah pawisa min dah sak a, a lawmawm hlein ka hria. Hun reilo teah Lunglei mipui te pawhin, sa thianghlim, ran thianghlim sa kan ei ve thei dawnin ka hria a, hei hi thil ropui tak, thil thar duhawm tak a niin ka hria a, lawmthu kan han sawi a ni.

Tin, Demand No. 24-na Medical & Health hi chipchiarin ka sawi tawh lovanga, hun kan nei tlem a. A lawmawm hlein ka hria a Dispensary te, PHC te, CHC te, Hospital building te zawhna hunah khan eng eng emaw kan han sawi a. Vawiin niah chuan kum 2 leh a chave pel chauh emaw kan sorkar tihin hmun tam takah hetiang building thar tha tak tak mai lo awm te hi a lawmawmin ka hria a, hei hi a ropui ka ti a ni. Mahni bial te pawh han sawilang ila, a mawi lovin ka ring lova. Hei ka bialah hian Rotlang khuaah Clinic Centre nikum khan min dahsak tawh a, kan C.M.-in a building min sak sak tawh bawk a. Tunah hian Health Worker nen hriselna lamah hmasawn takin kan awm mek a. Tin, Lungpuizawl, in 178 chuanglai awmnaah Clinic Centre din turin ruahmanna min siamsak fel tawhin min pe tawh a. Nakinah building te pawh sak dan tur min ngaihtuah sak ang tih ka ring a. Tin, hei Zobawk ah PHC din turin House-ah ngei pawh a sawi tawh a. Hei hi a bial enkawltu ber nih phei chuan a lawmawm lehzualin ka hria a. Zobawk leh a chhehvel mipuite an lawm khawp mai a. Kan health Minister zahawm tak pawh hi kan sawm a, kan hrilh tawh a. A lokal hmasak berah chuan vawk nen kan lawm dawn a ni an ti a, Vawiinah hian he House zahawm takah hian lawmthu sawinaah ka han sawilang bawk a ni.

Tin, Demand No. 44-na Trade & Commerce chungchangah khan kan hria a. Zokhawthar, Champhai insumdawn tawanna hmasawn dan te kan hria a. Tin, Tlabung lamah te, Thingsai leh Akyab lamah te pawh hmalak mek dan kan hria a, ka

sawinawn tawh lovang a. Thil pakhat chauh kan sawiduh chu hman niah khan kan sawilang tawh a Lunglei District saw administratively pawhin tih san, tih hmasawn, thuan that a ngai hlein ka hria a. Hei hi khawngaih takin a rang lamin hma min lak sak sela. Deputy Director dah tum mek a ni tih hmalakna kha hmannah kan Minister zahawm takin min hrilh tawh a. Hemi kawngah hian chak zawkin hma min laksak sela ka duh khawp mai a. Tin, vawiinah kan House Leader zahawm tak kaihhruaina hnuaiyah sorkar hun hmasaah khan Lunglei a kan Sabji bazar kan tih, Super Market te, Serkawn a kan Super Market te saw sak a ni a NLCPR atang khan. A then pheih chu a tha tawh lo khawp mai a. Lunglei mipuite hi chuan midangah hian beisei tur kan neilo chu a ni ang a, vawiinah kan C.M. zahawm tak kaihhruai sorkar alo ding leh ta. Hei hi kan Trade & Commerce Minister zahawm tak hian min chhonzawm sak sela kan duh khawp mai a. Lungleia kan Super Market building te saw a hlui tawh khawp mai a. Sawmi tih changtlunna tur leh a sak tharna tur emaw chu min ngaihtuah sak sela a tha ka ti a. Chu chu ka ngenna han ni sela.

Tin, Pu Speaker, a tawp berah chuan Zirtirtu indaih lo chungchang kan sawi thin a. Hei Mizoram District Council-te, Union Territory-te, State-te kum engemawzat kan lo kal ta a. Amaherawhchu, Zirtirtu transfer dan system mumal tak kan lo nei miah lo a lo ni a. Tunah kan Minister zahawm takin ruahmanna a rawn siam ta a. Kohhrana Pastor te transfer dan system ang deuhin hard post emaw, a nuam deuhah te an awm chin tur te bithliah ila a ti a. Niminah pawh House zahawm takah thla hnih chhungin kan inpeih hman kan beisei a ti a. Hengah hian Member te pawn tawrh theihna te pawh kan mamawh vein ka hria a. Sawi awmlah a ni lovang chu maw hei, hmannah Consultative Committee-ah chuan ka sawi tawh a. Keini pawh kan bialah Zirtirtu indaih lohna nasa tak mai a awm a, Zirlai za aia tam an awm a Rotlang 'E' khua Primary School-ah, Zirtirtu pahnih chauh an nei si a, tihngaihna a awm si lova, hmun danga mi lak chhuah te kan tum a, an remchang baw si lova. Chuvangin, kan thawmhaw thar lei tur te leh kan sa hmeh tur te titlemin thla khata ₹ 3000/- hlawhin Zirtirtu pahnih kan ruai ve tawp mai a ni. Chuvangin, hun reiloteah te chuan kan peihfel theih te pawh kan inbeisei a. Member dangte pawh hian hmun hrang hrangah keimahni bialchhungah a ni emaw bial pawnah Zirtirtu chungchangah harsatna awm mahsela, zirtirtu posting chungchangah ruahmanna kan lo la nei miah lo te hi thil mak a ni a. Vawiinah kan Minister zahawm takin chumi tithei tura ruahmanna thar an siam te pawh hi fak tlak a niin ka hria a, a lawmawm hlein ka hria a. Chuvangin, heng kan demand han sawi hrang hrangte hi thil tha tihna tur leh ram hmasawna tur a ni baw a. Ka ngaihpaawimawh tlemte ka han tarlang ve a ni. Ka lawm e.

SPEAKER : A lawmawm e, tunah chuan sawi tur kha dinglama mi chuan an sawi deuh vek tawh a. Pu Mawitea'n a la sawi lova, mahse sawi lo mai sela. Tichuan, Pu Lalduhoma kan ko ang a, a dawtah Dr.R.Lalthangliana. Chumi hnuah chuan wind-up lam ti tawh mai ila a tha awm e. Tunah Pu Lalduhoma.

Pu LALDUHOMA : Pu Speaker, ka bula thu senior member hian rei ka thu ve thei si lova, min lo kep zel dawn nia a ti a. In change tha duh

mang silova. Pu Speaker, Silpouline chungchangah hian change pahnih a thlengin ka hria a. Sorkar hmasaah kha chuan Opposition Member te hian kan dawng ve ngailo tluk a ni a. Pakhat lek a changtute hnena kan han dil pawh khan an si hlurh hlurh zel mai a. A buaithlak khawp mai. Tunah erawh chuan rualkhai takin min han sem zel a, kan Minister zahawm tak hian hei hi change lawmawm tak ani a, chhunzawm zel pawh tha ka ti a. Lawngtlai 'E' bialtu zahawm tak khan ruling duhsak bik turte khanin an ngen a khang thlemna lakah khanin ding nghet selangin ka duh a. Tin, kan Lawngtlai 'E' bialtu zahawm tak kha thil kha a thluk rei lutuk hrim hrim a. Hman deuh khan Pu Laldenga'n Pu Buala chu fing tak a ni a tia, Pu Buala a lawm lova, a thluk rei em mai a ti a ni. Chuvangin thluk rei lutuk te pawh hi phal lo deuh la a tha in ka hria.

Amaherawhchu, hei change lawmawm vak lo lo thleng leh chu hmanni a kan dawnah khan kan dawn ngai reng reng loh piece 5 te kha kan han dawng diat diat a, kha kha a quality a chhia a, zep thu lovah. Kan han zar a, a durh pup pup mai a, a size te pawh kha a intiat lo a ni, kha kha Mizoram a kan siamchhuah a nih chuan tax te an pe em, subsidy te engzahnge an dawn tawh, hetiang Industry te kan nei tak tak a nih chuan a lawmawm ang a, a ni lem lo a nih chuan a zialo viauah ka ngai a, chuvangin khati zawng change kha chu awm tawh lo sela a tha mange te ka ti a.

Tin Pu Speaker, a eng department maiah pawh hian kan lu tihaitu chu sorkar hmasate sulhnu pawr hi a ni fo mai a. Inthlan dawna tlin kan duh lutuk leh sorkar kan chak lutuk hian ram tana pawl tur kan khawih thin a, inthlan dawna ruaia district puan sak rum rum te kan ching a. Education-ah hian kan lut anga, tah pawh hian a dik chiah chuan sorkar hmasa khan inthlan dawn hnaiah tum hnih ngawt sikul engemawzat an upgrade a, pawisa nei silovin, anmahni ngei pawhin hlawh pawh pe leh silovin khati khan an ti a, chu chu tuna sorkar hian a chhawm a, kan Minister zahawm tak pawh hi a lu a hai hle ang tih ka rinpui thei a. Sorkar hmasa a a fel pawla kan ngaih te pawh kha an sulhnu chhui hi chu a lo hahtlak deuh hlek chu a ni. Tugin lampang a kan ngaihthlak Minister zahawm takin chhimlam a sikul engemawzat bo anga a han sawi te pawh kha kei ka hre thiam ve lova khang kha, kha aia Chiang Khan a wind-up naah min hrilh sela, khatiang bo thei ringawt pawh kha a dik ka ti lova. MNF sorkar khan tum hnih in thlan dawnah sikul engemawzat an upgrade a. Tun inthlan dawnah khan October 2008 a effective tur khan sikul 82 kha lump-sum-ah dah an ni leh a. Khami an upgrade thla atang khan hlawh pek theih loh a ni a. Tunah chuan sikul 83 a ni tawh a. Tichuan a inkar an pe chho leh a kumin financial year ah pek miah loh an ni leh a. Chumiah chuan tuna kan sorkar-te kan puh vek thei lova, khatiang thil harsa lutuk inthlan dawn chawpchilh a tih an ni thin khan a hnu a lokal leh te tan khan hnawk then tur a pe tam em em a ni tih hi thu dik a ni. Pu Speaker, hetiang hi chin tawh loh a tha ka ti a, chu chu tunah hlawh pawh pe thei lovin kan la awm a ni a, kan in kalpui dan tur a hi ngaihtuah chu a ngai ta a ni.

Education chungchang kan han sawi a, Commission report kan nghak tiin min chhang deuh zel a. Tunah chuan expert committee report pawh kan nei leh tawh a, amaherawhchu thil hi a buai ngai hian a la buai reng tho

mai a. Tin, Grant-in-aid engemawzat kan nei leh a, sikul 200 chuang, chutah chuan basic pay plus 50% of DA a ni a. 6th pay avangin DA te a pung a, anni pawh hian arrear nei tur an ni a, mahse tun thleng hian pek lohvin a la awm a. Tunah hian Deficit te ho nen vek khata chhun khawma, Rule pakhat hnuai dah an tum niin kan hria a, nimirah te pawh kan lo sawi tawh a ni. Hemi chungchang hi ngun taka ngaihtuah a ngai a, an han tum chhin danah chuan category A an tih ho hian engzatnge hlawn an pek dawn a, sikul hian financial assistance engzatnge a hmuh dawn a in zia lova, naupang an neih zat te leh sum dinhmun a zirin a tlachawpa ngaihtuah tur a nih avangin, heng sikul zawng zawng zirtirtu te leh Managing Committee te leh naupang te, an nu leh pa te hi an hlauthawng a ni.

Tin, category 'B' an tih an han duan chhinah hian kum khatah cheng nuai khat leh singga an dawng dawn a, Headmaster hlawn daih awrh a ni hei hi, kum khat chhungin, chu chu an dawn tur a nih si chuan, hei, school dinnaah hian ka tel ve hnem tawh a, Private school dinnaah te, Kohhran school dinnaah te ka tel hnem ve tawh a. Tunah pawh Grant-in-Aid Adhoc-ah hian kan veng High School chu kan dah a, kan enkawl a, keimahniin, kumli chhung 100% an pass tawh a, kan lawm viau a. Donation kan khawn tawh lova, kan zirtirtute hlawn sorkarin min pek theih tawh avangin hahdam takin kan awm ve thei tawh a, kan zirtirtute pawh an hahdam ve thei tawh a. Kum khata Headmaster hlawn tham lek an dawng leh dawn a nih chuan khaw engzat hi nge buai ang, naupang engzat hi nge buai ang; han khawn leh dawn ila, a harsa em em tawh bawk si a, tam tak chu kan tawp te a ngai dawn a ni a. Chuvangin hlauthawng leh duh loh na lo lang hi kan Minister zahawm tak pawh hian hrethiam sela, pawng react-na chiah pawh ka ngai lova, a sum dinhmun tur a chian loh avang hian hlauthawng lo thei lovin kan awm a ni, hei hi a awm a ni. Tunah a management ringawt a kha chu rawn ti danglamin, sum kha tuna category pathumin an dawn ang kha a ngaiin kal dawn sela chu tumah kan phun ka ring lo, chuvangin a sum dinhmun a hi theih ang tawkin sorkarin rawn siam tha sela, a management erawh hi chu angkhata min hrut rual hi chu a tha ka ti, tuna a draft pawh hi ka'n thlir a, a tha ka ti. Dik takin tualchhung mite local committee ngeiin sikul kan run hi a tluk a awm lo, zirtirtu kan la a kan duh chuan kan ban thei a ni, result pawh a tha a ni. Heng kan han lak ve te te chhun bakah department-in a hei hi chu kan rawn la ve dawn an tih reng reng hi an tualchhunga kan lak mihring hi an tluk ngai lo, nichin lawkah pawh khan qualified lo an lak pawh kha kan hria, khang kutah khan kan sikul hi dah kan phal lo. Khatiang ang zawng a duhsakna a kal a nih chuan MLA te pawn duhsak zawng thun kha kan duh leh zel ang a, a system a that loh chuan kan ni vek mai ang. Chuvang chuan local management kuta a awm hi a tha a, sorkara a luh chuan. Sorkar kuta a awm chuan zungawlvei pawh an ban ngam tawh si lo va. Chuvangin, a management lai bika kha chu a Rules-ah hian rawn siam se la, min hrut rual se la, ka pawiti miah lova. Kohhran sikul a nih pawhin anmahni school khan an enkawl danin enkawl zui mai rawh se. Sorkar chuan a quality te, examination te, a syllabus te, sum leh pai tanpuina te, khangah kha a va ti mai tur a ni a. A tha em em tho dawn a ni. Chuvangin, khatianga kal tho kha chu tha ka ti a. Chuti a nih loh chuan court-a kal ngai khawpa thil awm mek te hi a zia lo a, chu chu kan hre Chiang tawh a. Khatiang sorkar leh khatiang department hnuaiyah kan ram zirna hi kan dah zel dawn a nih chuan kei chu a tha ka ti lo. Huai taka kan sawi ngam a tha ka ti.

Heng ang mi mangang te, nu leh pate emaw te hian tu tute hnen an lo thleng ve a, an lo zualko ve a, he House-ah hian kan lo sawi chhuak ve a nih pawhin indem loh tur, politics inkhel ti a inhau ngawt loh tur. A hmingin ram nu leh pa kan ni a, kan hnenah chuan an sawi ve tur a ni. An harsatna chu hetah hian kan rawn represent a, kan rawn sawi chhuah hi kan duty a ni. Invauva a engemawti zawnga intih vakna chi a ni lo tih hi ka sawi duh a.

A dawt lehah chuan MNF sorkar hunlaia thil lo thleng tawh tuna kan sorkarin a kih hnawk belh zel lai hi ka sawi duh a. Chu chu computer education chungchangah hian a ni. Kum 2004 atanga 2008 thleng kum li chhung atan khan SSA hianin ACES Infotech, Kolkata nen hian agreement an lo siam a. Agreement hmasa berah chuan Middle School 80 ah Class V atanga Class VII thleng Computer additional subject an zirtir ang tih a ni a. Kum khatah sikul pakhatat Cheng nuai 2 leh sing 3, zel kan sorkarin a pe tur a ni. Sikul pakhat enkawl nan nuai hnih chuang dawng zel tur company chu an nihlawh khawp mai. Sorkar hmasa khan a duhsak hle a ni he mite hi. ACES ina a tih ve tur thung chu licenced hardware te, software te, text-book te, course material te, computer consumables te, internet facility te, table te, stool te leh computer te leh instructor min rawih sak te a ni a. Khang zawng zawng kha ni 40 chhungin a ti tur a ni tih a ni a. Chubakah School tinah Zirtirtu 5 theuh Computer training a pe tur a ni tihte a ni a. Heng an tihur hi tih a lawi an neilo ani, tin, Computer supply pawh hi a model hlui ber chi outdated 1.2 GHz model hi a ni a, tuman hetiang hi an hmang duh tawh lo. Chutianga an tihve tur ti lo chung chung chuan Sorkar hmasa khan agreement a lo sign pui nawn leh a, chu chu 2006 July ni 14-ah khan a ni, kumli atan bawk. School 80 an enkawl mek lai an enkawl hnehloh viau laiin School 60 dang enkawl leh turin agreement vawihnihna siam a ni a, condition dang chu a ngai a ni a, tichuan School 140 an lo enkawl ta a ni. An ti thalo hle chung khanin agreement vawi thum na 2008 April ni 11-ah kum 2 atan an sign pui leh a, chutah chuan School 80 atan agreement an lo sign expired tawh kha an renew sak a, School 60 dang kum 2 atan an tih kha chu renew a la ngai lova, hmanraw hlui zawng zawng kha an hman an phalsak bawk a ni. Tichuan an performance a tha miah lova, School-ah Instructor an rawihthe hi curriculam pawh an pe lova, a Instructor a ten an mahni duh duh an zirtir ringawt a. Kan ram zirna Company kuta pek ringawt kha a ni a, Instructor appoint tu pawh Company an ni a, chuti chung chung chuan tuna kan Sorkar hian agreement nikum October ni 1 khan a lo sign pui leh a. Hetah hian Central a hotulu lal takte pawh an rawn inawlhru nia hriat a ni a, chutah chuan centre 140 an enkawl bakah 140 dang a thar pekbelh an ni a, School 280 an enkawl ta a, Computer an pekte a thalo va, tin pawl 8 thleng a lo huam ta a.

Tunah hian ka zawhna ah khan engzahnge kan sen tawh ka ti a, nuai 2112.70 hi he Company hnen a kan Sorkarin sum kan sentawh a ni a, kan la pe zel dawn. Khatiang ringawt a sorkar hmasa a tlatlum, tun a pawh tlatlum zui zel mai hi a hahthlak in ka hria a, tute emaw kihhnawk kan kithnawk belh zel dawn a nih chuanin awmzia hi a nei lo khawpin ka hria a. Tin, Private School pawh a regular subject anga an kalpui theih laia Sorkar berin additional subject a kan kalpui tlat hi mak ka ti a, heng kan insenso zawng zawng hi titawp ila, SSA hnuaiah hian awm mai sela, he kan sumpen zawng zawng hian zirtirtu ruai ila a tha daih zawk ang, regular subject in, chu chu kan rawt duh a.

Tin, College chungchang hi ka'n sawi leh lawk ang a, Higher & Technical Education Department hnuaia College zawng zawng hi UGC

Composite Scheme hnuai a wvm vek an ni a. An terms and conditions kan zawm a ngai a, chumi kan zawm chuan an hlawh 80% kum nga chung min tum sak thei a, building grant te, library grant te, khatiang zawng zawng kha 1990 atanga kan Sorkarin a pek hleihtheih tawh loh kha tunah hian an rawn pe a. College thenkhat nuai 50/60/100 chuang UGC atanga dawng an kat nuk a, a tha em em a ni. Kan College building thenkhat te a collapse lek lek tawh tihte kan hria a ni. Chutih lai chuan kan Sorkarin he UGC norms pension age kum 65 tih hi tun thleng hian a pawm thei tlat lo mai a ni. A pawm theih loh chuan an grant min pek zawng zawng hi hnuhkir vek theih a ni. Khami a nih avang khan zirtirtu te pawhin an arrear pawh an claim tha ngam lova, an inthlahrung em em tih kan hria a. Hei hi kan Sorkar hian rawn ngaihtuah tha leh sela, Cabinet hialin ngaihtuah tha se a thain ka hria a. Kum 65 hi experience teacher neih an duh avanga an tih niin a lang a. Keinin sum kan nei si lova, anni sum kan hman theih dan tur a nih phawt chuan an duh ang lo tihhlawhtlin mai hi kan ram tan a that zawk ka ring a.

Tin, semester system kumin atangin kan han ti tan a, chutah chuan a ratio hi chu Science Teacher hian naupang 8 a zirtir tur a ni a, Arts Teacher hian naupang 15. Tunah hian naupang 100 chuang zirtirtu pakhat hian an enkawl a. Tin, admission a lo tawt em em a, in admit tur tih a ni si a, room leh additional khatiang thil kha an pe chuang silova.

Tichuan, 'morning shift/evening shift siam mai rawh u' Sorkarin a ti a, kha kha chu an tan chuan hna chuangtlai a ni tawh a, an siam a nih chuan remuneration/honorarium engemaw kan pek ve te pawh kha a tha a, engmah a thawktute tana sum leh pai hlawkna tur awm chuang silohah kha chuan harsa an ti ve ni te hian a lang a. Hei pawh hi Pu Speaker, ngaihtuah that a tha hlein ka hria a.

Heng zawng zawng a thlenna chhan hi kan budget a tlem vang a ni, kan sum indaihloh vang a ni. Tunah hian Central-ah chuan Education-ah hian an budget pumpui atanga 24% an dah niin ka hria a, State Sorkar hi 20% vel dah turin min ti niin ka hria a, tunah hian kan Minister zahawmtak hian Department puitling 2 a enkawl a, a pahniha kan budget hi 8% vel a ni em aw ka chiang lo. Chumi avanga buai chu kan ni, tunah hian sum chu awm se heng hiar neuh neuh hi a hmeh daih vek theih a ni. Chutiang harsatna chu kan Sorkar pawh hian a tawk mek tih kan hria a, hun lokal zel turah Prime Minister Office pawhin Band on Creation of Post-ah pawh Health Department leh Education Department chu a exempt a ni tih pawh kan hria a, ngaihpawimawh bik a hlawh a. Chuvang chuan Education a kan harsatna lianpui puite sutkian a nih theih nan Budget-ah hian thil phal a tha hlein ka hria a. Heng thil hi a tawpna bera ka'n sawi duh chu Pu Speaker, thahnemngaihna aw a ni, a chhe zawnga insawina lam a ni lo, thahnemngaihna leh hma kan ngaih vang zawka kan sawi chhuah a ni a. Chuvang chuan a sirah hian a damdawi chu engemaw chen a awm ve zel avangin theihtawp chhuaha kawng dika kan kal a, naupangte tilunghnur lovin theihtawpa kan kalchhoh zel a thain ka hria a ni. Ka lawm e.

SPEAKER : Dr. R. Lalthangliana.

Dr. R.LALTHANGLIANA : Pu Speaker, ka lawm e, ka thenawmpa hianin arawn tih ve zauh zauh a ngai reng a nia, kan hrethiam khawp mai a, anni hi la sorkar lo anni si a, tih ve kha a rem lova. Kihhnawk tih engemaw hi a awm lo thei lova, kan han sorkar phat kha 1998 khanin District 5 kha i dinglama mi te khan an lo hawng sia kan buaipui nasa a nia. Amaheawhchu, kihhnawk tih chuan a hming chu kan phuah phal miah lova, thatakin kan enkawl ve bawka nia, tih kha ka'n sawi duh a.

Hei, a pawimawh lai tak kan sawi hmasak duh chu Pu Speaker, Mizo mipuite hmaah hian kan intiamnaah hian kan rinawm em tih hi tun sorkar-in an term chawhnu lam an hman mek lai hianin kan sawi duh a.

Tahchuanin Health chungchangah hian kan sawi duh a. Hei Manifesto chungchangah hianin phekk 14-na Health Care tih chungchangah hian mirethei Medical Re-imburement bill pe ve thei lo te tan Health Insurance Scheme Prime Minister-in a puan zulzui Mizorama hman ve theih a ni ang a, HIV Aids mirethei damdawi ina admit kher ni lo, pawn lama damdawia inenkawlte pawhin M.R. an bill theih dan tur ruahman a ni ang a, kan ti tawh em aw tih kha kan zawt duh deuh a ni.

Hei bialah kal lawk teh ang Buarpuia kan Hospital sak thar kha a hmasa bera tihphuisui, sorkar hmasain a sak kha kan duh a. Tin, a thawktu male leh female Health Supervisor kan neih loh te, tin, staff nurse indaihlohna nasa lutuk te, tin Doctor Dental-te leh Ophthalmic min pek tawh lak let leh te dah kir leh dan a awm em? tih te. Tin, Doctor bak, quarter dang reng reng kan nei lo te leh Clerk LDC, tunhmaa nei thin kan nei lo te kha kan Minister zahawm takin min lo chhinchhiah sak sela tih kha ka'n sawi duh lawk a ni.

Tin, tuna kan Health Care kalpui dan hi a complicate nge ni ka hre lova, mi pakhat buaipui ka nei a, ka buai khawp mai. Hetiang chuanin a facility kha dawng tho si khanin awmze nei lovin kan kal thei awm mange. Entirnan : Hepatitis tih natna ang te kha kumin March thla vela an dilna kha a la tang tlat mai a, a buaithlak khawp mai a khatiang chi kha karlehah injection ngai sing chuang hman ngai ang chiahte khanin a applicable lo khawp mai a, tuna kan hman dana hi kan Minister zahawm takin min lo enpui se tih kha ka duh a. Tichuan Labour & Employment-ah hian kan kal lawk duh a, "Thalaite Khawvel" tih he lehkhabu bawkah hian thil tha deuh deuh mai a awm a, phekk 17-naah hianin - a rang thei ang berin Youth Welfare Commission kan din ang a, hna thawk thei tak tak turin thuneihna sang tak leh sum/fund thahnem tham tak nen bul kan tan tir ang tihte, Youth Welfare Commission kutke tur Youth Development Corporation kan din nghal tih a ni nghe nghe a hei kum 3 dawn a ni tawh a, nghal kha kan changchawi deuh a ni. Tin, India ram tawng liante leh khawvel ram dang tawng lar zualte zirna tur, a ropui dawn khawp mai, hei Professional Language Institute kan din ang a ti. Thil tha hi chu inthlan dawn hi chuan kan sawi teuh mai a, ziak pawn kan dah a, amaherawhchu, heng hi tih tak takna thinlung kan neih hi a pawimawhin ka hria a. Nge ni a, Sorkar hmasa in 2008 bawr vela Youth Commission kan dina kha heng zawng zawnga hi chu a huam vek alawm tih a ngai lo kan ti ta nge ni a tih Labour & Employment chungchangah hian min rawn chhang fiah sela ka duh a ni.

Tin, Education chungchangah khanin Pu Duha khan a rawn sawi a, ni e heng school kan upgrade te a nihna takah helaiah chipchiar a sawi theih a ni lova, school 48 te provincialized a hlan kai te phei kha chu hetah kum 10 in sorkar lai atanga kal chho zel a kha a ni a, a sum hranpa kha chutianga senso hranpa pawh awm lo kha a ni a. A hnu zelah entirnan lumpsum grant te pawh hi 2003 bawr vel atanga kal chho kha a ni a, a inthlan dawn tepa kha suma kha a rawn dah a ngai em em tur ang chi a kan sawi fo a kha a dik loh vena lai kha a awm a. Tin, Sorkar chu Sorkar a ni a, kan tlanche duh lo a ni, kha Sorkar kha 'kan ti ang' kan tih chu kan ti thuai mai a. Amaherawhchu, Sorkar a inthlak a, kan ngaih pawimawh zawng hi a inan a tulin ka hria a NLUP ang zet hi chuan ngai pawimawh thei lo mah ila a dawttuah tal hi chuan ngai pawimawh ilang chuan hetiang harsatna hi Education Department-ah kan tawk lo mai awm mang e aw! tih kha kan sawi duh a ni. Tin, kan Member thenkhat ten Education-zirtirtu transfer te, posting te, rules-te pawh hi kan lo nei ngai reng reng lo tih kha an hresual a ni mai awm mang e aw ka ti a. Education Act hi nei lovin hun rei tak kan lo awm a, kum 2003-ah concurrent list a awm a nih avangin harsa tak chungin central sorkar kaltlangin helai Assembly-ah kan neih a ni tih kha kan hrechiangin ka ring a, khami denchhan khan rules engemaw zat Sorkar hmasa khan rules 8 nge ni 9 duan chhuah hman a ni a, House-ah pawh lay a ni a, chu chu vawiinah hian kan nei lo anga sawi kha in hre fuh lo deuh a ni awm mang e aw ka ti a. Kan hman leh hman loh chu kawng dang ni sela tih kha kan tarlang duh lawk a ni.

Tin, kan bialah kan lut lawk ang a Education-ah hian, Buarpui High School hi a pawimawh hle a, kan Hindi zirtirtu leh Science zirtirtu min lak chhuah sak a, tumah a dang an rawn dah tawh silo, kan mang ang khawp mai. Tin, Sertlangpui High School-ah Mathematic zirtirtu pakhat min pawh chhuah sak a, midang tumah zirtir thei kan awm silo a, a buaithlak khawp mai a hei hi en vat a tih fel vat tul in kan hria a. Tin, DIET ho hi, a thawk ho hi February thla atang khan hlawh an la tawh lo a, nikum lamah harsatna te pawh kan tawk tawh a, a manganthlak khawp mai a, niminah khan zawhnaah khan advance allocation pek an ni tih a ni a, amaherawhchu, June thla thleng vel emaw lek a ni a, nakin lawkah an harsa leh dawn tho mai a, chuang chuan hei hi ngaih pawimawh hmasakah nei thei sela tih kha ka'n sawi duh a. Sorkar hmasa hunlai khan heti taka hlawh lak harsatna hi an tawh ngai ka hre chiah lo a tih ka'n sawi duh a ni.

Tin, ka'n sawi leh duh chu Pu Speaker, hei Mizoram Deficit Mission School-te hian harsatna neuh neuh kha an sawi thin a, chanchinbu pawh a luah nasa a, pensionary benefit tih te, contract teacher kum 9/10 dawn lai lo thawk tawh mi 49 Modern High School-ah te, Synod Higher Secondary School-ah te, Baptist Higher Secondary school-ah te, kang ho kha an rei ve tawh si a, dah ngheh ve dan te kha ngaih pawimawh sak ni thei sela post ruak, regular post-ah siam sak nisela tih kha kan sawi duh a. Tin, an DA arrear 26% la theilo a hun rei tak an awma kha an la thei dawn ta em? tih te leh anni hoa hrim hrim hi kan School Education Department enkawlna hnuai ni ve deuh si, ni chiah lo, deficit system a an awm laia kawng leh lamah chuan kan education-ah min chawimawi tu an ni tih hi tawngka mai a House-ah hian sawi lo a, a taka an harsatna hi vawiinah hian kan address-a hi

a pawimawh hle in ka hria a, chu chu tawi tein ka'n sawi duh a ni a. Tin, chu loah chuan kan lump sum grant school tih te leh adhoc grant-in-aid tih ang chiah kha chuan nimin a tawi tea helaia House a pahnih/khat in kan sawi kha a remedy chu ni maiin ka hria a, he ta tana mamawh tur dah tih kha dah mai ila an harsatna hi chu kan sut kiansak mai ka ring a, churang chuan kan ngaih pawimawh leh ngaih pawimawh lohah hian thil tam tak hi a inngat a ni tih hi kan tarlang duh a ni. Tin, kan sawi leh duh chu Pu Speaker, hei SSA chungchangah hian in kum 2010-11 chhunga hemi PAB minute a ni 28-a chhuak Govt. of India Ministry of Human Resource atanga chhuakah hian ka ui deuh hlek a ni, ka'n sawi chhuahna chhan hi, hemi sanction ruahmanna lo kal danah hian intervention for CWS tih chung chiahah hian sikul uniform, zirlai naupang 185789 tana a free a uniform an leina tur hi hmang thei lovin he pawisa hi a lapse hi pawu ka ti khawp mai a, hei hi thil pawu tak a ni, chengkhat pawh hmang lovin cheng nuaih zasarit sawmli pathum leh singkhat leh sangruk hi a liam ringawt mai a, hei hi a spill over theih chi a ni si lova, thil pawu tak niin ka hria a, kumin a allocation lokal lehah hian kan hniam phah ta nghe nghe a. Cheng nuaih zanga leh pakua point six two four chauh kan neih phah ta a ni, hei hi thil pawu tak niin ka hria a kan tarlang duh a. Pu Speaker, hemi PAB minute-a hi i dawhkan hi thleng ve reng reng se tiin ka rawn dah nghe nghe a, a pawimawh ka ti tlat.

Tin, chu loah chuan hei, PAB Minutes bawkah khanin 2010-2011 chhunga kan pawisa hmuh tur hi chiang deuha a rawn tarlan chu nuaih 11636.28 a ni a, amaherawh chu a tak taka kan hman a chu nuaih 9226.98 ani a, chumi awm zia chu nikum liam ta a pawisa kan hman loh hi vaibelchhe 24 leh singkua leh sangthum a tling a, tah chuan tih nun theih loh tlat kha hetah hian a awm a, tah chuan kan hloh hlen tak kan ti mai anga a tawi zawngin hei hi nuaih 1119-a tling a ni. Heng ang te hi hloh lo ta ang ila chuanin helaia kan harsatna awm kan tih kan tih te pawh kha kan su zangkhai thei mai awm mang e ka'n ti a. Engpawh nisela, a pawu ka ti khawp mai a. Heng hi a sawichhuah loh theih siloh a, ka han sawi lawk a ni. Tin, PAB bawkah hianin supplementary plan SSA Mizoram tan hianin DRC Block resource centre hnuaiiah hian post hrang hrang thawk, NIS coordinator tih te, Accountant tih te Data entry operator tih te hlawh kha ruahman a ni a. Chutah chuan thil mak deuh chu state office te leh BPC ti mai ila, District office a thawk te hlawh hi tihsan tehchiam mang si loh khan a inthlau zung mai ni khan ka hria a. Hei hi en that ran a tha in ka hria a, ka'n sawi duh a ni.

Tin, North East dang te nena kan khaikhin hianin kan hmu thahnem lo ve ang reng viau mai a. State thenkhat Manipura kan thenawm chiah te phei chu 400 % ten an punga an allocation a hi, keini hi kan pung tha lo viau mai a. Kan right to education lo chhuak hi keini hian kan hlawkpui ta lo mai emaw ni chu aw ka ti a, kha kha kan sawi leh duh a ni. Pu Speaker, hei RMSA chungchangah hian sawi kan duh lawka chu SSA-ah te pawh a ni thova. Kan han sorkar lo chiaha, hemi sikul building sak mai maiah te, hemi RMSA, SSA School building sak ang chi reng reng contract work-a kan han pe a, supervisor kan appoint zung zung mai hi a fello khawp mai a.

RMSA chungchangah phei chuan Government of India atangin Ministry atangin kan sorkar hi a rawn khak ni te pawhin kan hria a. Zirtrute kha contractor nihtir lam a ni lo va, Village Education Committee a VCP chairman-na hnuaiia mi chi hrang hrang te ina collective responsibility la a, account fel tak neia hlep awm lova an saka kha kan duhna a ni a. Chu chu kan lo kalpui dan thin SSA ah

khan a ni a. RMSA ah pawh hian khatiang khan School Management and Development Committee fel tak din tura tih a ni a. Khang ho kutah khan civil works te hi chu akal tur anga kan ngaih laia contract ang zawng vek mai a kan ti hianin harsatna tamtak a siamin ka hria a, a pawl ka ti khawp mai a. Chung chu central sorkar pawhina an duh dan pawh hi niin a lang lova, kan han tarlang duh a ni. Tin, hei National Scheme for incentive to girls child an tih hnuaiah hian hmeichhe naupang pawl 10 an lo pass hian Cheng 3000 theuh pek theih tur scheme a ni a. Hei hi account te pawh kha hawn tir vek an nih tawh laia kum 2008 atanga sanction awm tawh, zirlai a sing tel account hawn tir vek tawh hnu a an account a waviin thleng pawha kan la dah thei lo em em hi chu kan inngaihtuah chian a pawimawh hlein ka hria a. Hei hi engnge ni a chhan tih kha ka zawt duha, hei hi 100 % funding, Govt. of India atanga lo kal a ni lehngal a, a uihawm hlein ka hria a ni. Tin, Pu Speaker, Lunglei district a khawthlang lampang Lungsen khua a kum 2009 atanga 2010 inkara pawisa awm sa vek, a hmanna mumal awma kan hriat tak loh, Girls' Hostel kan tih kha engnge ni a chanchin tih hi min hrilh thei sela tih hi kan minister hi ka'n chah duh a ni.

A tawp berah chuan hei kam hnih khat lek ka'n sawi duh chu, Education piah lamah hian Trade & Commerce ah hian, an Plan Fund kha ka'n en a, kumin 2011-2012 kha. Nikuma an allocation kha Plan ah khan nuai 400 a ni a. Kuminah hian nuai 250 chiah a ni ta mai a, nuai 150 in an heu a. Hei hi ti se a tha ang a tih pawh sawi ngam loh khawpin an heu ta duai mai a. Hei hi pawl ka ti khawp mai a. Engnge ni a chhan tih leh Kawrpuichhuah, Tlabung thlanga kan Border Trade Centre a kan hma lakna kal chho mek chanchin kha kan hre chak bawka a ni.

Tichuan AH&Vety hi a tawp berna a ka'n sawi duh chu, hei Zobawkah sawn Diary Plant kan nei a. Tlem lai deuh khan zawhna te pawh kan rawn zawt tawh a. Hei hi Lunglei District tan chuan a pawimawh khawp mai a. Amaherawhchu, khawl saw a hlui lutuk tawh a. Sorkar hmasa hun lai pawh khan kan complaint kan complaint a, kan repair a, pawisa kan pe a, kan han ti leh naw naw thin a. Mahse, a tha ziktluak tak tak thei lova. Consultative Committee ang pawhin kan sawi tawh thin a, hei kan minister zahawm tak dawhkan kan kil a, a sawt hlei thei lo khawp mai a. Lunglei piah lamah pawh hian Kolasib-te, Champhai lamah te pawh harsatna lian tak an tawka a ni tih hi he House ah hian ka'n sawi nawn leh duh a. Chuvang chuan heng hi ngaih pawimawh a, a bik takin AH&Vety-ah hian neih sak ni sela tih kha ka'n tarlang leh duh a ni. Pu Speaker, ka lawm e.

*Speech not corrected

SPEAKER : Kan sawihona chu kan duh tawka tawh ang a. Tunah Pu Lalsawta, Minister zahawm takin a chanvo te, member te rawn sawi te rawn wind-up sela. Tin, wind-up zawhah pass rawn dil nghal rawh se. I lo ko ang.

Pu LALSAWTA, MINISTER : Pu Speaker, ka lawm e. Department 4 : (i) School Education, (ii) Higher & Technical Education, (iii) Law & Judicial leh (iv) Parliamentary Affairs Department ah hian waviinah mi 20 in an sawi a. Amaherawhchu, ka department rawn sawi lo te pawh an awm ve nual bawka a. Ka lawm khawp mai. Min tuipei tih a Chiang a. Heng an sawi hi thahnemngaihna vek a

ni a. Hun hi nei thei ila chuan a mal te tea an sawi hi theih ang ang a sawi fiah a chakawm hle mai a. Amaherawhchu khatiang a kan tih chuan kan rei lutuk thei dawn a, a pawimawh zual zual te ka'n thlang mai ang a.

Member zahawm tak Pu Thlenga khan, tuna pawl 8 Middle School a kan han dah tak chungchang a chhim lampang a mi School kan sak, bo ta daih ang a han sawina lai, nichinah pawh khan Member zahawm tak Pu Duhawma khan a rawn sawi tho a. Keini number atang chuan 287 hi sak tawh a ni a, tunah 349 kan sa leh mek a. Chutichuan Middle school, Sorkar school, kan neihte hi hemi belh khawm tur hi a ni si a. Mahse Lungleiah sawn 10 chuang hret la sak loh a awm an ti si a. Chuvang chuan nichina an sawi tak ang deuh hlek khan, Adhoc school emaw, private school emaw hi kan DPC te emaw hian an lo saktir mai a nih dawn hi, kan ti a, kan in en fel mek a. Sorkar school ni lo kha an lo sa palh mai a niang a, kan ti a ni. Tin, naupang 54 awmnaah zirtirtu 8, Saitualah an awm sa a, 7 pek belh an ni a, tihte hi a tak tak turah ngai ila, kan lo in enfiah ang a.

Tin, Mathematic teacher chungchang te, hengah hian, Pu Speaker, mi dang pawh la khawih ve vek thoin, a pawimawhna lai kan sawi duh a. Tun tum a Cabinet in 270 pek min phal khan, contract teacher kan lak dawn khan kan recruitment rules ina a tih ang hi kan mamawh puhruktu niin kan hre lova. Chuvang chuan Mizoram mamawh tur milin Science zirtir thei, Mathematics zirtir thei, English zirtir thei lak theihna turin kan recruitment rules hi kan relax ta a ni. Chutiang a nih loh chuan B.Ed hian Mathematics leh Science te an zirtir thei chuang lo, chuvangin khangte neih ai khan chuan kan ti a, hei hi Pu Speaker "Change" pakhat chu a ni phawt maiin kan hria a.

Pu B. LALTHLEGLIANA : Pu Speaker khawngaihin Recruitment Rules kan relax tih kha amendment awmlo a, khatia mahni duh hun hun a relax kha a theih ngawt dawn em ni?

Pu LALSAWTA, MINISTER : A theih ve dan a awm a, amendment ang lo khanin hemi tum atan hian chuan 'relax' ni rawh se tiin Cabinet khanin decision kan siama, chuvangchuanin 'relax' theih a ni tih hi Rules-ah hian Provision hi a awm thin bawk a, a tul avanga 'relax' theih a ni. Chuvang chuan chutiang chuan kan han ti mai a, kan mamawh loh neihbelh ai chuan kan mamawh tak mai lak kan duh avangin Recruitment Rules kha kan han relax hlek a, kan han sawi angin kan mamawh ang chu.

Deficit Mission school chungchang kan sawi deuh veka, hei hi sawifiah a thain ka hria a, Pu Speaker, Deficit Mission School te, heng ang, Adhoc school kan tih te, tin pawl XI – XII zirna, Higher Secondary School kan tih ang te hi, kum 1996 hnua lo piang te an ni hlawm a, a Dan kan neih hian an ni tanpuina tur hi alo huam reng reng hlawm lo mai a, High School thleng chauh kha a lo huam a ni a. A Danah te pawh khan Higher Secondary School Examination tih te kha a lo tel si lo a, High School Leaving Certificate chin ang te kha a lo puih theih chin kha a lo nih avangin, a Dan hrim hrim kan neih mek hian a lo huam pha lo nual mai a, chuvang chuan a Dan siam that hi a lo tul a. 2008 kuma sorkar hmasain a a 'upgrade' pawh

khan Dan awm lo a upgrade a ni a, vawiin thleng hian Dan awm lo a, an ‘upgrade’ a kha kan ‘honour’ a ni.

Tin, kan ngaihtlak tawh thin angin sorkar school chauh lo pawh hi school tam tak kan neih hi a tul kan ti a, kan neih te hi an tha hlawm bawk a, private school tha tak tak kan nei a, kohhran school tha tak tak kan nei a, Adhoc school tha tak tak te kan nei a, sorkar school tluka tha te pawh hi a awm a ni. A aia tha angte pawhin thenkhat chu an inchhal hial ang, chuvang chuan heng ang hi sorkar chuan kan mawhphurhnaah kan ngai teh meuh a, amaherawhchu kan Dan neih lai hian an that chhan a hi Danah hian a lo tuam tel lova, a chhan chu an that chhana hi Mission sikul te chu Chairman-ah khan Moderator te an lo ni ta a, an zahawm em em a. Tin, a member-a te pawh kohhran-a mi pawimawh tak tak te an ni a. Mahsengin kan danah chuanin Selection Committee-ah khan a chairman kha District Education Officer a ni a, a chairman ber sorkar officer a nih khan Kolosib-ah pawh harsatna liantham angreng tak kan neih phah a lak duhzawng a inang lo tlat mai a. Member zahawm tak Pu Duhoma pawh khan a rawn sawi a. Chuvang chuan, “Kan Dan hi vawiina sikul tha tak tak kan neih chhana hi Dan bawhchhiat reng ngai lo hian a Dan hi siamtha ang u” kan ti a ni. Hei hi hriatthiam loh lutuk turah pawh kan ngai lo, Dan bawhchhiat ngai lova Dan hungchhunga Dan siamthar mai kan tum hi huatthlala vak a awm lo a ni.

Tin, hemi in a ken leh pakhat chu Pu Speaker, Group Category ‘A’ leh ‘B’ tih chungchangah khan B tia kan han dah hova hi tuna kum khat a cheng nuai khat leh sing nga, Higher Secondary a nih chuan, chumi aia hnuai, High School chinah chuan nuai khat leh sing hnih, kan tih ho hi tanpuina satliah ti ila tu huatthu a ni lovang a, kum chanve bi a kan pek den den private tak takte, tin, khawtlang ina harsa taka an lo din, mi tlawmngai an lo chhawr ve, “Tlem tal chuan kan lo pui ve ang che u aw” tihna lek fang a ni. Category A-ah erawh hi chuan a limit awm hranpa lovin kan buatsaih a, heng kan tih nachhan hi, Pu Speaker, mumal takin ngaihtuahna kan hmang a ni. Pu Speaker, “Engvangin nge Kohhran sikul te, private sikul te, khaw ta bik sikul te hi a that?” kan tih chuan an fate kaltir tute enkawl a nih hian a lo tha alawm mawle. A neituina an enkawl hian a tha a ni tih kan hria a ni. Chuvangin Kohhran sikulah pawh hianin Kohhran thunei tak mai, thikthu chhe tak, Headmaster emaw Principal emaw rui mai mai ngaithei hlek lo tena an lo enkawl hian school tha an ni tih kan hria a. Zirtirtute pawh hi an ngil awtin kan hria a ni. Chutichuan khaw bik enkawl sikul chungchangah pawh a khaw neitute pawhin sorkar enkawl aiin an tha thei a, sorkar te chu phat rual lohin kan del dul vena chin te pawh a awm a, kan enkawl tam hrim hrim bawk avangin. Sorkar aia tha zawka a Community, a local people tena thikthu chhe tak mai a an zirtirtute an vil ranna school hi kan duh a ni. Chutiang chuan Community Empowerment hi tulin kan hria a. Chutiang ang zawnga kan han tih hian zirtirtu tam tak chuan en hnaih lutuk te pawh an lo duh vak lo a ni mai thei, ka hre lova. Engati nge heti taka kan intih chhan hi. Lo bih hnaih lutuk a, vil hnaih lutuk pawh an duh lo a ni mai thei. Keini rilruah chuan school tha kan neih dawn chuan zirtirtu tha hi a hmasa ber ani kan ti tlat a ni. (Interruption)

Pu LALDUHOMA : Pu Speaker, kan Minister hnenah hian kei pawhin thurawn ka lo pe tawh zawk a. Kha kha kan dodal reng reng lo va. Tuna zirtirtu ho hian an duh lo a nih pawhin, an duh tur a ni. A tha a ni, kha kha, kha kha chu kan thlawp em em. Amaherawh chu, helai category B kum khata cheng 1,50,000/- dawng tur nih hi an hlau ta a. Kha kha tuna Adhoc Basis-a kal ho hi chu Category A ah an lut vek dawn tihna a ni em? Kha kha a nih chuanin an buaina chu a reh duak ang. Khalai kha kan Chiang duh a ni. A amount-a hi a decrease thei a, a increase thei a, depending on the availability of fund tih khan a tih thaih tlat alawm mawle.

PU LALSAWTA, MINISTER : Pu Speaker, lo hlauhthawn awm nihna chen te pawh a awm ang. Mahse keinih chuan tuna dawng mek ho te hi chuan khatiang khan an la dawng ve zui hrih ang a. An phu dan ang zelin Category A-ah te pawh an la lut ang a. Tin, Category B-a kum khata ₹ 1,50,000/- chu leh ₹ 1,20,000/- chi a pawh hi khawtlangin a an mamawh dan ang zela la pung chho vel zel turah te kan ngai a. Tuna Adhoc kan tih ang chi ho leh Deficit kan tih ho chi anga hi Category A vek a awm turin keini chuan kan ruahman ani. Chu chu kan kalpui dan ani.

A enga pawh chu nise helai chungchang hi keini ngaihtuah dan chuan zirtirma tha nei tur chuan Zirtirtu tha a ngai si a. Hlawh tlem zawk private sikul a tha viau zawk si hi eng dang vang a ni lovang, discipline te, inpekna (dedication) te sacrifice te a ni ang a. Chuvang chuan, tuna kan Kohhran Sikul tha tak tak te pawh hi Sorkar ang diak diaka kan enkawl hian a 'spirit' (a thlarau) a te pawh hi kan tibo ang tih hlauhna kan nei ve deuh a ni. Chulai chu he House zahawm tak pawh hian min pawmpui pawh ka beisei a. Inpekna avanga sual chhuah hi he khawvel kalphung hi a nih ve hrim hrim avang hian an inpekna azara hei leh chen sikul tha an lo nih theihna chhan hi chhawm nun kan tum avangin he dan hi kan buatsaih a ni.

SPEAKER : Result artelukawn thin pawh kha Member zahawm tak khan a sawiin ka hria a. Khang ang chungchang te pawh kha tun hma khan en tur kha awmin ka hria a. Kha kha en kha a awm ta chuang lo em ni?

Pu LALSAWTA, MINISTER : Pu Speaker, khangho kha ka ko vek a, ka office-ah an lo kal a. An inthlahrung em em a, an inthlahrung turah ka ngai lova. Tihsuwal palh thil te, Mathematics teacher neih miao loh avang leh Mathematics compulsory a nih miao si avang te khan an tan an lo kawt vek te pawh kha a lo awm viau a. Tin, "kawt vek" han tih pawh hi pahnih lek an exam a, an lo fail hlauh kha chuanin "kawt vek" kha chu an ni ve mai a, 100% kha. Chutiang deuh hleka zirlai tlemte te awmna te pawh kha an ni ve mai a.

Tin, vawiinah hian sawi remchang tak chu "Change" hi a pawimawh a, "Change" hi pawisa kher hian a siam lova. Sikul tha kher pawh hian a siam lo tih hi kan pawm a. Chuvang chuan "Change" hi kan buaipui mek a ni. Continuous Comprehensive Evaluation kan tih "CCE" te pawh hi "Change" a ni a. Hei hi RTE, Right of Children to free and compulsory Education Act-ina a rawn ken a nih bakah hman hmanah pawh Dr. H. Thansanga, Minister a nih lai pawh a an lo intintuah tawh, training te pawh an lo in pek tawh hial thin, engemaw avanga an tih chhunzawm tak

loh te a ni a, thil tha tak a ni a. Chuvang chuan, kan “Change” hman tam taka hi Sikul tha zawk leh Naupang Uniform mawi zawk aim-ah hian sikul kal dan leh zir dan thar tha zawk, hlawk zawk, thiamhlenna, thiam nghehna lampang hi kan theihtawpin uar kan tum ve a. Chuvang chuan, CCE hi a tha hlein kan hria a. Tin, CCE hian kentel a nei a nu leh pa te’n a an buaipui/an ngaihven a nih avanga CCE lo awm chho a nihna lai hi a thui khawp mai a. Mizo hnamah hian, “Naupang leh uite pawnah kal r’u, in rimchhia” kan tih lai hian naupang hi enkawl diak diak a, tha taka chhawm chhuah an nih loh chuan an puitlin hunah chuan nu leh pa ti mangangtu tih hria in CCE-ah hian nu leh pa tam tak hian tun hma zawng aain an fate nen lehkha hi an zir ho tawh a ni.

Tin, he House zahawm takah hian “Change” pawimawh tak kan buatsaih hi min hriat sak ka duh a chu chu, Academician tam tak ten min buaipui, remtihpui vak lo mahse tha nia kan hriat a ni. Mathematics thiam loh avanga career chhe tak tak kan awm a, chuvang State Advisory Board of Education-ah te Department chhungah te sawiin kan thu tlukna ta chu “Mathematics hi a pawimawh a, tuma tih hniam chi a ni lo. Amaherawhchu thiam ve thei lo na na hi chuan heti taka phurrit a nih loh nan hian hetiang hian remruat ang”, kan ti a, pawl 10 an zirna turah hian Group “A” leh “B” mathematics awm se kan ti a, Group “A” hi chu pangngai nisela, Group “B” hi chu a pawimawh zual a kha an dah khawm ang a, zir nuam deuh ho kha, Group “A” khan pangngaiin a thiam ho leh cho ho kha, kha lamah khan an kal ang a, Group “B” erawh chu a fundamental zir tur khan kan buatsaih dawn a ni. Hei hi mi tam tak min tiluhaitu nia kan hriat avangin he kawng helna kan siam hi House pawh hian min amen pui ngei pawh kan ring a min hriatpui kan duh a. Mathematics thiam miah lo IAS fel tak tak, Central Civil Service fel tak tak an awm teuh tih kan hria a, chuvang chuan mi career ti chhe lo zawng a remruatna kan siam hi kan tih awm tak niin kan hria a. ICSE hnuaiyah te pawh hetiang hian an ti tho mai a (Pu Lalduhoma : khalai kha, ZNP-ah kan policy pakhat a ni ve a, kan sawi law law ang a science subject hi in telh ve dawn lawm ni) Hei science subject hi tunah hian ngaihtuah turin kan in ti mek a, amaherawhchu, Mizoram Standard hniam anga miin min hmuh te hi kan hlauh deuh hlek avangin a rual thuih thuih lo deuh te pawh hi ni se a tha ang a. Eng pawh nise Mathematics hi a hnawk lian a ni a, heta tang hian bul in tan teh ang kan ti a.

Tin, Pu Speaker, “Change” bawh han sawi tel leh ka duh a, Educationist ten a min ‘amen’ pui loh, mahse kawng danga mithiam tak tak ten a min ‘amen’ pui bawh si chu Hindi zir dan hi a ni. Hindi kan zir danah hian literature ang chi te kan zir a, Poems te kan zir a, thu har pui pui kan zir a. Vawina matric pass chin zawng zawng hian pawl riata an zir hi thiam selang chuan Hindi a biak theih loh leh Hindi ziaq thiam lo hi pakhatmah an awm lovang, mahselangin an pass a, an thiam chuang lova, chutiang ang hrim hrim a subject kan neiha hi Mizoram tan a tha dawn em ni? Hindi thiam ve kan duh si a, Hindi hi ngaihthlak leh tawng hi hmasa phawt teh se, ngaihthlak leh tawng atang hian bul tan ilangin. Chuti chuan ziaq te leh chhiar te hi a hnuah a lokal thei a lawm kan ti a. A chhan chu kan vai mistiri ho pawh hi A Aw B kan zirtir miah lo, grammar pawh kan zirtir miah lo. Mahse kan bulah kum khat te Mizoram a an awm chuan Mizo tawngin an biak theih a, lehkha thiamlo an nih lutuk avang zawk hian hma hi chu an sawn chak lo a ni chauh

a, mahse an rel theih miah loh. Chutiang khawp chuan Mizo tawng hi an hre ve a ni. Chung te kan ngaihtuah chuan Hindi tawng hi heti lo zawng hian, naupang tana tihbaiawm nilo zawng hian i zirtir teh ang khai, naupang tan te pawh awlthe hian zir se. Amaherawhchu, Devnagiri hawrawp erawh hi chu pawl nga, pawl ruk atang hi chuan zir chho tan ve sela. Tichuanin/ti hianin zawi zawi in kal se chu matric thleng hian chuanin kan thiam, kan zir, kan hlawkpui baw ang a, Mizo mipuite tan, Mizoram tan thain kan hria a. Tin, kan zir laibu hi English medium school-a mi phe chu a har em em a. Chuvang chuan, har tak hi a ngai emaw ni le? Har tak ngai lo hianin kan tana pawimawh chin hi zir ilangin a tha ber ang a, kan duh kan sawi theih a, mi sawi kan hriat baw hi chuan Hindi hi chu taw hrih mai rawh se ti tein kan sawi ve a ni.

Pu Lalthansanga, amah a awm lo baw a, sawi lo mai ilangin. Pu Nirupama ten thil pawimawh tak tak an rawn sawi a. Border area chungchangah hian zawhna pakhat pawh khan a lo chhuak a, Pu Speaker, a ramri pawnah hian school 30 chuang hret a lo awm tlat mai a. Ramri an hungna hi tlemin a chhing ve deuh baw a ni. Chuvang chuan, hengte pawh hi sak that leh ka tum mek a. Tin, Pu Thawla pawhin a rawn sawi a, pawimawh tak tak....(interruption)

Pu B. LALTHLENGLIANA : Pu Speaker, Member zahawm takin Border Fencing ramri anga ngai a, a sawi kha dikin ka hre lova. Kha kha chu fencing ...

Pu LALSAWTA, MINISTER : Border Fencing ramri anga ngaih theih a ka sawi kha, chutianga ka sawi palh chuan min ngaidam se. Amaherawhchu, kha kha chu fencing ani mai a, ramri ani lova, ramri kha chu ala pangngai reng a.

Pu B. LALTHLENGLIANA : Kha kha House a vote atan chuan a tha dawn em ni nakin hun lo kal zelah.

Pu LALSAWTA, MINISTER : Pu Speaker, ka sawisual palh a ni, ramri ka lo ti a nih chuan Border Fencing pawnah School 30 chuang kha a lo awm palh hlauh mai a.

SPEAKER : Chair atangin tlem kan sawi ve ang a, mahse tihian an hunga, KM 1 dan leh KM 2 danah te gate a awm a, heta an lo kha an va nei pha mangtlat lova ni. Chuvangin Bangladesh ho khan an seng khalh zel dawn a ni, zana an kalh baw si a, chumi laia chu a ni kan vei a hi, heti laiah Leilet an nei a, heti lai khua ami kha chhunah chuan an va feh thei a ni. Mahse tlaiah gate kha KM 1 danah a awm a, a seng alo hun khan Bangladesh in an seng khalh thei a ni, chuti laia chu a ni kan sawi hi – awle sawi zawm rawh le.

Pu LALSAWTA, MINISTER : Awle, ka lawm e, kan member zahawm tak takte 20 zet te khan an bial chhunga harsatna tam takte an rawn sawi a,

hei ka chhinchiah fai vek a, a tul ang ang chu kan enzui turah ka ngai a, kan tifel thei ngei ngei turah ka ngai a. Member zahawm tak Pu Duhoma khanin School Education Department leh Higher Education Department hianin 8% vel a tlin chauh ang a, a ti a. Kan chhut chhin a, Mizoramah hian a la hniam khawp mai a, mahse 11% vel chu a tling ve mai awm mange, CSS hi ala awm lova. Chulai te a chu kan sawitel duh nghal a, Pu Speaker general information atan pawh a tha ve hrim hrim a 1972 U.T. kan nih tirh khan Mizoram pumpui Budget kha nuai 1792 a ni. Nuai 1792 kha PWD tihte GAD tihte Agriculture tih zawng zawngte nen a hman tur kha a ni a, a hnu hei kum 40 zetah hian chuan a lo tam tawh khawp a kan Department School Education Department ringawt pawh hian U.T. tirh Mizoram pumpui budget let 25 zet kha kan lo nei reng tawh mai a.

Tin, Law & Judicial atangin kan tan ang a, School Education hi ka la sawi leh tho ang chu. Post 19 tih chung chang kha a Department lam pawhin kan helh khawp mai a, a tirah phei chuan 32 emaw lai kha an rawn tia. Law Department hrim hrim hi Judiiciary Separation a nih takah hian High Court hi a thu em em a, ti ila, engkim hi an tih ani mah tawh zawk a, keini Department lampang min rawn hriattir lemlo khan Post kha an lo Advertised tir vak mai a, Mizoram Public Service Commission-ah. Finance Department clearance pawh awm lo, DPR clearance pawh kha a awm lo, mahse kan zuk sawi leh a, mahse a sawt vak chuang lo va. Tunah hi chuan 19 hi chu an advertised ta a, hetia han dil takah chuan. Chuvang chuan, High Court lampang khuan an ta ngawih ngawih ni khuan an hria a, Department lampang han ngaihchan an tum vak lo hi a buaithlak lai tak mai pawh a ni a.

Tin, Gram Naya Yalayas kan tih mai, thingtlang lama Government Officer te khaw 12 vel laiah bul tan ila kan han tih kha, tuna kan han sawi ang deuh hlek khan a dan kha kan nei tawh a, Central Act a ni a, 2008 ami, keini khan Mizoram tan kan han siam ve a, mahse High Court bawk hian a Rules hi a lo siam veleh a ngai a, a pawisa pawh hi a liam/bo ang zawnga han sawi tepawh a awm a, chutianga liam/bo zawng tur chi a ni lova. Hei hi keimahni lampang, abik takin High Court lampang la inpeih chiah loh avang hian tunah hian kan la ti hleithei lova, khaw pakhat atan cheng nuai 18 hisapa tih a ni a. Heng hi Motor leina tur te, Officer rawihna turte leh a Office ve ang deuh hlek han buaipuina tur a ni a, a beitham viau nain thingtlang mi, Aizawl emaw, Lunglei emaw, Champhai emaw kal phalo te tana an door step-a justice/rorelna dik an hmuh theihna tur atana buatsaih a ni a. India ramah, Mizoram te phei zawng a ziaawm pawl tak kan ni phak a, India ram hmun tamtakah hi chuan an tangkai pui khawp kan ring a ni. Tin roreltute...

Pu C. RAMHLUNA : Pu Speaker, hemi post 21 chungchang thu kha han hriatchian deuh hlek kan va duh ve. A budget kha keimahni budget a ni a, kan hlawh pek tur kha a ni si a. Tin, Post kha keimahni siam tur bawk a ni dawn lawm ni? Khami a nih si laia High Court-ina Sorkar hriat loha post 21 an advertise tir ringawt mai kha Sorkar khanin kha kha chu a tang ve thei lawm ni? tih kha ka zawt duh a ni. A chhan chu, a budget kan control a ni a, an service scheme keimahni control ni lo mah se, a budget leh engkim keimahni control a nih si chuan, kha kha chu tan ve theihna chin chu a awm thei lawm ni kan ti a nih chu.

Pu LALSAWTA, MINISTER : Member zahawm tak Pu C. Ramhluna rawn sawi kha a dik a, keiniaw pawh chutiawng deuhhleka ngaihdan chu kan nei nain anmahni ta hi a ni chiawng em mai a, a mihring thleng hian. An service zawng zawngte engkim CCS, CCA kan tih ang zawng zawngte leh Conduct Rules thlengin anmahni enkawl vek a nih awang hianin an inti tatu ve turah pawh ka ngai a ni. Tin, keiniaw kan lo thu hian separation of judiciary a spirit a kha a nuai bo te pawh an hlau ve a niawng , chuwang chuan anni hi an pro-active baw si a. A tha pawhin kan hre ve thova. Amaherawhchu, keiniaw Finance te leh DP & AR tena kan hraitpui lo lutuka an lo tih khan chuan min tibuai ve thei khawp mai a. A chhan chu filling up of vacant posts tih ang chi ah te, eng eng emawah khanin keimahni kan sorkar telvena kha a awm deuh thin awangin, keini pawhin chu lai tak chu kan member zahawm tak rawn sawi ang khan ngaihdan chu kan nei nain a neitu an nihna hi an hre hlur ve a. Chuwang chuanin kan ngaichang lo thei lo a ni.

Roreltute chungchangah hianin Pu Speaker, Bible-ah hian mawi deuh maiin a lo inziak a, 'Rorelnaah thleibik in nei tur a ni lo, mite leh milian inang rengin inggaihtlak sak tur ani. Tumah in hlau tur a ni lo, roreltu chu Pathian ta a ni si a' tih hi Deuteronomy-ah hian a lo inziak a. Hetiang taka rorel thei tur hian tunah phei chuan Mizo deuhvek an ni mai a, kan MJS a awm ho hi. Chuwang chuan rorelna hi tha taka a awm theihna turin kan beisei a. Tin, kan va inrawlh loh hian an ti tha zawk baw ang tih kan ring baw a ni. Keiniaw chuan thisen zawmpuite an nih vang te emaw, tu tu te emaw ngaih pawimawh tur kan lo ngah thluah thei a. Chuwangin kan Judicial service zingah hming lang khawpa mi rinawm, tih corrupt theih loh khawpa hming lam chhuah tlak ve an awm te pawh hi a nuam kan ti a.

Tin, High Court New Secretariat a mi a muan chungchang pawh hi, he House hi kan hriattir a pawimawhin ka hria a. Keini lampang hi chu kan hmanhmawh khawp a. Pu Speaker, a theih phei chuanin hman hmanah khan rawn luah chho tawh se tih hi kan duh a, a hmun hi kan en ve sek a. Judge lam te pawhin an en sek a, Chief Justice te pawh hian an in thlak apiang hian, an in thlak zing viau va, an rawn en zel a, tha pawh an ti a. Amaherawhchu, a building sak danahte leh design-ahte hian an duh tui khawp a, tuna kan Hon'ble Chief Justice of Gauhati High Court hi mi taima em em mai, engkim amahin a tihfel thlap theih beisei tlat mi te a lo ni a, ani hian amah te in a han en a, chik taka tih hi a duh niin kan hria a, a zai kan ngai lo thei lova, ani hian tha taka kan neih theih na turin a pindan zawng zawng, khawngte toilet a awm ang, khawngte common room a awm ang, khawngte Court Room a awm ang tih zawng zawngte tih vek te an duh awangin tunah hian kan tum angin a kan chak thei lova, pawhi kan ti khawp mai a.

Tin, a bul lawkah sawn District Courts kan tih, khangho kha, sak turin kan buatsaih baw a, Aizawl DC Office bul a Law Department pawisa hmang a an lo sak tawh hi DC lam hian an nei ang a, DC lamin an pawisa neih ve thung hi sawta kan sak nan min pe ve thung dawn a. Hengte hi remruatna awm chho mek a ni a.

Tin, Pu Speaker, Law Department hian harsatna kan neih ve thin chu tunhma khan matching share-ah hian 50-50 a ni thin a, keinin State in 50, Central in 50, mahseng kan Chief Minister hi kan harsatna kan hrilh a, ani

hian lehkhah vawikhat an ziaak a, keinin kan bawhzui a, a tlang nghal zak mai a 2011-2012 atang hian chuan 90/10 kan ti ang chu, keinin ₹ 10 zel kan sennaah Central Sorkar-in ₹ 90 sengin kan CSS matching share ang chi ho hi kan nei thei tawh dawn a, hei pawh hi Law Department-ah chuan ti tha kan inti ve khawp a ni.

Tin, ka chhang seng lovang ka tih kha School Education chungchang bikah hian bul hi kan tan ve zel hian kan ngai a. Kan Sorkar hmasa leh keini ngei lo in chhonzawm chho zelah hian system thar te kan han la chho bawk a, chuvang chuan, “A hnawk deuh nuaih alawm maw le!” tih tur ang deuh zawng pawh hian miten an lo thlir a nih pawhin a awm hi kan ti thova, kan tum ang leh kan vision hi chu kan la thleng pha lo a ni tih kan pha miah lova. Kum 1894-a Missionary Mizoram a an rawn luh a January 11 a an lo thlen khan, khami kum la la ni 18-ah, April ni 1-ah sawlai thingpui huan tlang saw niin an hria a, chutah chuan sikul an din a, zirlai pahnih an nei a tih hi Prof. Siamkima lehkhahu ziaakah hian a awm tlat mai a ni. Chuvangin NIT a ni emaw kan School Education Department kan hmalakna tam tak a nih emawah hian a bu kan tan tirh lai hi chuan eng emaw hun chhung han baih vaih lai hun chhung hi chu a awm tur a ni tih hi kan pawm chu a ngai khawpin ka hria a. Chumi avanga inthlahdah chi erawh chu a ni hauh lova, inthlahdah chuang lovin tunah pawh hian CCE te kan ti a kawng dang dangin hma kan lakna, tuna kan ngaihtlak tak ang, Hindi chungchangah te, Mathematics chungchangah te, khang ang chiah pawh khan leh System thar te leh school sak chungchangah te, zirtirtu lak chungchangah te, heng zawng zawngah hian kan hmalakna hi eng emaw chenah chuan tunhma zawng a thil lo la awm lo thenkhat te a nih avangin a nih tur ang la ni pha lo eng emaw zat hi chu a awm a ni, tih hi he House hian min hriatpui ve a thain ka hria a. Tin, zirna hi he House zahawm tak chung a awm zawng zawng pawh hi a nihna takah chuan A AW B tak ngial pawh thiam lova lo piang vek kan ni a, kan zir thiam vek hi a nih avangin leh Mizoram kan thlir hian industrial state te hi kan ni dawn lova, thlawhtheihna lian pui pui te emaw lawng lian tak tak, vehicles lian tak tak te, khawl ropui tak tak te, T.V. leh refrigerators kan tih ang te thleng pawh hian keini ang hian chuan company lo awm tawh sa te compete tur hi chuan chance kan ngah lovin ka hria. Zirnaah erawh hi chuan tuma hnungah hian kan kal bikin kan hre lo a, “we are second to none” an tih ang deuh hlek hian Mizo te hian zirna te hi chu kan ti ve thei a ni. Hei hi kan rual u atang te, kan mi hlawhtling atang tea kan hriat vek avangin miin min lo sawisel thin mah se, an duh ang te tling thei lo mah se, theih tawpin kan ti ang. Mahse an sawiselna te, an thurawn te chu kan thiam ang angin kan la a nga, hman tangkai zel pawh kan tum ang tih hi kan sawi dan a ni a.

Tin, tuna Deficit School kan tih ang te pawh hi a dan ang takah hi chuan the Mizoram Aided Schools (Recurring and Non-recurring Grants-in-aid Rules, 1990) a ni a, hengah hian Deficit School tih pawh hi a awm chuang lova, vawi khat hi ‘deficit grant’ tih hi a lo awm ve a, heng te avang hian dan hi chu siam that chu a tul mang e, kan duh ang tak, anmahni duhdan te pawh ni bawk, inrawn zaua Kohhran lam te, mithiam lam te pawh, party ang te pawh in, party hrang hrangte pawh inrawn ila a that dawn hi tih pawh kan ngaihtuah a. Tunah tak hi chuan kan tum ang hi an hriatthiam loh em avangin Chief Minister hova ama Office- a an aiawh te nena kan in hmuh a kan lo remtih tawh angin kan han chawlhlan lai lawk rih a. Pu Duhoma ngaihdan lo kha a ni mai thei a, thil tha tak pawh kha a hrethiam tura ten an hriatthiam

loh tlat kha chuan kan la kal pui hlei thei lova, kal pui lo turah min ngai deuh tlat mai a.

Pu LALDUHOMA : Nichinah khan kan hre thiam tan chauh a in sawi har em a lawm! nimirah te khan sawi daih tawh tur a ni a, group ‘A’ ina adhoc basis-a kal te a huam dawn kha chuan hlauh thawn tur a awm lova, Group ‘B’ kha chu tuna lump sum ho pawh hi lo ni ta se an chhe chuang lo, kha kha in up rei em alawm le!

Pu LALSAWTA, MINISTER : Engpawh nise Karnataka-ah engtin nge an tih, Kerela-ah engtin nge an tih, Meghalaya-ah engtin nge an tih tihte zirin kan intir ve mek a, hei hi chu kan ram tan na na chuan kan thluakte pawh kan la vawm khawmin thil tha zawk tur hi kan la ti chho zel turah kan ngai a.

Tin, School Education hnuai ami tho, SCERT te pawh hi Pu Speaker, kan hriat tha in ka hria a. An ni hi education lamah chuan kan thluak bawm, kan mithiam khung khawmna te an ni a, State Council of Educational Research and Training tih an ni a, anni hi kan thluak bawm tak tak te an ni a, tunah hian anmahni hi academic authority-ah te pawh Right of Children to free and compulsory Education Act-in a a phut angin kan han puang chhova hma an la a, kan Department hi neitu hi kan tam, tin, a chim china hi an tam bawk a, sawisel tur te pawh an tam a, an sawisel pawh hi an tih ve tur tak te pawh a ni. Khawtinah sikul kan nei a, hmun thenkhatah phei chuan pakhat mai nei lovin phnih/pathum te kan nei a, a thenah phei chuan College thlenga kan neihna te pawh a awm a, heng karah hian kan officer te hian an theihtawp tak meuh an chhuahin ka hria, SCERT lam a ni emaw, Mizoram Board of School Education (MBSE) an ni emaw, Directorate an ni emaw, Higher lam pang an ni emaw heng zawng zawng a thawkte hi an thawk hah em em a, engemaw chang hi chuan pawn lam atang hian a pawr hlek hi kan sawi hma lutuk em, kan sawi uar lutuk em, a thawkte tan pawh a hnual hnawk na tur hian kan ti ve deuh emaw chu aw! tih chang hi ka nei a, mahse kan officer te hi an tuar a fei a, dawhthei takin kan tih ngai hian kan ti ngar ngar anga, “Kan ram tan alawm mawle kan tih le, miin min hriatthiam loh deuh te pawhin eiruk lampang chungchangah pawh min la puh loh hi, a system velah a nih hi kan la buai ni” tiin heng te zawng nia kan hriat chu kan kal zel ang chu kan han ti ve ngat ngat a. Chung chu House hian min hriatpui tha kan ti a.

Tin, RMSA leh SSA zirtirtu leh hnathawk dangte lak chungchanga Verification Committee Report a chanchinbu lamah te pawh kan lo hmu a, “44 lai mai qualify lo an la” tih kha hetia han ngaih mai chuan a nasa khawp mai a, an qualify miau loh khan chuan a tul angin sorkar in hma a lak a tul anga. Amaherawhchu a file hi ka hnen a la rawn thleng lo hrim hrim a. Physical Education Teacher tih te, Health and Physical Teacher tih te, khang ang chi hova kha a qualification kha kan lo duhtui ve viau ringawt a. A hun kha a hmanhmawhthlak bawk si nen hnawhsarum takin 31st March hma ngeia kan appoint hman loh chuan kan chan mai ang tih hlauhna nen PAB ina a approval lo tlai bawk si nen.

Khang karah khan hnawhsarum taka kan han tih khan qualification kan lo dah sang a. khangah te khan Nurse training zo tawh te kan lo duh a. Nurse training zo tawhte khan an thawk duh awzawng mai si lova. A dil an awm loh avang khan a dil ve awmchhun ang ang kha kan lo la a lo ni a. Chuvang chuan a diklo na na na

erawh chu kan Chief Minister-in a sawi fo thin angin ‘Diklo hi kan sorkar in kan pai thei lo, kan thuah fai zel ang’ a tih angin a diklo na na na chu kan siam dik anga, hei hi House-ah pawh ka hriattir duh a ni. A theih anga rang in tih pawh kan tum ang.

Tin, SCERT hnuaia DIET kan tih te, DRC kan tih te, DIET kan tih te heng te hlawh lak chungchanga harsatna kan tih fo a hi a hrehawm kan ti khawp mai a. CSS a hlawh la te an nih hlawm avang te hian CSS te hi kan lo thlahlel ve a. Chuvang chuan a tira an sanction pek, sanction post heti zat hi an tih ang kha kan lo in appoint zung zung a. Anni lam khan, “Heti zat zawk hi a ni”, an rawn tih khan a lehkha kan hmu mai lo pawh a ni mai thei, sorkar hmasa lam hun te pawh a ni ang. Chungah chuan kan kal ngai rengin kan kal takah khan anni khanin an rawn tih tlem mil khan sanction an rawn pe ta si a, keini lamah hanin ban then ve leh hleihtheih lohvin an lo nghet ve chuat tawh hlawm bawk sia, chuvang chuan indaih lo reng reng in kan awm a, kan officer tha tak tak te luhaiin kan siam a, kan rorel thiam loh vang te han ti dawn ila, i vei lama mite pawh kha an tel ve na lai te pawh a lo awm ve tho tho a. Engpawhnise helai hi a pawh kan ti a. Tunah hian chuan a damdawi nia kan hriat ber tak chu Pu Speaker, Telescope Diets kan tih te heng ang hi diet pangngai an nih hian an hna hi an thawk zau thei zawk lehngal a, chuvang chuan Diet pangngaia upgrade vek tur hian 6 kan neih district 6 a 6 kan neih, Aizawl leh Lunglei tih loh, henga kan neih te hi upgrade vek turin ti ila, kan ngaithla viau a, in ngaipawimawh pawh niin kan hria a. Hetiang hi a lo nih chuan an service chungchanga inhniam hleih deuh/insan hleih nia min thlir reng te pawh hi a fel theih tawh kan ring. Tin, an hlawh lak loh chungchanga harsatna kan neih deuh reng mai te pawh hi a reh tawh ka ring a ni.

Tin, Parliamentary Affairs Department chungchangah hian Youth Parliament kan ti a, Mock Parliament te pawh an ti bawk a. Zirlai ten High School atangin Higher Secondary te leh College thlengin zirlai, house proceeding an zir ve a. Speaker lem te an han nei ve a, khatianga an han zir hian naupangah hian rilru lam leh elocution kan tih, tawng chungchanga inzirna tha tak a ni a. Hei hi India ramah an uar a, hemi chungchang ringawt zuk ngaihtuah hian Parliamentary Secretary zahawm tak, Pu Chawngtinthanga pawh nikum lam khan a zuk zina, a hma khanin Pu Piana te nen pawh Chandigargh-ah te kan zuk kal ve a ni a. He thil hi naupang te tan lehkhabu text bu ngawr ngawr nilo, an mental te leh an phychological thleng pawha development tha tak niin kan hria a. Youth Parliament hi Mizoramah pawh hian an ti ve zauh zauh a, kan hlawkpui khawpin kan hria a.

Tin, kan hriat theuh angin Mizorama kan lo neih thin, District Council, Pawi-Lakher Regional Council kan tih thin a kan member te a la dam dam te, an pension tih punna leh an lo boral tawh a nih chuan an chhungte tana family pension han tih pun hlekna kha kan buatsaiha, kha a ni a. Hei hi tuna a pun hma a anlo hlawh lak mek te nen khanin an chan chin i ti mai ang, tu tu te nge maw lo la dam le, tu tu te nge lo thi tawh tih hriat theihna na turin kan buatsaiha, tun session chung hian (naktukah emaw a tuk lehah emaw) House-ah in dawhkanah kan lo dah anga, min lo ensakin information atan tha in kan hria a. Kan ram sul lo su hmasa tute an lo ni a, a dam pawh an tlem tawh viau a, chu chu hetah hian kan sawi duh nghal bawk a.

Tin, Higher and Technical Education Department chungchang hi Mizoram Scholarship Board hi Cabinet-in rem a ti a. Kan pass tawh a, mahse kan lo tum dan leh sorkar tum danah pawh Department hrang hrangin an scholarship leh

stipend an neih ang ang te an rawn chung khawm ang a, chu chuan hetah hian mawhphurhna neiin kan thawk ang chu kan tih lai hian an rawn chungkhawm ta lo va. Amaherawhchu, hei hi chu keimahni sorkar chhunga thiltih mai theih a ni a. Remchang takin kan la tih theih kan la beisei a. Tin, proposal te pawh kan han nei ve a. ₹ 983 lakhs hi 2011-1012-ah te hi chuan min pe ve thei dawn lawm ni kan han tih hi min pe tam vak ta lova. Mahse sum harsat vangte pawh a niah kan ngai a.

Tin, NIT chungchang hi he Session hi a luah hle mai a. Kan hriat tha a ka hriat chu, NIT hi an lo nei fur tawh a. Chutichuan a nei ho pawh hian an khawpuiah pawh hian an lo dah duh vak mang lo a, West Bengal-ah te pawh khuan Kolkota-ah an dah miah lo a, Durgapur-ah an dah a. Keini pawh hian Aizawl hnaia dah lova Thenzawl-ah emaw Lawngtlaiyah emaw lo dah pawh hi thil sual vak a ni lo a. Kan ram tan pawh hian a that hrim hrim ka ring a. Nichinah member zahawm tak, Pu Joseph Lalhimpuia khan a rawn sawi tawh a. Chutiang chuan Maharastra te pawhin Bombay-ah an dah lo a, Nagpur-ah an dah a, hei keini phei chuan mentor atan kan hmang nghe nghe a. Andhra Pradesh te pawhin Hyderabad lamah an dah lova, Warrangal-ah an dah daih a. Gujarat te pawhin Amedabad a dah awm taka kan ngaih kha Surat ah an dah daih bawk a. Assam te pawhin kei nina Bible a Nazareth an tih ang deuhin, Silchar angah khuanin an dah daih mai a. NIT tha pawl tak a ni an ti lehngal a. Chuvang chuan a hmunhma chungchangah hian Aizawl ringawt mai kan rilrua a lian lutuk hi Mizoram pum pui ngaihtuah thin tan chuan a thalo mange aw kan ti a.

Tin, Higher and Technical Education Department han sawi hian chuan Mizo ngei mai, Mizoram University-ah V/C kan han nei ta hi Prof.Thantluanga hian hman deuhlawk khan a rawn join a, hei Mizoramah rei a la awm lo a, hna a thawk tan nghala, Mizo te tan, hei hi chawimawina ropui tak niin ka hria a.

Tin, tun tuma MBSE, Mizoram Board of School Education leh zirlai 20 vel lungawi lo chungchanga kan exam dan chungchang hi he House hian hriat ve hrim hrim thain ka hria a. Tun hma chuan objective questioning leh objective replying/answering a ni chung hian tun tum atang khan Negative marking kan ti ta a. Entirna ang chauhin, Pu Speaker, han sawi ta ila, mi pakhat chuan mark 100 pu ah 91 a chhang a, 30 kha chu a dik chiang bal a ni tih a thiante nena an ti ti na atang pawhin a hrethei a, a dik nia hriat 61 kha, a thai a kha, dik teuh deuh pawh nise a dik a nih loh chuan, a diklo a ni mai si a, chuvang chuan 61 atang khan 25 % zel mark an han paih tak khan, 4 khanin mark 1 a hen ta si a, khatiang a nih khan mark 14 awrh kha a hmu ta maia, amah ngaihah chuan, “Chiang balin mark 30 ka hmu a, a bak 61 ah khan a tlem berah pawh mark 30 chu hmu ila, mark 60 chu ka hmu hrim hrim” a tih lai khan, negative marking system-ah khan chuan mark 14 awrh chauh kha a hmu tlat a ni.Hemi an hriatthiam loh avang hian rawn sawisel hi an awm nuala, chuvangin thil thar a nih avang hian hrethiam lo tawk te pawh an awm a lo ni thei a, tin, kan member zahawm tak Dr.Thangliana kha alo chhuak ta a, a rawn sawia kha thahnemngaih vangah ka ngai a, a lawmawma, SSA chungchangte, RMSA chungchangte. Amaherawhchu SSA chungchang te bikah pawh hian hemi a infrastructure kan tih ang chi, a sikul lam leh a hetiang pawimawh lam hi an lo kalsan deuh duak tawh a, tunah hian tharthawh hi a har tawh khawp mai a. A hunlai 2001, 2002, 2003, 2004 ang chho vel khan a ti tura hi chuan an lo tih deuh vek avang khan keini tan hian zuk kheuh hawn leh hleihtheih a ni lo a, National level a scheme kalte a nih thin avang hian, tuna

thahnem han ngaih leh hnuhnawh pawh hian school building chungchangah te pawh hian harsatna tam tak kan nei a.

Tin, UGC Norms chungchang leh Principal te, Director nghet lo chungchang te kha Mizoram hian a tuar rei tawh a. Hman atanga a tawrh tawh a ni a. Hei, keini hian kum 2 leh a chanve aia tha hret kan han tuar chho a. Siamthat kan tum a, Pu Speaker, kan siam tha thei ngeiin kan hria a. Substantive a Director, Joint Director, Deputy Director te kan neihna tur bakah Principal te pawh, dan ang, kan han siam tur ang thlap a, Principal zahawm, Principal zah tlak ni thei tura danin a ruat nghet tur zawnga buatsaihna hi tunah hian kan siam mek a. Tin, Semester System chungchangah hian hei hi sawi ka duh a, thil tha tak a ni. A that rual rual hian hautakna chen a awm lo thei lova. Naupang ten 75% tal attendance an neih a ngaih si avangin classroom-ah an thut hi a lo ngai ta hle mai a. Chuvangin kum danga tam tak an admit theih lai ang chi ai khan tun kum atang hian chuan class-a thu thei tur tawk mil anga admission te lo neih a ngaih avangin admission hi kan ti hlei thei ta lova. Amaherawhchu, chutih rual chuan Aizawlah an lut thei kher lo a nih pawhin Hnahthialah te, Mamitah te, Kolasibah te, Champhaiah te College tha tak tak kan nei a. Saitual, hnaiteah te pawh kan la nei a. Hengah te pawh hian hmun a awm vek e, an subject duhzawng tak te pawh a awm ang, kan ti a, kan zuar reng a. Heng hi tuna Semester system in a ken a ni a. Zirtirtu an hah bawk a, CCE kan tih ang, CCE nena inang tak, College level a ni ve thung a ni.

Tin, Chhingchhipa Sainik School chung chang kha an rawn sawi nual hlawm a. Hei hi hma kan la mek a. Keini chuan Sikul tha tak kan nei dawn a. State dang, kan thenawm hnai te pawhin an la rawn chhim tlak turah kan ngai a. Amaherawhchu, kan tum ang hian a chak lova. Hindustan Pre-fab an tih hianin tunah a buaipui chho mek a. Tun atanga rei vak lo hian a bul te pawh tan theih kan inring a.

Tin, Polytechnics chungchang te pawh, hma kan la chho ve mek zel a. Thil harsa thin chu kan Department a tawp vek lem lo te hi a lo nih hian Department dang te kan han tur ve thin a. Mahse, kan hmanhmawh ang hian an hmanhmawh loh chang te a lo awm a. Chuvang chuan kan tum ang zung zung hi a ni thei thin lova. Tin, hmeichhia, pawl 9, pawl 10 an lo ni a, Incentive to girl child, an tih ang chi kha kan buatsaihna a rei tawh a. Amaherawhchu, State Bank of India hian min han buaipui a. Mahse, a profit i ti mai ang, a commission kha an lo duh a, commission tur scheme kha a lo ni si lova. Commission tel scheme kha a lo nih si loh avang khan tunah hian bank dang kan zawng leh a. Chuvang chuan, enge ni kan an dawn? Keimahni lamah chuan Central lampang chuan khami an hming kan pek ho kha an buatsaih sak vek tawh a. A banking laiah te hian kan la harsat a. Mizorama kan bank neih ang te hian an ti ve thei em kan hre lova. Ti ve thei se chu tlawmngai pawhin an tih theih kan beisei a ni.

A Scheme-a hi Pu Speaker, a awmdan chu, a tuma chu, hmeichhiaian Pawl 10 hi pass rawh se, hmeichhe zirlai hian Pawl 10 hi pass rawh se. Pasal nei lovin Pawl 10 hi pass hram rawh se tih a nih rual hian pasal neih hma venna tur atana thiam taka Central sorkarin a rawn buatsaih a ni. Tin, examination sang zawk Union Public Service Commission tea mi hlawhtlingte puihna chungchangah khan hetiang hian Preliminary-a hlawhtling hi cheng sangnga kan pe a. A Mains-a hlawhtling hi cheng singkhat kan pe a. Tin, khang zinga mi Coaching-ah an lo kal a nih chuan coaching-ah sum tam tak te an lo sen theih avangin cheng singhni pek turin kan ti thei bawk a.

Nikum chhung khan mi 15 hnenah hetiang tanpuina hi sorkarin kan pe thei a. Kuminah pawh hian engemaw zat chu, Pu Speaker, kan pek leh theih ka beisei a.

Dawhthei takin min ngaithla a. Amaherawhchu, Member zawng zawngte in point rawn sawi ka chhan kim theih loh avangin min hriatthiam ka ngen a. A tul tak leh House kan la Session zel dawn thova, chungah te pawh chuan kan inhrilhfiah theih dan dan a la awm ang chu. Ka lawm e.

SPEAKER : Pass han dil nghal rawh le.

Pu LALSAWTA, MINISTER : Pu Speaker, ka Department chanah hian Law and Judicial Department-ah hian 'Charged on the Consolidated Fund of Mizoram' a awm a, chu chu High Court Judge-ho hlawh tur leh chumi chungchanga senso chu a ni a. Chumi tel lo chuan he House-ina a vote ngai chung chu a awm a, min pass sak turin heng hi I phalna leh House remtihna in ka rawn dil e.

- 1) Law & Judicial Department kum 2011-2012 a hman tur ₹ 13,31,94,000/-.
- 2) Demand No. 12 - Parliamentary Affairs Department kum 2011-2012 a hman tur ₹ 46,23,000/-
- 3) Demand No. 20 - School Education ₹ 456,54,73,000.
- 4) Demand No. 21 - Higher & Technical Education ₹ 64,61,32,000/-

A zavaiin ₹ 534,94,22,000/- hei hi he House zahawm tak hian min pass pui turin ka rawn ngen e.

SPEAKER : Awle, Minister Pu Lalsawta'n a department chan te wind-up a pass a rawn dil bawk a kan buk mai anga - Demand No. 4 Law & Judicial ₹ 13,31,94,000; Demand No. 12 Parliamentary Affairs ₹ 46,23,000; Demand No. 20 School Education ₹ 456,54,73,000; Demand No. 21 Higher & Technical Education ₹ 64,61,32,000/- a vain ₹ 534,94,22,000/- hi remti apiangin remti ti rawh ule (Remti), remti lo kan awm chuan remti lo ti ru le, awm lo maw.

Awle, Pu Lalsawta Minister zahawmtak Demand No. 4 Law & Judicial ₹ 13,31,94,000/-, Demand No. 12 Parliamentary Affairs ₹ 46,23,000/-, Demand No. 20 School Education ₹ 456,54,73,000/-, Demand No. 21 Higher & Technical Education ₹ 64,61,32,000/- A vaiin ₹ 534,94,22,000/- chu House-in lungual takin a pass ta a ni.

Pu LALSAWTA, MINISTER : Pu Speaker, ka lawm e.

SPEAKER : Tunah chuan Pu Lalrinliana Sailo, Minister zahawm takin a Department chante Member ten an ngaih pawimawh an rawn sawite chhangin rawn wind-up selangin, tin, pass rawn dil bawk sela.

Pu LALRINLIANA SAILO, MINISTER : Pu Speaker ka lawm e. Ka Department chan ve te thahnemngai takin Member ten min sawipui a, a lawmawm ka ti a. Labour & Employment hi mi 7-in an sawi a, Trade & Commerce hi mi 8-in an sawi a, Health hi Member zahawm tak 17 in an sawi a. Thahnemngai taka an sawi avangin lawmthu ka sawi hmasa a ni.

Pu Speaker, Member tena thahnemngai taka an sawi hi kan lo ziakin kan chhinchhiah a. A mal te tein ka react vek lovang a, tin, kan Officer ten an lo ziakin an lo chhinchhiah bawkin ka ring a. Tin, nakinah han hriathiamloh emaw han bawhzui tur anga pawh kha Member te rawn inthlahrung lo se ka duh a.

Labour & Employment Department No.28-na hi Member zahawm tak Pu Lalthansanga te, Pu Nirupam Chakma te, Pu John Siamkunga, Pu H. Zothangliana, Pu Chawngtinthanga, Pu R.L. Pianmawia leh Dr. R. Lalthangliana ten an sawi a. A lawmawm ka ti khawp mai a. Tihian tawi te tein kan hlawm dawn ang a. Hemi budget tlahniam anga han lang a kha a nihna lai chu a awm a. Amaherawhchu, nikum lamah pawh khan a ni tho mai a, a tam lo hrim hrim thin a. Chutih rual chuan Youth Commission kha tih hmaih a lo ni a, kan thiamloh te pawh a ni ang a. Tin, Chawngte leh Lawngtlaiah hian IDI emaw hi han kalpui kan duh viau na in, saw lamah sawn special fund hi an nei a. Chu chuan tih theih dan kha ala awmin kan hria a. Tin, a ri te pawh kan lo hriat avangin kan lo chawl haadam deuh hlek a. Tin, Lawngtlai a mi phei hi chu dan leh eng emaw fumfe lo deuh hlek a mumal lo deuh hlek a lo din kha alo ni a. Chuvang chuan hei hi la enthat zui tur a ni tih kha kan sawi duh a. Tin, hei kan vai maia kan ngaih pawimawh em em mai (Interruption)

*Speech not corrected

Dr. R. LALTHANGLIANA : Khawngaihin i din lai khan. Youth Commission a kha a tello i ti em ni tun budget-ah khan?

Pu LALRINLIANA SAILO, MINISTER : Youth Commission atana budget kha lo hmaih a ni a. Mahse tunah chuan a awm chho leh dawn e. Ka rawn sawi leh dawn a. Hei Labour Force tih that hi kan Member zahawm tak te hian an ngai pawimawh vek a, a lawmawm hle in ka hria a. Kan House Leader zahawm tak hian Mizoram a hnamdangte inhlawhfa tam lutuk a ngaih pawimawh thu a sawi thin a. Hei hi thudik tak leh wawiina kan ram than chhoh zelna tura thil pawimawh anih avangin kan ngaih pawimawh tlan a hi a pawimawh kan ti hle mai a. Chuvangin Labour Force tih changtlun a ngai kan ti a. Tunlai hian kan sorkar hianin hna te a ngah em em mai a Department hrang hrangin, in sa tur te pawh hian Mistiri vai te pawh hi an hmu zo lo ve an ti a ni. Chutiang khawp chuan Labour Force hi kan tla chhia i ti mai ang. Hei hi kan inzirtir nasat tur leh tan kan lakna tur pawimawh tak a nih thu kan sawi duh a.

Tin, Youth Commission chungchang kha Member zahawm tak Dr.Thangtea khan a rawn sawi a. Hei Labour & employment Central lam khu kan ngen thiam chuan hmasawna tam tak a awm thei dawn a, chuingin labour force tih changtlunna pawimawh tak mai chu Youth Commission atang ngawt ni lovin Skill development initiative P.M. Chairman-na hnuai mi hi a pawimawh a, kan zu ngen thiam chuan kawng tam takah hma kan sawn dawn a ni. Pu Speaker, 2022-ah hianin Central khuan million 500 maktaduai 500 skill level chher chhuah a tum dawn a ni. Kum 2012 hma hian maktaduai 15 hi work force tha din chhoh hi a tum dawn a, chumi atan chuan PM kha chairman niin, member te Human development Resources a mi te Finance te, Rural Development te, Labour Employment Minister te an ni a, Planning te, Natural Manufacturing a mi te, National Skill Development a Chairperson te kha member an ni a. Tin, mithiam bik 6 kha member an ni bawka chung chuan an hruai dawn a ni a. Chumi hnuai chuan co-ordination board a lo awm leh a, Planning Board Deputy Chairman hi Chairman a ni a, chutiang chuan nichina kan sawi tak Department hrang hrang a Secretary te kha member an ni nghal a, tin, Principal Secretary Planning Commission khu Member Secretary a ni nghal a chumi hnuai sum leh pai leh khami programme hrang hrang kha zu hne turin Labour & Employment bakah hianin MYC (Mizo Youth Commission) te an pawimawh dawn a, chumi tur chuan Pu Speaker, sorkar hmasa in a, inthlan dawn October thlaa Youth Commission a lo dina kha han thiah chi pawh a ni lo va, a lo kal laia kha han chhawm loh theih chi pawh a ni lo va. Tin, chhawm lo ta ila sawisel te pawh kan ngah viau awm e. Chutiang ang chuan Chairman-ah pawh MLA ni lai Union Public Service Commission lo kaltlang tawh, tin, Mizoram Public Service Commission lo paltlang tawh MLA zahawm tak Pu Hmingdailova Khiantge Chairman a ni a, Hmingdailova Khiantge IPS kha a ni a, chumi ho chuan tunah hian chak takin an kal a. Tichuan tunah hian hemi foreign te, foreign mai ni lo India ram te pawh a ni phawt ang a, chuta hmalak chhohna turin tunah hian kan Youth Commission Secretary kha Hyderabad a hmun nei, hemi E-learning technology network or platform an ti bawka, chumi chu zawm turin a zuk kal dawn bawka a ni. Tin, kan sawi tawh angin Pu Speaker, a tirah hei hi Sports & Youth Services a bet a ni a, amaherawhchu, hemi sports atanga a scope awm chho hi a tlem deuh hleka a lan avang khan kan sawi tawh angin Higher Authority a kan hotuten Labour & Employment-ah hian bet se an ti a. Amaherawhchu kan Chairman-in vanduaithlak takin zai te an tawka a, a taksaah harsatna te an han nei a, duh angin an kal chak vur vur thei lova, tunah chuan Pathian zarah a hriselna te a tha tawh bawka a, hei hian chak takin hma kan sawn chhoh kan beisei a ni, tih thu kan sawi duh lawka a.

Vawiinah hian Pu Speaker, hemi kan performance emaw kan achievement emaw hi sawi vak turah kan ngai lova, ka sawi ang khan hemi Workmen Compensation a Labour Force siamthatna tur an han sawi lannaah a Commissioner tur te pawh kha khatiang ang khan duan chhuah vek tawh a ni tih kha kan sawi duh a. An sawi ang khan khatiang ang a skill development initiative kan zu ngen fuh chuan Labour Force tha tak kan neih a ngai dawn a ni. Chu lo leha chuan Pu Speaker, kan hma chhawp ve pakhat leh chu, (amaherawhchu kan Chief Minister hova decision siamtur a nihna lai ala awm a) ESC kan ti a, hemi Employees State Corporation kan tih hi, hei hi Labour and Employment, Central hnuai a bet a ni a, mi a nghetlo a hnathawk reng reng ₹ 15000/-

la phalo te tana malsawmna lo thleng ve thei tur, an dammawh hritlana an inenkawl ve theihna tura ruahmanna a ni a. Hemi scheme-in a han huamtheih turah chuan Dawr hrang hrang amite Chanchinbu Establishment-a mi te, Cinema leh Theaters-a mi te, Hotel leh Restaurant-a mi te, Road Transport Establishment-a mi te hengte hi Sumo kan tihte pawh an tel turah kan ngai a. Tin Private School a thawk te, Nursing Homes a thawk te, hemi Diagnostic Centre a thawk te, Private Hospital a ni emaw Laboratory a ni emaw hengte leh kan han rinluh theih tum danah chuan, anmahni khulamin min hrilhnaah chuan hemi Muster Roll a thawkte pawh hi theih tura min hrilh a ni a. A awmzia takah chuan a hlawh petu ti mai ila, a ruaitu khan za zelah ₹ 4.75 a tum ang a, tichuan a hnathawktu a khanin ₹ 1.75 a lo tum ve leh ang a, chumi chu premium a lo ni chho ang a. Chu chuan an natna, engnatna pawh tawh sengin a chung lamah limit awm lovin, enganga pawisa tam pawh vanduai thilthu-ah lo awm ta se kha kha an claim ve thei dawn a ni tih kha tunah hian kan han chhawpchuak chho mek dawn a ni a. Hei hi erawh chu kan C.M. hote leh kan Cabinet-te pawh a ngai mai thei a. Amaherawhchu State dangah te pawh an lo kal tawh nual mai a, India hmarchhakah te pawh hian, chungang chu tunah hianin Labour Employment leh Health Department-in tangkawp a tih theihdan tur awm turah kan han ngai a. Chungte chu kan Sorkarin mirethei te hawiin tih leh miretheite VIP tih kha a lang dawnin kan hria a, chu chu kan hmalak chhohna a ni. Labour Employment-ah achievement tam tak kan nei a, chung erawh chu han sawi vek lo ta ila, kan kal mai ang a, hei in han sawi kha kan lo chhinchhiah diat diat a nia.

*Speech not corrected

Pu LALDUHOMA : Pu Speaker, nichinah khan kan Minister zahawmtak hian he Demand-ah hian Youth Commission hmaih a ni a rawn ti niin kan hria a, ‘engatinge’ tih kha kan zawt a, ‘ka rawn sawifiah dawn a lawm a ti a’, a rawn sawifiah ta a. Kan chiang chuang reng reng lo, hmaih a ni tluanchhuak ta nge hetah hian kan Pass tel dawn tih kha kan chiang thei chuang reng reng lo mai, “Tabithi” hming awmzia chu Dorki a ni tih ang leka chiang lo a ni.

Pu LALRINLIANA SAILO, MINISTER : Youth Commission pawisa cheng nuai 50 dah thin kha dah loh a ni a, a lo tel lova. Amaherawhchu, telh leh tura sawi rem a ni a, chu chu ka’n sawina mai a ni.

Dr. R. LALTHANGLIANA : Mahse Pu Speaker, khalai kha kan budget a pass loh khan a awm a, enge ni khatianga a tel loh chhan te pawh kha chiang deuha min hrilh a va tha ve mawle.

Pu LALRINLIANA SAILO, MINISTER : Pu Speaker, a dik e, khalai kha chu lo chhut hmaih emaw a nih ka ring a. Chuvangin, nichin khan an rawn sawi dawn emaw ka tia. Nia, vote on account-ah khan a tel ang a, tuna a body puiah khan a tel lo a ni, a awmzia chu. Chulai chu kan sawifiahna mai a nia. Hemi a body puiah a lo telloh avang khan kha kha zep thu a awm lova, thudik tak sawi hi a tha mai a, Directorate lam atanga lo tihsual palh te pawh a ni ang e.

Dr. R. LALTHANGLIANA : Pu Speaker, kan lo hlauhthawn zawk chu kan lo hriat dan chuan a department lampang khan nge ni Planning lampang a lut lo hrim hrim a, Planning lampang pawhin an khak e tih ang chi te kha kan lo hria a. Kan hre dik lo maithei bawk a, kha kha vote on account a tel tihlai pawh kha a chiah em aw tih kha hriat chian chu a tha khawp mai.

Pu LALRINLIANA SAILO, MINISTER : Pu Speaker, a chiang e. Department....

Dr. R. LALTHANGLIANA : Mahse kha kha chu thla 4 chauh a ni a, vote on account kha. Tuna kan budget hi chu nakum March ni 31 thleng tur ang kha a lo ni ta a, engtingge a kal zel dawn tih kha ngaihtuahawm tak a ni.

Pu B. LALTHLENGLIANA : Pu Speaker, Youth Commission hi i chhonzawm tawh lovang, tihna ang deuhah kei chuan ka ngai a. Budget-a dah ve miah loh kha, dah ve bawk siloh chuan khawi pawisa nge an hman ngawt ang tih lai kha sawifiah chu a va ngai ve.

SPEAKER : Demand No. 38 na phok 275-ah hi chuan chiang takin a inziak a. Tin, a belhna-ah pawh hianin a tel thovin a lang a, chuang chuan hetilai hi Minister khan a tel lo a ti naa kan Demand buah hi chuan a tel tlat mai a ni.

Pu LALRINLIANA SAILO, MINISTER : Pu Speaker, a tir khan a tel lo a ni nuaih reng a, kha kha kan buaina kha a ni a, ka inmahpuph a, Director pawhin 'Kan thiam loh a ni e,' a rawn ti a. Chu chu hemi awmzia takah chuan.

Pu LALDUHOMA : Pu Speaker, chutia a tel tho chuanin, kan Minister zahawm tak thinsungah hian a tello a ni ber mai awm mang e.

Pu LALRINLIANA SAILO, MINISTER : Pu Speaker, ni e, thu diktak sawi a ni a, sawi hun a ni a, a tirah khan a lo lang lova, hei hi engtizia nge kan inti ta a, kan thun leh hman ang em kan inti a, kan innawr ta a. Tichuan a lokal danah khan kha kha a ni. A awmziaah chuan Demand for Grant-ah te kan telh dawn em a hriat em aw tih kha kan inthen dan ta kha a ni a. Chuvangin khalai kha chu a dinhmun diktak chu kha kha a ni.

Pu Speaker, Demand 24 naah hianin mi 17 in an sawi a, a lawmawm hle mai a. Hei kan react vek thei lo ang a, amaherawhchu, a pawimawhzual nia ka'n hriat te, kan hriat tlan atana tha, a ram khawih ang chi deuh hlek kha a awm a. Hei kan Member zahawm tak Pu Nirupam Chakma-in a rawn sawi Longpuighat-ah Public Health Sector Webside-ah a awm tih kha a dik a, kan han awm ve hlim khan hemi Lawngpuighat leh Borapansuri-ah hian Damdawiin

awm tawh angin a intarlang vang mai a. Amaheawhchu, a hmun te kan han kalin a lo awm lova, tichuan a tahtawlin Burapansuri kha kan sa nghal a. Lawngtlai kha chu kan sa mai thei ta lova. Chutiang chuanin a lehpekah kan lo ngaihtuah dawn a ni, kha kha tunhmaa kan awm ve hmaa mi kha a ni a, chulai chu a pawimawh riauin ka hria a, awmlo, a bo tih te a lo awm ve palh takin. Tin, nichina Member zahawm tak Pu Thlenga'n damdawi tha lo a rawn sawi a kha a lawmawm ka ti a, Sorkar hmasaah pawh khan kan inbeihna ber kha a ni a. Tuna a rawn lek chhuah a kha keimahni Drug Control tena an hmuhchhuah, a tir te atanga an hmuhchhuah sa a ni a, ka Office-ah pawh kan kawl ruih mai a, tichuan, kan in ko khawm a (interruption)... A lawmawm e, Pu Speaker, tunah pawh sawn ka Office-ah kan dah ruih mai. Tin, hmun dang dangah kan dah a, a chhan chu kan Drug Control administration-a hi kan fak a, tunah hian damdawi thi leh damdawi tha lo ang chi leh damdawi hlauhawm chi te an detect a, an zawng char char a, a lawmawm ka ti tak meuh meuh a, an thawk tha ka ti a, Pu Speaker. Tin, kan Chief Minister zahawm takin a encourage thiam bawk a kan ti tha in ka hria, helai takah hian, tin, Member zahawm tak Pu Chate-a han sawi tak ang khan Biahtehte pawh khan kan han kal dun a, kan han en a, hetiang hi a awm tawh tur a ni lo kan ti a. Kan Ministry-ah hian change awm a chu material chhia supply te, tin, damdawi thi mai tur supply te a awm tawh lova. Amaherawhchu, kan control theih loh, he House zahawm tak kan hrilh duh chu keimahni State-ina kan lei ni lo Central atanga rawn supply hi a awm ve a heng hi chu kan control theih a ni lova chungte chu kan sawi duh a ...

Pu B. LALTHLENGLIANA : Pu Speaker, Central-in an rawn supply tih a kha State-in a lei loh piah lamah a awm thei dawn em ni. Tin, heng damdawi diklo lo awmna chhan a hi tender chhuah loh avanga tutute emaw duhsak zawng work order te an pek a, hmanhmawh taka supply te an ni a, chu chu a lo awm chhan a ni a. Tender te hi tha takin a pangngaiin ko selang chuan heng hi a awm ka ring lo zawk.

Pu LALRINLIANA SAILO, MINISTER : Pu Speaker, a awm thei a ni tih kha chu a awm thei a, direct a an rawn supply hi a tam mai a, thosi len te hi direct a an rawn supply chi a awm a, helai a lei chi te a awm a. Tin, damdawi hi direct a an rawn supply hi a tam em em mai a ni, tin, programme hrang hrang a tam em avangin Health-ah hi chuan. Tin, Pu Speaker, tender lova chhuah tih kha Pu Speaker, Member zahawm tak Pu C. Ramhluna zawhna starred question no. 66-naah hian 2009 to 2010 thleng in dressing materials medicine leh hospital cleanliness te hi eng zatin nge lei a nih an ti a, heng hi tender a koh an ni em tih a ni a, Ni e, tu te nge supply tu? An ti a tiang hian hei hi in la hmu vek dawn a, supply awm miah lo a han sawi te khatiang a han sawi kha chu hei hi an hmu ang a, an lo la hmu lo a nih pawhin an hre mai dawn a ni. Tender hi an ko khawp mai a, amaherawh chu emergency supply hi a awm ve hrim hrim a Pu Speaker, Aizawl Civil Hospital a ni emaw khawiah pawh hian khami han stock ruih a kha kan phal tak loh avangin, stock ruih khan dah ila a thi dawn si a, mamawh ang zel a lei kha order thar kan chhuah tak avangin (Interruption)

Pu C. RAMHLUNA : A sawi chian lawk atan, vawiin a ka zawhna lo chhuak a kha a chhanna ka la hmu hman si lo a, helaiiah hian information kan hmuh a chu 2009-2010 ah khan supply of medicine atan khan tender koh a ni ngei a, mahse ni 27 January 2010-ah khan hei hi cancel a ni a, chuan 2010 leh 2011-ah pawh khan koh a ni leh a chu pawh chu cancel a ni leh ta a, tichuan dressing material atan khan 2010 leh 2011-ah khan koh a ni leh a, chu pawh chu September 30, 2010-ah khan an hawng naa pending-in a awmin kan hria a. Tin, chu bakah chuan restricted tender a kha Hospital equipment atan khan tender kha koh a ni a, chu pawh chu November 29-ah hawn a ni a, mahse hei pawh hi pending in a awm leh ta a. Chumi rual chuan emergency supply tiin tu tu te emaw supply tir niin kan hria a, pakhat phei chu Vaivakawna mi a ni a, Vaivakawna mi phei hi chu oil leh lubricant supply-tu a ni nghe nghe a, khang te kha a ni a, khami avanga hetiang a damdawi diklo supply hi awm niin kan hria a, kha kha min hrilhfiah sela ka'n duh a ni.

Pu LALRINLIANA, MINISTER : Pu Speaker, hriatsual palh a ni ang e, hei heta hi an hmu ngei ngei dawn a, an la hmu ngei ngei dawn a. Kum 2009 atanga tun thleng a dressing material, medicine te leh equipment lei tawh a ni an in ti a, a chhannaah chuan a duh ang thlapin kan sawi ang e. Kum 2009 - 2010 atanga tun thlengin dressing materials, dressing materials leh hospital equipment lei dan chu hetiang hi a ni kum 2009-2010 ah dressing material, medicine 40108, E ngawi rawh Hospital treatment nuai 28 sing kua sangkhat 500 leh 73. Tin, medicine-ah hian 738902, Hospital equipment kan la lei rih lo a ni. Hei hi SPA leh Departmental Purchase Advisory Board kal tlang thlap a tih a ni a. Tin, B-naah hian heng lei tur hian quotation koh a ni em tih an zawt a chhannaah chuan medicine leh Hospital instrument atan hian 2009-2010-ah tender koh a ni. Tute nge supply tu tih-ah hian, chhanna-ah chuan Govt. approved supply-tu ten an supply thin, a supply tute chu M/S Zomeditech, Zo Medical & Equipment, Aizawl, pahnihna-ah M/S Teenson, Tuikhuahtlang Aizawl, pathumna-ah M/S Indane Instrument Manufacturing Company Kolkata, palina-ah M/S John LT Mawia Drugs Store Upper Bazar, Aizawl tihte a ni a, Pu Speaker, kum hnih leh a chanve chhung kan han thu ta a ni a, hetiangah hian midang a luh ve theih loh, heng hian an lut a ni mai, churang chuan a tih dan danglam deuh an han tum thin a, Purchase Advisory Committee ang-te kan han ti dawn thin a, a rem thin si lova technical-in, chu chu keini pawhin hreawm kan tih em em a ni a, tin, ka sawi ang khan emergency hi a awm lo thei lo a ni, khawiah pawh Sorkar hmasa-ah pawh a ni ang a, tunah pawh a ni a nga, nakinah pawh a ni ang, amaherawhchu, tam pui a ni ngai lem lova, chutiange chu a awm ve thin, hei vanduaithlak tak maiin kan ti dawn a mi? Hetiangah hian kan Chief Minister-in corruption-te leh leh diklo taka thil tihte hi a huat em avangin diklo nge ka hre lova, keimahni inrawlhna ni lemlo a te pawh a awm a. Vanduaithlak takin kan Director pahnih te chuan case an nei a ni tunah hian. Chutiang chuan action hi sorkar in a la ngam a, a la thin a, chungte chu sawi hreawm tak te pawh a ni tho mai. Tin, tuna khulaia Vaivakawna an han sawi chi ang te pawh kan inzawng chhuak a, tu chhungte nge ni heng hi enge ni tih kha, chutiang chuan Pu Speaker, kan kal rap rap a ni. Helaiiah hianin phoro ngam tiha hi....

*Speech not corrected

Pu B. LALTHLENGLIANA : Pu Speaker, khawngaihin Vaivakawna supply an pek hi kan information-ah chuan Oil and lubricants zuar thin an ni a. Drug licence pawh nei lo an ni a. Khang kha engtin nge supply pek an nih theih dan leh drugs licence chu an lo neilo reng em ni tiha kha kan zawt pah duh a.

Pu LALRINLIANA SAILO, MINISTER : Pu Speaker, hei hi kan in zawt chhuak a, keini pawhin. A hma in drugs licence an nei lo a ni awm e. Amaherawhchu tunah hi chuan an lo nei ve awm a ni a. In veng a ni a, Pu Speaker, i hria in ka ringa. Tunah hi chuan nichina ka sawi kha a thu dikah min ngaihsak ula, team thar kan ni tawh a. Director thar te kan nei tawh a. Hetiang hi a awm ngai kan ring tawh lo a ni. Tichuan ti ila a tawh mai awm mang e, hrehawm pawh kan ti khawp mai.

*Speech not corrected

Pu LALDUHOMA : Pu Speaker, khawngaihin Minister-in a an han sawi atang khan a supplier 5/6 a rawn chhiar chhuah te lo kha chuan midang tan khan a chet ve theih loh a ni a tihna ang deuh lek lek khan ka lo ngaithla a, quotation te chu quotation a ni a. A thlangtu awm a ni a. Midang kha ava hrek beh ngawt theih loh va, khalai kha engemaw a awm zia aw, “Keini pawhin hreawm kan ti” a tia. Kha kha chu Minister te chuan thu an nei alawm. Ni sat vanglai taka han phoro chat mai atan te pawh khan ava tha awm ve.

Pu LALRINLIANA SAILO, MINISTER : Pu Speaker, case te pawh an nei tih kha a tawh mai awm e. Sawi tam pawh a hreawm khawp mai. Tin, keini pawh kanin zawhna thin chu kha lo pawh kha a la awm a, hemi malaria quinine tih te pawh hi thalo nia kan hriat, kan hmuh chhuah vat kha a awm a. Engtingge vigilance committee hi a through theih kan inti a ni. Chutiang te pawh chu a ni ve bawh a. Keimahnii lam atang hi chuan kan theihtawh hian kan fimkhur ve a, tihsen loh te pawh hi a awm ve a ni. A chhanna tawi te chu ka sawi ang kha a ni mai. Hrehawm ti tak chungin sorkarin kan Director 2 te case - Director 1 suspend a ni a, pakhat hi case neiin a pension a. Chutiang chuan a dang te pawh case nei laiin an la awm a ni. Chuvang chuan tuna kan inpuhna ang kha chu Pathian zarah kan fihlim hmak a ni. Pu Speaker, hemi hmun hrang hranga Damdawiin leh a thawktu te harsatna hi kan hria a. Nichinah kan sawi tawh a, chawhma lamah. 13th Finance Commission khanin ₹ Vaibelchhe 30 kha min rawn pe a ni a. Amaherawhchu, hei member zahawm tak ten kan hriat tlan atana tha, hetah ruling lam a ni emaw, opposition lam a ni emaw, heng hi rual taka kalpui kan tum a ni. Pu Speaker, hmannah Health Department-a kan director te nen chhim lam saw kan va fang chhuak deuh dap a. Mara District leh Lai District te kan fang chhuak a ni ber a. Sawlamah sawn Infant Mortality rate hi a chhe em em mai a. Kan Zoram min pawt hniam i ti mai teh ang, min ti mawi lo i ti teh ang, a mawi lo zawng ni lovin. Chutiang chu a nih avangin kan va kal a. Lo ngaihthah deuh hlek saw niin kan hria a. Chuvang chuan tuna 13th Finance Commission atanga pawisa kan hmuh tur pawh hi Sub Centre leh Quarter te sawlamah kan vawm hmasa dawn a ni. Chumi a nih loh chuan In 320 chuanga Health Sub Centre pawh awm lo kha an lo nih nawk hlawm avangin, In 100 chuanga te an ni nawk mai a, Pu Speaker, kalna hrehawm tak tak. Chung chu kan u leh nau dik tak an ni a. Lai te, Mara te,

chungah chuan kan han bel deuh hlek dawn a. Chuvang chuan kan rawn tuam phei dawn a ni. Tin, National Rural Health Mission atangin chutiang ang a mamawh zual lo phuhrukna tur chu a awm bawk ang a. State ah tlemte a awm bawk ang a. Chutiang chuanin kumkhatah vaibelchhe 7 leh nuai 50 kha hman turin ruahman mek a ni a. Chutiang chuan kan rawn tawlh phei zel turah kan inngai a, kan ruahman a ni.

Pu C. RAMHLUNA : Pu Speaker, ka lawm khawp mai. Health kha a sawi hman ta tlat lo mai a. Kha kha han ngen ka duh a. Nichina kan minister zahawm takin a sawlam pang ngaipawimawh a, Sub Centre te kan sa ang e a tih kha lawmthu ka sawi duh a. Tin, amah hian a lo kal a, a hmu Chiang a, hmuntin deuh thawah khan, inthlan lai pawh khan Sub- Centre kan sa ange ti khan a intiam phei deuh nual mai a. Khatiang ang khan min tih hlawhtlin sak ngei sela tih kha ka han ngen duh a ni e.

Pu LALRINLIANA SAILO, MINISTER : Pu Speaker, theih tawp kan chhuah e. Tunah hian plan leh estimate te siam zawh vek a ni a, tuna kan pass zawhah hian kan bung chho thei turah kan inngai a, sawlam atang sawn. A pawimawh tak meuh meuh a, infant mortality, naute leh nute thih tamna te a nih avangin kan ngaihtuah dawn a ni, sawlam atang sawn.

Tin, chutih rualin Member zahawm tak takte han sawi kha kan ngihtuah tel tho dawn a. A mal malin han chhan sen chi a ni lovang tih ka sawi duh a. Chutih rualin District Hospital ang chiah hian rilru kan pe lian viau a, Champhai bialtu zahawm takin Gynealogy, hmeichhe lampang doctor specialist kan neih loh thu a sawi kha kan tawm a. Nia, sawi pawh a hreawm a, engemaw intih thiam lohna avangin doctor tha tak kha lut leh ngam tawh lovin a awm a, chu chu kan sawn ta a. Tunah hian a thlaktu tur hmeichhia kan han ruahman leh a, order a la chhuak hman lova.

Tin, Pu Speaker, Member zahawm tak takten an bial an han sawi diat diat a kha, tunlai te a hi kan han intih chet lai a ni a, a then kan han sawn chhuak a, a then kan han la lut bawk a. Khatiang ang khan kan tih lai mek a ni. Theihtawp kan chhuah vek ang tih kha kan sawi duh bawk a.

Tin, pawimawh leh deuh mai pakhat chu, Member zahawm tak Pu P.P.Thawla ina Manipur a B.Sc. Nursing zirte chungchang kha, an nu leh pate pawhin min rawn hmu a. Vanduaithlak takin hei hi keimahni Department thlan a ni lova, ka hriat sual loh chuan, Technical Education Department thlan a ni a. Chutih rualin khilai ami an han kalna kha recognize loh a lo ni hlauh mai a. Kum hnih emaw lai an han kal ve a, an khawngaihthlak khawp mai, ka hnenah pawh an lo kal a. Kan Nursing College-te leh RIPAN-te kan han bia a, amaherawhchu helaiah course inanglo deuh te a lo nih te kha a hlauhawm a, chutih rualin midangte nena han suihfin ngawt kha, thil rem alo ni si lo a, rilru hrehawm takin, kan department chan ni lo mah se kha kha kan share pui a ni tih kha kan sawi duh bawk a ni. Tin, Saiha kha, a lo thlen phawt loh hi chuan pawisa hi kan sawi ngam lo a, kan beisei ru renga Saiha Hospital sak saw vaibelchhe engemaw zat, sawm chuang sawmhnih dawn chu a nih ka ringa, kan rawn rial rei tawh lo ang e an ti a, chumi chhunga lo hman tur..

Pu LALTHANSANGA : Pu Speaker, kan minister zahawm tak khan min chhang thei ang em? North Vanlaphia PHC sak tura measurement te pawh a lokal tuma kan lak vak kha engtikah nge hna a tan theih ang tih kha min chhang fel thei ang em le?

Pu LALRINLIANA SAILO, MINISTER : Pu Speaker, kan sawi tawh ang khanin 13th Finance Commission khanin PHC sak nan 15 leh Health Sub-Centre leh Boarder vel tih nan khanin 150 a rawn phal kha a ni a, chumi chhungah chuan khung kan tum chho anga, amaherawhchu tah tawl tein kan kal chho dawn a ni. Tih sual kan lo neia, han inpuan ta ila, kan Health Department khanin khami pawisa han hman dan tur ruah hmannaah khanin aa flow a kha alo diklo deuh hlek a, 2011 – 2012 ah hianin vaibelchhe 7 leh nuai 50 kha an lo ruah hmaha, kha kha ka hnen lo thleng si loin Planning-ah a lo lut hlauh mai a, kan innawr leh a Chief Minister zahawm tak kan dila, vaibelchhe 18-ah kan chho a, chu chu annin min lo tihsak a, helaiah pawh, amaherawhchu Central lamin an pawm thei rih tawh lo e min tih avangin, khami an lo theh luh hmasak ang te khan vaibelchhe 7 leh nuai 50 te kha, a kal phawt anga, tichuan a dawt leh a inchhawp ang khan a kal bek bek dawn a ni. Chungah chuanin tih len tura ngaih a ni. Tin, vanneih chuan National Rural Health Mission atang hian kan pawt lut leh hlauh thei bawh a, kan thawk tute, Doctor-te an rim hle a ni, tih kha kan sawi duh a ni, tih kha kan han chhan nise. Tin, kan sawi leh duh chu, nichina mi a pawimawh ka tih deuh hlek, mipuiin an thlir a, khawimaw laiah PR te pawh alo chhuak a, MRP rate aia sanga hralh tih kha a awmlo a ni. Hriatsual palh liau liau a ni tih kha kan sawi duh a, a hmuh theih vek a, kan thil leina ang chi te, khang kha ka'n sawi duh a.

Pu Speaker, ka sawi ang khanin a mal mal chuanin kan react thei dawn lova, hemi 3F chungchang hi doctor indaihlohna hi kan vaia kan rilru a min kaptu a ni a. 3F kha sorkar hmasa khanin 66 a lo la kha a ni a, a lawmawm thova, thlipui emaw, tuilian emaw tawrh khatiang rikrum thil lirnging emaw khang atana lak ani a 66 kha. Chu chu regular turin 4(c) kha tihnun a ngai a, khami 4(c) regularize tur khanin service rule a lo ngai sia, service rule kan bei rei hle mai a, tunah hian a inchhew tan tawh a. Amaherawhchu, Pu Speaker Central pawhina a duh a rawn insist ti mai ila, mi rawn tih thina chu rural service nei thingtlang a awm te hi a pawimawh a ni an ti a. Chumi tur chuan rural a awm thingtlang a awm te kha a nghet a an luh dawnin Nei se kan ti a chu chu kan ruahman mek a chu chu kan tih zawhah a nghetin sawmruk chuang a hi kan la anga tichuan a intahtawl chho dawn a ni. Kan harsatna tam tak hi kan puhruk chho thei turah kan ngai a rei vak lovah hianin, chung chu kan sawi duh a ni.

Tin, tuna kan kalpui dan tur chu nichina kan sawi infant mortality rate te, naute thi te, nu thi te hi kan ngaipawimawh dawn a Pu Speaker, kan vaia hriat atana pawimawh em em chu hei FRU kan ti a First Referral Unit, hei hi Central-in a ngaipawimawh a ni. Khata 24x7 damdawiin a kan ngah a ngai ta a, chumi tur chuan doctor a te pawh kha train a ngai ta a ni. Hei hi nasa taka tuna hma kan lak chhoh tum dan a ni a, thingtlang service kan ngaipawimawh anga, chumi a FRU a mi an kal a, a nihna dan tur ang taka kan tih zung zung theihna dan tur anga kha kan ngaihpaawimawh tur a ni. Tam tak ka sawi tawh lovang.

Tin, chumi tur chuan hei a hranpa a train te pawh kan nei a Emergency Maternal Opstetric Care tihte Guwahati-ah khuan thla thum, chumi te chu a hmunah chat chat kan rawn dah chhoh tawh ang a. Tihian thingtlangah pawh an dinhmun kan su tha chho dawn a ni.

Pu Speaker, kan achievement tam tak sawiloh kan tum zawk ang a, a niawm palh takin. Chung hrang hrang a tan chuanin hei Specialist kan nei tlem si a. Indian Public Health System standard anga hi kan phalo nasa hle mai a ni, nichina kan Parliamentary Secretary-in a sawi tawh a. Kan norms hi kan phalo engti zawng pawh hian. PHC-ah CHC-ah hianin specialist a nilo berah 5 awm tur a ni kan ti a, khangte kha pakhatmah kan dah thei lo a ni. Amaherawhchu, khatiang tluk tur hian tunah hian DNB kan ti a. Diplome Natioanal Board hi siam kan tum dawn a ni. Chumi tur chuanin tun hma khan budget-ah dah a la ni ngai lo a ni. Library tha tak neih a ngai a, chumi tur chuanin budget-ah khanin kan han dahchho ta kha a ni a. Tin, zawi te tein improve kan tum chho dawn a ni. A pawimawh ber chu tunah hian monitoring hi a ni a. Hei hi NEC pawhin Monitoring Cell dinna turin a inhuam thui em em a. A monitoring hi kan tihfuh chuanin kan health care, kan health index a hi India ramah pawh a ti tha pawl ni chho thei turah kan inngai a ni. Hei tunah pawh hian kan thawktute an tang ta em em mai a. National Rural Health Mission-ah pahnihna kan ni ta a ni, Pu Speaker.

Tam tak kan sawi vek tawh lovang a, Health Department chu hei a lawmawm ka ti a. Establishment hrang hi 16 kan nei a. Kan budget pawh hi a lian reng a ni len pawh hi. Chuti chung chuan Central atanga rawn hmui theihna tur chin hi tam tak a awm a. Chunga chu tunah hian rualkhai zawk leh kal dan tur fuh zawka inrem turin Secretary thar kan nei a. Tin, Mission Director thar kan nei a, chutiang chuan kan inrem tan mek a ni tih kha ka rawn sawi duh a ni.

Ka rei loh nan Pu Speaker, Demand No. 44-na Trade & Commerce-ah lut tawh ila.

Pu LALDUHOMA : Pu Speaker, College of Nursing chungchang kha chu a sawi kha duh tawk ila, rawn react lo mai rawh se.

Pu LALRINLIANA SAILO : Pu Speaker, kan sawi em ni kha kha a chakawm tlatin ka hria. A tul chuan a nih leh i ti vek ang aw. Pu Speaker, tuna College of Nursing saw a pawimawh a, a hma a pawisa awm tawh rawn ringin estimate an siam a. Tichuan Principal room te, Laboratory room tur te, Lecturer room te, Student room tur zawng zawng rawn siam an ni a. Tuna 2nd installment pawisa hian engti zawng mahin ban phun loh kha a sa puitling dawn lo hrim hrim a. Chumi a nih avang chuan Committee-in ngun takin kan ngaihtuah a, keimahni department-in vawi tam tak kan ngaihtuah a. Amaherawhchu, case awm tawh anih vang leh tuna pawisain a daih dawn loh avangin sulhnu pawr neih kan hlau si a Planning leh finance Department i pun ang u kan ti a. Tichuan, Deceber 29,2010 ah chuan kan meeting ta a. Tichuan hei hi meeting minute a ni a, kan han sawi kan han sawi a. Tuna pawisa hian engti zawng maha a complete theih dawn loh avangin

Departmental a kal ni se tih kha meeting minute-ah hian a awm kuau a ni. Kan sawiduh a chu, tu in nge thawk ang kan in ti a. Departmental a nih avangin a Agency tur chu a ngai ve a, bill siam leh khatiang engkimah khan. Chuvangin nichina Member zahawm takin a han sawi Hmangaihzuala, kum 23 tih te kha, an inchhungah an lo en ve a, an nui nasa khawp mai a. A pa in 23 ilo ni maw an inti a ni awm e. Tin, a Minister in va sem ang em em han sawi te kha chu mithiam leh senior Member an ni a (Interruption)

Pu B. LALTHLENGLIANA : Pu Speaker, khatianga sawi dawn chuan kan information a dik lo pawh niah i ngai ang. Lalmangaihzuala kha M.R. Driver-a a lak Health Department a mi a ni a. Department work order a hmingin an pe a. Amaherawhchu, a hna vennaah kan Minister zahawm tak hi a kal zing deuh a, hlawhfa man te pawh hi a pe thin ni awm tak a ni. Chu chu Lalmangaihzuala hian a lo sawichhuah avangin work order kengtu a nihna ban a ni a. Tin, a hna atang pawhin an chawlhthir tawh ni awm tak a ni kan information-ah chuan. Chuvang chuan Minister zahawm tak kha react lo mai rawh kan ti a, a react talh a. Khalai te kha kan sawilang ve a nih kha.

Pu LALRINLIANA SAILO, MINISTER : Pu Speaker, thu chanve sawi a..... Chuvang chuanin kan member hian expand se ka duh zawk a, Minister pawisa sem ang a sawi te kha, chunglamin min hmu reng a senior member sawi a tan pawh a dikin ka hre lo, mahse kan opposition laiin building chhia te a khi te a tam em em a, kan uluk em em a, kan hming a lan tawhnaah chuan a tha tur a ni tih a nih avangin Champhaiah pawh Khawzawl atangin zing dar 4:30 ah kan chhuak chhova dar 5 hma in kan thleng chho a ni. A pawl em em chu Champhaiah kan kal a ring rod kal na hi a inkalthelh tur a ni a, mahse an lo dah khat pet mai a line khatah hian chutiah lai chuan kan MLA T.T. Zothansanga te pawh an awm a. Tichuan a ring rod inkalthelh lovin tlar khatah an dah put mai a ni. Chutiang ang chua Referral Hospital a ni emaw, Pu Zodintluanga kan Minister zahawm tak hmalakna a ni emaw keini chuan kan kal thin a, sawilai pawh saw quality a chhiat kan hlau a ni. Engineer te nen en thlap hma chuan tuman chhun loh tur kan ti a, kan hming a lan a kan hming chhiat hi kan hlau a ni Pu Speaker, Pathian zarah ka sawi ngam chu saw building saw a chhe lovang, a chhe lo reng reng ang tih hi ka sawi ngam a ni. Chuvangin a kal pawh kan kal tam a, a kal pawh kan kal zel dawn, amaherawhchu, kan peih loh hun, a nek nawk te a nih loh chuan a structure, a ruhrel tih laiah hi chuan sorkar mualpho ai chuan kan kal mai kha a pawl ka ti lo a ni, chu chu Pu Speaker. Tin, Health Care kha sawi a ngaiin ka hria a, mipui khawih dawt dawt thei a ni a, bial huap ni lo. Kan sawi tawh thin a sorkar hmasa khan Plan Fund atangin vaibelchhe sawmnga lo la thla in Reliance Company hnenah vaibelchhe sawmhnih pasarih leh nuai sawmli pakua singkhat sang sarih leh zariat pahnih kha a la a, Pu Speaker, tichuan, kan han thut ve khan enge ni ka hre tawh lo vaibelchhe riat leh nuai sawmparuk chauh kha Mizo mipui harsa leh damlo te hnenah khan an lo pe tawh a ni. An lo inthen fel tawh a, helaia kan Health Care te nen zep pawh an zep chuang lova, tichuan theih tawpin Reliance Company hnen a vaibelchhe sawmhnih vel lo awma kha kan ui si a, tichuan kan ko chho leh a vau thlem nen kan ti ta, vawi sawmpathum sawmpali kan meeting pui a, Pu

Speaker, tichuan vaibelchhe sawmpasarih vel tunah hian kan pawt chhuak leh a ni. Chutiang chu a ni a. Mizoram State sorkar Plan pawisa kha a ni a kha kha Chiang tak a lang kha a ni a. Tuna kan tih ve dan erawh hi chu pawisa kha quarter khatah vaibelchhe hnih kan pe a, tunah hian kan Health Care tihah hi chuan vaibelchhe ruk hi chu kan pe tawh a tunah hian, damlo te hnenah vaibelchhe ruk hi chu anrawn pe tawh a ni tunah hian, a in ang lo khawp mai, a hmasaa tih kha vaibelchhe sawm leh nuai sawmnga chuang hi Reliance Company khan an la kawl a ni, Ministry hmasain an tih kha. Amaherawhchu a har khawp mai kan han in ti ngial thin a, in khin lah an ngam em em mai a ni, kha bak kha chu sawi tawh lo ila. Chutiang ang chuan tuna kan kal dan a hi chu pawisa loss kha kan duh lova, pawisa a lo thlawna hman kan duh ve lova. Uluk takin theitawpin ka ti a. Mipuite harsatna ang zia zel khan tih chhoh a ni. A tir lamah harsatna a awm a, nichina Member zahawm takte rawn sawi pawh a dik a. Hemi computerize kha a kal chak thei lova manual-in kan dil ta a. Chutiang chuan manual-in kan ti ta a ni Pu Speaker. Nakuma kan tih leh turah hi chuan keimahnin third party te awm tawh lova tih tum kan ni a. Chutiang chuan tha taka tih kan tum a ni.

Pu Speaker, pawimawh em em maia chu, a tawp nan, tunah hian RSBY kan kalpui a. Hei hi Labour and Employment atanga hmuh a ni a. Kan Member zawng zawngte leh Mizo mipui zawng zawng ka chah duh chu cheng singthum hi BPL-te hnenah hian pek theih a ni a. Tunah khan duh aiin enrolment a chau a. A hmaa inpek that loh leh buai nuai a nih avang khan an hlau a. Hei hi chu a hlauhawm loh, ka sawi duh a ni. BPL-te hian ti lul rawh se. Kan ram pawisa kan save bawk ang a, anmahni tan a tha dawn bawk a ni. Cheng 35 leka lo in register-in keini'n Smart Card kan siam sak ang a, khatiang khan an khul chho ve dawn a ni. Hei hi chu i uar ang u. Kan biala mi zawng zawng leh Mizo mipui zawng zawngten Mizorama damlo BPL-te tan, chumi hnuah BPL bakah khanin, ni lo, RSBY bakah khan singsarih kha la kal chhoh leh theih tur a ni a, nuaikhat a ni phawt a. Tichuan, critical illness an ti a, Pu Speaker, a pawng a pui mai a state pachhe ber maiina hetiang pawngpaw thlar pawp pawp ang chi hi thil tha niin kan hre lova. Tichuan, APL kan tih BPL chunglam ho pawhin anmahni pawisa thawh ve zia ang zelin pawisa kha an hmu ve dawn a. Cheng 500 thawh chinin cheng nuai khat, cheng 500 premium pe chinin cheng nuai khat an claim thei ang a, cheng 750-in nuai hnih, cheng 1000 han pein nuai thum, chutiang chuanin kan siam a ni. Tunah hian kan han tan leh dawn mek a ni a. Hei hi uluk taka mahni bialah pawh kan Member-puite ka chah duh che u a ni.

Pu LALTHANSANGA : Pu Speaker, a zo tep mai a Health Care Scheme chungchangah khan an pek zat cheng vaibelchhe ngaah vaibelchhe li vel pe khan a'n sawi a. Hetilaiah hianin Health Care Scheme-ah hian an bill theh luh ang hi an hmu lo em em a. Tehkhin nan 7000 te an han thehlutah pawh hianin 2471 te kha an han hmu a, sawmi bill section-ah sawnin an sanction vek tawh bill atanga an sanction vek tawh 7000 angte kha chutiang khatiang chuan discharge atangin cash memo te diklo leh eng eng emaw query te lo siamin an deduct ta vak zel mai a. Kha kha an hrethiam lo em em mai a, a buaipui tur hian ni 2 ni 3, thingtlang mi tan phei chaun buaipui lova haw leh mai chakawm khawp khan sawtiang laiah sawnin an lo awm thin deuh niin a lang a. Hetiang harsatna hi an thlen fo mai a, a bikin thingtlang lam pang MLA tan phei chuan Pu Speaker a buaithlak hle mai a, tuna kan han kalpui leh turah te pawh hian.

Budget Speech-ah khanin ADB atang khanin million 20 leh tih emaw ni kha hemi Health Compus-ah khan a lo lang a. Hemi kan kalpui lehna turah te pawh hianin tun aia awlzawk deuh a kan kalpui hi avan tha awm ve. Mi pakhat phei chuan a rawn ziak a, Vanglainiah June 23, 2011 ah khan a rawn ziak a. Hemi ina a rawn ziahdan ang ngawt phei hi chuan ni 7 ah a kal a, ni 8 ah a kal leh a, ni 13 ah a kal a, tichuanin a luhlul hrim hrim avang khanin a tawpah hianin a hmuh tur ₹ 2000 leh tlemah khanin engmawzat ₹ 4000 leh tih kha a hmu ta tihte kha a rawnlang ta a. Chuvang chuan hetiang lai hi Pu Speaker, kan Minister zahawm tak khanin, a taima bawk a, Concrete Building en kha chu vawikhat a va en a, a that vakloh kha chuanin action kha a lak theih zel mai a. Khatiang aimah khan sawtiang laite saw enngun deuh chu avan tha awm em kan mipuite leh chhumchhia zawk kan VIP te tana kawng awlsam hi min zawnsak se tih kha kan ngen a nih chu.

Pu LALRINLIANA SAILO, MINISTER : A lawmawm e, Pu Speaker, thahnem ngaiin a rawn sawi a, khatiang kha chanchinbuah khan kan lo hmu a, keini pawh kan inzawt a, tuna kan kal leh tum danah hi chuanin khatiang zawng zawng veng thei turin CEO pawh dah ila kan inti a. Tunah hian CEO hranpa kan nei lova.

SPEAKER : Chanchinbu a thil ziak thinte pawh hi ka request duh chu a changtu Minister emaw te hi an mit ti mim a awm hi chuan chanchinbu-a an ziak hma te hian ziakin min pe sela. Tihian kan haw reng reng lovang, siamthat tur awm chu tih hi ka sawi duh a ni. Chanchinbu-ah ka lo hmu a tia tuten emaw an tih an tih tawh hnua Minister incharge in alo hmu a ‘e, tiang hi a lo ni maw’ hi kan ram tan boruak hrisel a siam vak lo in ka hria.

Pu LALRINLIANA SAILO, MINISTER : Pu Speaker, Member zahawmtak rawn thanhnem ngaihna ang khanin theihtawp chhuah kan tum a ni. Mihring ngang kan ni a, lo tihsual palh te pawh a awm ve thei a, amaherawhchu an fimkhur khawp mai a, sawi ang khan kan inveng tha khawp mai tunah hi chuan. Amaherawhchu, tihsual palh te pawh awm ve thei tho a nia, khang kha chu kan lo en zui ang e, uluk takin kan en ang.

*Speech not corrected

Pu LALDUHOMA : Pu Speaker, pakhat lek – Hei, damlo an han enkawl hianin damdawi man bakah khan hnimhlum man te, O.T man te, eng engemaw X-Ray man han tih ang kha an chanpual turah khan a tel zel mai si a. Chu chu an hmuhlet leh tur chi kha a ni bawk silova, a damlo te khan. Anmahni puala senso zawng zawng kha a pumpui te kha anmahni hian ziakin hmu thei sela, khang cut zawng te kha, hei hi chu hetiang hi a nia, a pawisa fai hmuh tur chu heti zat hi a ni tih ang te kha hrilhfiyah thlap chu nise an hrethiam deuhin ka ring a.

Tin, ka’n din chhan tak chu heng miharsa zual te hi phailamah te refer an ni ve tho mai a, singli singnga sen te a lo ngai a. Nakinah Health

Care atangin Bill leh thei dawn tih inhre reng mah se a tlachawpa hman tur kha an nei tlat hlawn lo mai a. Hetiang hi kan tawng hnem theuhin ka ring a, MLA te chuanin, han puih vak ngaihna kha kan tan a awm chuang bik silova. Chuvang chuan, Sorkar hnathawk tena credit facility an tih ang deuh hian an kalna damdawi inah khan an senso kha a cash-a pek ngailo hianin Sorkar-ah te hian kha Institution khan rawn thlenin, Sorkar khan lo pek sak mai dante hi a awm ang em aw tih kha duhthawh thilah han pangchang lehzel ila, mipui tan khan a tha lehzuol dawn a. Kan bill dawn tih in hrechiang reng pawh khanin khami hma khan an buai em em hlawn mai a, helai tak mai hi engemaw tia kawng awlsam zawk dap theih dan hi a awm thei angem?

Pu LALRINLIANA SAILO, MINISTER : Aw, Pu Speaker, a sawi ang khainin theihtawpin kan rawn tum anga. Tin, lehlamah chuanin hemi bill han thehluh hianin permit loh hemi item permit siam a ni a. Chumi ni lo, pawn lama mi kha bill luh hi a awm ve thin a. Khalai kha harsatna an tawk ve tho mai thin a. Tun hnuah erawh chuanin tha lehzuola tih kan tum a ni. Tin, khami 3rd party neia vai ti mai ila, tawng mawi lo ni lo se, Company dang ruai lovin tunah chuan self company-a kal kan tum a keimahnin Mizo leh Mizo te kan indawr thei tawh anga Mizotawng ngeiin, chu chu kan indawr tum dan tawh a ni tunah hi chuan, a hma aia a that ngei kan beisei.

Pu Speaker, a tawp nan hei chauh hi ka'n ti anga Demand No. 44-na Trade and Commerce hi member te pawh khan in rawn sawi nual a, kan lo luh lem lohna pawimawh si Pu Piana han sawi ang chi te kan han hria a, tin, midang pawh a then then chu Pu K. Lalrinthanga han sawi te pawh kha engemawchen chu kan han siam sak thei dawn a ni. Tin, keimahnina kan han tum loh khan thil pakhat leh chu NEC atang khan vaibelchhe 300 bawr vel kha siam a ni a. Chu chu R.D. nge aw, tunge lo siam ka hre lova. Kha vang khan kan han chawl deuh nghe nghe kha a ni a, a lo chhuak tepin ka hria a, kha pawisa kha. Chu chu Trade & Commerce atang khan chhannaah khan tikhan kan chhang thin a. Hei Trade & Commerce-ah hian nuai 431 chauh a ni a, a te ren rawn nain Pu Speaker, lawmawm ve deuh mai a chu nikum lamah kan hria a, kha khati lek kha a ni a. Nuai 100 revenue-ah min beisei a, kan khum a ni. Tunah hian nuai 431 budget kan neih veah hian nuai 135 revenue-ah min beisei leh a, khum leh kan tum a ni. Tun dinhmunah tak hian nuai 49 kan chhung leh hman tawh a ni. Chuvang chuan a te el awl nain kan khauh tang a nia, Trade & Commerce hi, kan vai tan tih kha ka'n sawi duh a.

Tin, MAMCO te pawh theihtawpin an tang a hei, grade hrang hrangah, chutiang chuanin gate a awm ve na chu ZNP-in tha zet maia Mizoram dung leh vanga an lo vahvaih pui kha kan ti tlat mai a, hei Sawhthing pawh Ministry hmasa laia ₹ 5 atanga ₹ 8 pel thei lo a kha kan han sorkar a, kan Chief Minister zahawm takin Gate a free tur a ni, kut hnathawktute thawhchhuahah hian tuman beisei an neive tur a ni lo a ti a, gate a free ta a. ₹ 28 te 30 te Vairengteah a ni ta a ni. Vawiinah pawh hian hei hi change nasa tak niin ka hria a, kan Sorkar, kan Chief Minister hmalakna leh a vision vang a ni. Chutiang chuanin, Trade & Commerce hi te tak te pawh nise theih tawpin kan tang a, Member zahawm tak Pu Lalthansanga sawi New Market a bawlhhlawh paihna kan han ti sawn dawn a, Local Council-in min rawn dang tlat mai a, kan in dawr kan in dawr mai a, engahnge maw Sorkar intihbuai le kan in ti a.

Amaherawhchu, an lo kal an lo kal avangin a nih aw in la duh a nih hi kan ti a, a pawisa kha a chhungah kan divert ta daih a, chutiang chuan saw saw kan la siam lo a ni a, amaherawhchu, kan han ti chho zel ang a, a hma aia tha zawk beisei kan tum dawn a ni. Tin, kan sawi tawh a Bangladesh chungchang hi chu kan Chief Minister zahawm takin hmannah a sawi tawh a Member zahawm tak Pu Thangtea a awm lo bawk a ka react lo mai ang a. Tunah hianin Central atangin Commerce and Industries-a mite leh Home Ministry-a mite an lo kal dawn a Rites Company te nen tunah hian karlehah emaw hian lo kal an tum a, amaherawhchu, keimahni zawkin hmanni a ka sawi ang khan khua a chhe em mai lo kal lo mai rawh u kan in ti a. Amaherawhchu, an rawn tum tho tih kha nimirah min rawn phone a chu chu kan sawi duh a. Tin, Bangladesh a an Minister zahawm tak pakhatTalukdar an kan Chief Minister rawn hmuh a duh a, chu chu Chittagong Hill track bialtu saw a ni a, hmanni pawh khan an naute nen chuan kan in bia a, kan Chief Minister hun neih hmasak berah rawn hmuh a sawlai saw rawn tlawh an tum a, chutiang chuan chak thei ang ber a hmalak kan tum e tih kha kan sawi duh a ni e, Pu Speaker. Eng emaw fiah lo lai a awm pawhin kan in zawt zel ang a, Office-ah pawh kan Member zahawm tak te ka welcome a ni tih kan sawi duh a ni.

Tichuan, Pu Speaker, he House zahawm tak hian ka Department enkawl ve Demand No. 24-na Medical & Public Health Services kum 2011-12 atan ₹ 182,80,86,000/- leh Demand No. 28-na Labour & Employment ₹ 6,70,02,000/- leh Demand No. 44-na Trade & Commerce ₹ 4,31,00,000/- a vain ₹ 193,81,88,000/- hi min pass sak turin ka rawn ngen e.

SPEAKER : Awle tunah kan Minister zahawm takin a rawn wind up a, a wind up lai tein member ten kan hriat duh te kan zawt a, dawh thei takin aw dam diai in min chhang tlang zel a, a lawmawm kan hlim tlangin ka hria a. Tunah a Demand te pass a rawn dil a. Demand No. 24 Medical & Public Health Services ₹ 182,80,86,000, Demand No. 28 Labour & Employment ₹ 6,70,02,000, Demand No. 44 Trade & Commerce ₹ 4,31,00,000 avaiin ₹ 193,81,88,000 te hi Pass remti ti apiangin 'Remti' ti'ru le. (MEMBER : Remti). Remti lo kan awm chuan 'Remti lo' ti'ru le. Awm lo maw.

Awle, Pu Lalrinliana Sailo, Minister zahawm tak Demand te - Demand No. 24 Medical & Public Health Services ₹ 182,80,86,000, Demand No. 28 Labour & Employment ₹ 6,70,02,000, Demand No. 44 Trade & Commerce ₹ 4,31,00,000 avaiin ₹ 193,81,88,000 hi House-in lungrual takin a pass ta a ni.

Pu LALRINLIANA SAILO, MINISTER : Pu Speaker, ka lawm e.

SPEAKER : Tunah chuan Pu Nihar Kanti, Minister zahawm takin rawn wind-up in pass rawn dil nghal se la, i lo ko ang.

Pu NIHAR KANTI, MINISTER : Pu Speaker, ka lawm e. A hnung ber a ka Department wind-up tura min sawm avangin ka lawm e.

Hei member zahawm tak tak ten ka Department Disaster Management & Rehabilitation mi 9 laiin min sawi pui a, AH & Vety Department mi 12 laiin an sawi bawk a, Sericulture pawh mi 6 laiin an sawi a. A tlangpui in Pu Speaker, lawmthu leh Vety quarter building chhe chungchang leh silpauline tam zawk MLA te pek theih nan leh duh anga a daih lohna chungchang te pawh in sawi a. Kan officer ten an chhinchhiah vek a, kei pawhin a theih ang angin ka chhinchhiah a, theih tawpin tihlawhtlin ka tum dawn a ni. Pu Speaker, a hmasa berin Disaster Department hi sawi ta ila, Disaster hi kan hre vek a, hun la rei lo ila, react tur pawh a tam ka ring lem lova, amaherawhchu Pu Duha sawi kha tarpaulin chhe chungchang, a chhia tih kha chu ka lo en dawn nia.

Pu B. Lalthlengliana sawi, quotation dik lo chungchang hi diklohna engmah a awm lova, dan angin kan ti thlap a ni tih member te hian min hriatsak se ka duh a ni. Pu Speaker, kan hre veka, chhiatrupna thlen a, chhawmdawlina hnathawh hi Disaster department hna ber a ni a. Mizoram hi tlangram a ni a, chuvangin kumtin chhiatna chi hrang hrang kan tuar thei a ni, leimin vang te, kangmei vang te, tuilian vangte, rial tla vang tein chhiatna te kumtin hi kan tawk fo thin a ni.

Pu Speaker, Scientist leh mithiamten an sawi dan chuan Mizoram hi seismic zone V, chhiatna thlenna hmun hlauhawmber zone-ah kan awm a, englai pawhin chhiatna hi kan thleng thei a ni. Amaherawhchu, Pathian khawngaihna a zarah a thleng lo chauh a ni a, Pathian khawngaihna a zarah thleng lo tur pawh in kan beisei a ni tih Pu Speaker sawi kan duh ani. Heng vang te hian Government of India leh UNDP tangkawp chuan Mizoram hi disaster programme-ah min khung ve a ni. Mipui hnenah awareness campaign nan leh zirtir nan mock drill te, poster tar te, pamphlet, lemziak leh essay writing te buatsaih thin a ni a. Pu Speaker, ka sawi duh chu Government of India in Disaster Management Act, 2005 a siam angin Chief Minister kaihhruaina leh Chairman-na hnuaiyah Disaster Management Authority din a ni a, hmannah Chief Minister kaihhruaina hnuaiyah June 20,2011 khan meeting hmasaber kan nei a ni. Meeting ah hian agenda pawimawh tak tak kan passed a, chungte chu State Disaster Response Force IR Batallion tina din tur te, State Disaster Management Policy leh Revision of Mizoram Urban & Regional Development Act, 1990 leh Aizawl Development Authority Act, 2005 te kan passed a ni. Enforcement of Mizoram Urban Development Act, 1990 in all district headquarter leh town. Declaration of Fifth IR Battalion at Sakawrtuichhun for training of State Disaster Response Force, Setting out of 1% divisible Plan Fund in every department. Hemi zawng zawng te hmannah kan passed a ni.

Pu LALTHANSANGA : Pu Speaker, khami a sawi lawk lai khanin hemi National Earthquake Management Authority, Govt. of India in a National Earthquake& Programme hnuaiyah hemi retrofitting turin Civil Hospital a rawn tih a kha Structural drawing te pawh kha tih tawh kha a ni a. Hei hi eng chen nge hma lak a nih tawh? Khami kha ka'n hre duh deuh a. Tin, chumi bakah chuan Police officer 2 Coimbatore a response force te khan eng ang chiah in nge police battalion-ah te leh hmun dang dangah te training hi an han pek dan hi min han hrilh thei em aw?

NIHAR KANTI, MINISTER : Pu Speaker, a sawi kha chu a dik a. Hospital hi kan sorkar hian kan ngai pawimawh a. Retrofitting tur hi National Disaster Authority-ah project kan theh lut a ni. A chhanna erawh chu ka la hmu lova, ka lo buai pui mek a ni. State Disaster Response Force chungchang erawh chu Coimbatore-ah master training turin kan tir a. Chu chu an theihtawpin hmun hrang hrangah kalin training te pawh an nei/pe a ni. Tin, Pu Speaker, Chief Secretary kaihhruaina hnuaiah State Executive Committee kan din a. District tinah Deputy Commissioner kaihhruaina hnuaiah District Disaster Management Committee te, Block leh Village levelah Disaster Management Committee te kan din bawh a ni. Chief Secretary kaihhruaina hnuaiah PWD Building te telin Hazard Safety te pawh kan din a. He tih lai hian rapid visual assessment of life/land building an buatsaih zo tawh a ni. Mihring chen tamna building, entirnan, school te, office te khawl hmangan a him em tihte an enfiah zo tawh a ni.

Pu Speaker, thil lawmawm tak ka sawi duh chu, kum 2010 March thlaa cyclone leh rial vangin hmun hrang hrangah chhiatna te kan tawh a. Kan department chuan memorandum te Central ah kan theh lut a. Central Sorkar chuan ₹ 6 crore chuang tanpuina min pe a. Heng sumte hi chhiatna tawkte hnenah dik takin sem chhuah a ni tawh nghe nghe a, a lawmawm khawp a ni.

Kan hriat theuh angin Mizoram hi thlipui (Cyclone) tuar thei kan nih avangin National Cyclonic Mitigation Project chhungah min dah ve turin National Disaster Management Authority hnenah ziakin kan theh lut a, second phase-ah te pawh min telh kan beisei a ni.

Tin, Pu Speaker, tlang ram te kan nih avangin kumtin lei min hi a awm thin a, chuvangin Mizoram Landslide Management Action Plan siamin National Disaster Management Authority-ah sum mamawh zat kan thlen a. Kan hriat theuh angin MLA te hnenah pawh silpaulin te quota angin kan sem ve thin a. Kei pawh Pathian zarah he House zahawm takah hian kum 10 lai ka lo awm chho tawh a, opposition a ka awm lai erawh chuan hetiang hi a awm ngai lova. Amaherawhchu he sorkar tharah chuan opposition emaw ruling emaw ka differentiate ngai lova, ruling dawn ang ang kha opposition pawhin an dawng ve a ni. A dik takin opposition MLA te chu kan duhsak zawk mah a ni. Pu Speaker, engineer leh architech te plan dante, insak dan te pawh training pek vek a ni. Village level Disaster Management tin hnenah Search & Rescue leh First Aid Training kan pe bawh a, tin, school safety planning, zirtirtu training pek a ni. Thil pakhat Pu Speaker, a lawmawm khawp maia, Class V, VIII, leh X ah Social Science subject-ah Disaster Management topic pakhatah kan dah tel bawh a ni. Hmalakna hrang hrang avang hian hei Mizoram mipuite chhiatna lo thleng tih nep leh hmachhawn danah hma kan sawn ngei ka beisei a ni.

Pu Speaker, Mizoram luiah hian chhiatna a awm fo thin a, helai hi he House zahawm takah hian Pu Lalduhoma hian a sawi chhuak thin a, kum tin eng emaw chhiatna hi kan tawh ve thin a ni, a bik takin Sairang, Tlawng luia kalte tuiah an tlahlum fo thin a, chuvangin Disaster Management Department chuan ni 17th Sept, 2010 khan MLA zahawmtak hriatpuin river accident bika hman tur chhanchhuahna hmanrua Police kutah kan hlan a ni. Chungte chu ineffable rubber boat, stretcher, generator, scuba gear, under water torch light te chu Police

Department kutah kan hlan a, chhياتna tawh palh awm pawhin heng hi tangkai taka hman turin kan beisei a ni.

Pu Speaker, hei thu lawmawm ka sawi duh chu 13th Finance Commission 2010 atangin 2015 chhungin Disaster Relief Fund rawn tih pun a ni a, crore 12 lai min pe a, bakah hian Government of India chuan State Matching Share hi a ti hniam a, a hma chuan 25% a ni a, tunah 10 % ah mintih hniamsak a, a lawmawm ka ti khawp mai. Tin, a vawikhatna atan Capacity Building Grant 5 crore kum 5 chhunga hman turin min rawn pe bawk a, a hman dan tur perspective work plan chu duangchhuakin Finance Ministry-ah kan thawn bawk a ni. Pu Speaker, kan hriat theuh angin, kan vannei hle a, kan vanneihna chhan chu YMA te kan neih vang a ni a, veng tinah YMA te kan nei a, YMA member te hi disaster thleng palhah pawh first responder an ni a. YMA chungah pawh House kaltlangin lawmthu ka sawi duh a ni.

Tunah hian chhanchhuahna hmanrua hi YMA kutah engemawzat dah turin kan buaipui mek a ni. Pu Speaker, a tawp berah chuan hei natural disaster hi mi zawng zawng chungah thleng thei a ni a, tuman kan dang thei lo a ni a, mahse kan fimkhur chuan kan titem thei a ni. Chuvangin sorkar department hrang hrang, tlawmngai pawl hrang hrang, kohhran te telin mipui tangrual tur leh thawhhona nei tha turin ka sawm che u a ni.

Pu LALDUHOMA : Pu Speaker khawngaitakin, chhياتna tawk te chhanchhuahna tur Tlawng Lui a min pe kha kan lawm takzet zet a, kan thla pawh a muang a, amaherawhchu hei accident te kan han awm zui leh a, Speedboat tel lo chuan tun ang tui len lai hi chuan a lo chet tak tak theih hauh loh mai a, Speedboat hi pakhat tal hi chu kan la mamawh a, khung Sairang leh a chhehvel atan a ni lova, a accident tawk thin hi Aizawl khawpui hmun hrang hrang ami leh hmun dang daih a mite pawh an ni fova, khunglaia mite chuan tui an thiam a an him zaw phian a. MLA Fund atanga tihte hi kan tum thin a, kan neih sa atang hi chuan a har ve khawp mai a. Speedboat pakhat tal hi chu kan Minister hianin engtik remchangah emaw min pe leh thei angem aw tih kha, nia ngaihtuah zui sak thei angem tih kan zep hram duh a ni.

Pu NIHAR KANTI : Awle, Pu Speaker, a sawi chu a dik khawp mai a, Hon'ble Member chu zahawm hle mahse, kan theih dawn leh dawn loh chu kan hotute rawn chungin ka theih angin ka lo bawhzui dawn nia.

Pu Speaker tunah Demand No. 34 Animal Husbandry & Veterinary Department sawi ila. Kan Ministry thar hi kan vannei em em a, Central Sorkar atangin blessing tam tak kan dawng a. Kan blessing neihna chhan chu kan Chief Minister zahawm takin mimal tak pawha Central hotute a hmelhriat vang a ni.

Kan Agriculture Minister zahawm tak sawmna angin Mr. Sharad Pawar hian Mizoram a rawn tlawh a, kan lawm em em a. A bik takin kan

Department tan hian vanneihna a ni a. Aman min rawn tlawh avangin central project hrang hrang hi kan thehlut a. Engemawzat chu min sanction a ni.

Tin, hei hmun hrang hranga kan Dispensary te, R.H.Centre te, Quarter te a chhiat avangin kan thiat nual a. Thenkhat chu U.T. hunlaia sak te a ni a. Mahse, Sharad Pawar lo kal avangin kan vannei ta a ni. Chumi atan chuan in 36 lai sakna tur pawh min sanction sak nghal a ni. Chu chu a lawmawm ka ti khawp mai.

Member ten an sawi tam ber chu VFA indaihlohna te leh post ruak 37 lai mai kan neih thu te a ni a. Engpawhnise, theih ang angin ka lo chhinchhiah dawn a ni.

Kan hriat theuh angin Mizoram mipui te, thingtlang emaw khawpui emaw te chu demand-te a sang khawp mai a. MLA ho zingah pawh Vegiterian pakhat pawh kan awm lo a nia, sa ei mi vek kan ni a, demand-te pawh a sang khawp mai a. Kan department-in kan tum ber chu Sa, Artui leh Bawnghnute-a intodelh a ni. Mizoram tan hian ranvulha eizawna tam tak kan siam a, tin, mi tam tak tan sum lak luhna side income ranvulhna atang hian kan siam sak bawk a ni.

Pu Speaker, kan hriat theuh angin hmannah Statistic Report kan tlangzarh a. Heta a landan chuan Sa, Artui leh Bawnghnute hi kan indaihlo nasa khawp mai a. Heng vang hian kan department hi bawnghnute, artui leh sa a intodelh turin tan lak mek a ni. Kan vannei a, kan vanneihna chhan chu sorkar flagship programme miretheite khaichhuahna turin NLUP hmangin hma kan la chho mek a. Miretheite hnenah NLUP kaltlangin chhungkaw hrang hranga Vety department hnuaiyah tanpuina 1st installment te pawh sem vek tawh a ni a. House Member te hriat atan NLUP beneficiary 2010-2011 chhungin Dairy-ah 952, Piggery-ah 5307, Mithun-ah 1855, Broiler 1574, Layer 149 an ni a, a total 9837 hnenah NLUP kan sem chhuak tawh a ni.

Pu Speaker, hei ran hriselna hi department hmalakna lian ber pawl a ni a. Nichinah Member zahawm tak thenkhat te pawhin an sawi chhuak a. Hma kan la mek a, ran natna hrileng hrang hrang tam tak a awm a. Chung zinga a larzual te chu vawk pul hri (swine fever) a ni a, ar bikah chuan ar pul hri a ni thung a. Bawngah chuan foot and mouth disease hi kan hriat lar ber a ni. Heng natna a kan in ven theihna turin sorkar in hmaa la mek a. Vaccine programme hi uluk taka kalpui mek a ni. Ram pawn atanga ran natna lo lut te hi Animal Check-gate te hi kan dah bawk a. Natna chi hrang hrang laka inven theih nan hmanni lawk khan National Animal Disease Reporting System kan din bawk a, a lawmawm khawp mai a. Kan Director in a sawi dan chuan India ram pumpuiah pakhatna a ni a. He system hmangin ran natna hrileng internet hmangin Delhi-ah thawn zung zung theih a ni a. Hemi system hman hian district tinah report te pawh a pe ve thin a. India ram pumpuiah keini chiah nei kan ni a, a lawmawm em em a ni. Khawvel changkaw zelah hian ran vulh dan leh talh dan te, kan zawrh dan te mihring tan a tha lo tih ka hria a, a bik takin Mizoram chuan Inrinni apiang in a duh apiangin an talh thin a. A thianghlim leh hlim loh hi doctor in an check loh chuan a sawi theih si lova; mahse kan ring a ni mai a, kan lei reng a. Chuvangin Sa thianghlim zawka talhna tur district tin a siam tum a ni.

Tin, NLUP hmanga a hmalak tur hi a lan dan chuan ran vulh a eizawngtute an pung tulh tulh a, chuvangin Aizawl khawpuia ran damdawi (Pu Lalduhoma - Ar vulh turin mi engemaw zah thlan a ni a, kan bialah te pawh khuan kan dawng ve nual a, a pa hi a tam zawk ziah a, a tui duha vulh an ni si a, vulh tham a pui kha a awm ngai mang lo a ni. Chhungkua eizawna in pek atan kha chuan a ni mang lo deuh a ni) Engpawhnise ka lo en fiah dawn nia...

Pu C. RAMHLUNA : ...hianin an pe ve a, vawk atan te, ar vulh tur te khan mahse in an sa a, ala ruak vek mai a, engtikah te nge khami atan khan ar note te vawkte te an sem dan tur hun ni ang le, a chhe hman ang tih a va hlauhawm ve an in sak te hi (Nihar Khanti : kha kha chu 1st installment kan pe phawt a)

Pu LALTHANSANGA : Pu Speaker, vawi khat leh lawk Biate a Vety hianin Quarter an nei a, a chhe hle tawh mai a, kan Minister zahawm tak hnenah pawh hian ka thlen tawh a, kan rawn sa ang a ti a, engtikah nge kha kha min rawn sak sak dawn? Khi a tlu deuh bei bui tawh mai a, tin, encroachment tih te pawh khi a hlauhawm tawh mai a tih a kha kan hre duh deuh a. Tin, chubakah chuanin Thenzawla khi mi farm a lawi vel te leh engemaw a ram saw tihral tumna deuh te pawh a awm ni in ka hria a. Sawmi Punjab lawi hnute tam ang chi saw kan bial velah sawn chi thlah tur atan te pawh an han ti a, a encouraging riau mai a, a hnute pawh kha a chhenfakawm a, anni tan chuanin in nghahna tling thei tur a ni viau mai a. Aw sawtiang ang chi te saw a chi thlah atan te hianin hawh te emaw han lak te hi subsidy te hianin a theih ang em, chutiang ang programme te hi a theih ang em? Tih a kha kan zawt pah a ni.

Pu NIHAR KANTI, MINISTER : Awle, Pu Speaker, kan lo en ang e. Sum indaih loh avangin tun dinhmunah hi chuan a la sak theih lova. A hmasa berin kan mamawh chu dispensary a ni a, dispensary chu kan sa nual dawn a, zawhna chhannaah khan kan sawi nual a ni, engpawhnise Aizawl khawpuiah hian ran damdawi changkang Polyclinic Hospital te pawh din tum mek a ni a, project te pawh thehluk tawh a ni a, central lam pawhin min pawmsak kan beisei a ni. Pu Speaker, chu zawng chu AH & Vety Department chungchang a ka sawi theih chu a ni e.

A hnuhung berah Sericulture Department sawi ila. Mi paruk chiah in an sawi chhuak a, amaherawhchu, a chhe zawngin an sawi miah lova, thurawn ang zawngin an sawi langa a lawmawm ka ti khawp mai a. Sericulture Department hi kum 1985 khan din a ni a. He Department hi department pawimawh tak a ni a. Rural economy dinchhuahna department pawimawh tak a ni. Kan Department hna ber chu pangang khawia eizawngtute farmers tanpui a ni a. Amaherawhchu, problem chi hrang hrang kan neih avangin kan la kal chak thei lo a ni. Heng harsatna karah hian kan Department chuan farmer te hamthatna turin hma nasa takin kan la a. NLUP hnuaiah chhungkua 821 hnenah tanpuina kan pe a ni.

Pu Speaker, kum 2011-2012 chhunga hmalakna tur hi a pawimawh zualte tarlan ka duh a. A pakhatnaah chuan Thingtheihmu tang nuai za chuang pek chhuah a ni. NLUP scheme atang hian chhungkua 1500 tanpui tum a ni a. District office Champhai-ah sak tum a ni bawk a. NLUP scheme atangin Grainage house leh Rearing house pahnih sak tum a ni a. Heng Grainage house-ah hian pangang chi dah thatna cold storage te pawh bun tum mek a ni. Pu Speaker, farmers 1500 training pek tum a ni a. Thingtheihmu huan hectare 1500 private sector-a siam tum a ni bawk a. Staff 30 in-service training pek tum a ni. Pangang chi sem chhuah zat tur chu nuai nga a ni a. Cocoon thar chhuah zat tur chu 70 metric ton a ni. Raw silk deh chhuah zat tur chu 8 metric ton a ni bawk a. Staff quarters hmun hrang hranga mamawh sum awmdan a zirin sak kan tum bawk.

Pu Speaker, District Sericulture Officer post pali (4) siam belh tum a ni a. Rei lo te chhungin peih fel beisei a ni. Pu Speaker, harsatna thenkhat kan nei a. House-a tarlan ka duh chu kumtin hi Plan Outlay a tlem thin avangin duhthusama hmalak hi a harsa a. Pangang chi Grainage Building hi kum tam tak kal taa sak kha a ni a. Inngahna tlak pawh a ni tawh lo a ni. Chuvangin, grainage building thar kan mamawh a ni. He harsatna hi NLUP atangin sutkian tan mek a ni. Post hrang hrang 56 vel lai a ruak a, sum indaihlohna avangin heng post hi a la fill-up theih loh va. Mahsela post fill-up turin Sorkarah kan dil mek a ni. Pu Speaker hei zawng hi Sericulture chungchanga ka sawi theih ni se. Pu Speaker ka demand hrang hrang:-

- a) Demand No. 30 - Disaster Management & Rehabilitation Department ₹ 15,67,85,000/-
- b) Demand No. 34- Animal Husbandry & Veterinary ₹ 117,14,33,000/-
- c) Demand No. 41- Sericulture ₹ 11,12,90,000/-

Total ₹ 143,95,08,000/- hi House zahawm tak hian min pass sak turin ka ngen a ni.

SPEAKER : Minister zahawm tak Pu Nihar Kanti in a Department chante Member tena kan sawite rawn react in a rawn wind-up a pass a rawn dil bawk a. Kan buk ang a. Demand No. 30 - Disaster Management & Rehabilitation Department ₹ 15,67,85,000, Demand No. 34 - Animal Husbandry & Veterinary ₹ 117,14,33,000, Demand No. 41 – Sericulture ₹ 11,12,90,000, a vaiin cheng vaibelchhe 143,95,08,000 te hi pass remti apiangin ‘remti tiru’ le, remtilo kan awm chuan ‘remtilo’ tiru le, awmlo maw?. Awle, Minister zahawmtak Pu Nihar Kanti Demand No.30 – Disaster Management and Rehabilitation ₹ 15,67,85,000, Demand No. 34 – Animal Husbandry and Veterinary – ₹ 117, 14,33,000, Demand No. 41 – Sericulture – ₹ 11,12,90,000 a vaiin ₹ 143,95,08,000 te chu House in lungual takin a pass ta a ni.

Vawiina kan tihtur chu kan zo ta a, kan chawl tawh ang a, keima chanchin tlem member te ka hriattir duh che u a. Naktukah hian Commonwealth Parliamentary Association Conference 57-na kuminah London-ah an ngat a, chu chu zuk kal ve kan han tum a, kan Assembly Secretary Pu Ngurthanzuala nen, kan nu telin. Tahchuan, hemi programme hi a hma lam daiha kan lo duan leh kal ve kan lo tuma kan lo inbuatsaih tawh fe hnuah Session hi koh a ni ta si a, Session kha ka awm tluan thei dawn lova, pawl ka ti hle a. Hon’ble Deputy Speaker-in kan Session min hruai tlang chhoh a tul dawn ani. Naktukah hianin Delhi lamah han kal thlak a, London pan tur kha. Tichuan ni 24 chawlhni zing dar 2 a

thlawh chhuah tur a ni dawn a. Chu chu ka'n hriattir duh che u a. Naktuk ni 21 July, 2011 (ningani) zing dar 10:30 ah thutkhawm leh tur a ni e.

Sitting is adjourned at 8:15 P.M.